

Aiteng'en too Nkitanyaanyukot

**Olaigeroni: June Crowl
Enkibelekenyata te Kimaasai: Cosmas
Yenko. Nererioo Cosmas Lemein tenebo
Paul Highfield Olasirani loo mpishai:
Charlene Ramey**

**Copyright 1998 by June Crowl tenebo Good
News Productions International – Africa. P.
O. Box 636 The Village Market, Nairobi,
Kenya. Eitobiraki ena buku te Kimaasai to
lari le 2015. Nikirerioo 2021. Netum
Christian Restoration Ministries elakunoto
pee eibelekeny kuna aatinin te Kimaasai
neitobirunye imbukui kumok. Ore
enkampuni naitobira kuna bukui naa keji
Kijabe Press te Kijabe, Kenya.**

ENASHE

Ang'as aisho e Nkai enashe naaishoo e Mpiris Enye naiteng'enishore naaiteng'en sii ninche ilchoreta laainei o lalashera le nkop e Congo. Aaiteng'ena mbaa kumok e nkishui enye too nkiteng'emat oo nkitanyaanyukot naataasishore ninche egira aalikioo ilomon Supati o eiteng'enisho. Ashe.

Ore tena rishata ake, naa ekishipa tinikincho enashe ilaisiaayiak ootii ina kampuni naji Good News Productions International – Africa, te Nairobi ootaretutuo iyiook maitutumo kulo kigerot eimu enkariyiano enye nemenauru.

Maarikino eitu aisho enashe entito ang Charles Ramey, enaa ninye naitobira mpishai pooki sidain naatii ena buku. Etetema te sipata aas te nkidimata enkariyiano enye naa keisul pooki tesidano!

Ore enabayie, te lelo pooki laaitagolo pee alo dukuya asotu naitutum tenebo kuna kitanyaanyukot pooki naa kajo ake ashe. June Crowl – 1998.

[Nanu Paul Highfield – Kaata enashe sapuk te June Crowl pee eisho iyiook orusa pee kimbelekeny ena buku te Kimaasai. Naata sii enashe te Cosmas Yenko amu ninye oibelekenya ina buku te Kimaasai. Neretu iyiook Cosmas Lemein arerioo ena buku. Narerioo sii nanu. Neaku, kesipa enatejo Ilmaasai inchere, "*Meishaa elukunya nabo ng'eno.*" Nikishukoki Enkai enashe amu ninye naishoo iyiook engolon o eng'iriata pee kindip ena buku. Tadamu ajo ore pee ayieu (nanu Paul Highfield) naponaa indamunot aainei napik ing'adeta tenebo ele ororei oji "Esipata" metaa anaa ena: (Esipata napik indamunot tene.) Eing'uaa kulo kigerot le Bibilia ina oshi Bibilia te Kimaasai – 1991]

ENINKO TINIASISHORE ENA BUKU

Eigeroki ena buku te nkariyiano pee eretu ilaiteng'etak o lalikirok lo rorei le Nkai aiteng'en ilooiteng'eni lenye o lainining'ok tenkitijing'aroto sapuk mbaa e Nkai.

Ore tenkipankata oo mbaa naatii (contents) ena buku te mpalai e ong'uan naa keipanka inkatinin too nkirotot naaimakini. Enkisiligata ang nchere ore too nkolong'i, naa ore empisha e pooki atini naa keaku enduaata oo ndamunot naaretu iltung'ana metadamu nkiteng'emat oo nkatinin pooki.

Tusuja kuna roruat teniyieu neiu ena buku ilng'anayio oodupa.

1. Isoma tenkomono enkatini nabo ake te nkolong nabo. Ore ai olong nisom ai atini.
2. Tusuja nkaatinin too "*mbaa etipat*" anaa irubat. Tene itum indamunot enaipirta eninko pee isuj nena baa te nkishui ino.
3. Pee irretena tenkaraki nkulie kiteng'emat naajio elikiroto aashu enkiteng'enare e nkisoma e Bibilia, eipankaki embata oo lkigerot ooiririkino, metaa ata tenaa meata olaiteng'enani Bibilia eton ake eidimayu pee eesishoreki ilkigerot ooling'uaa Bibilia.
4. Eton ake esujita "Enkias enkatini nabo o nabo iroruat naata ndamunot sapuki are naalimu enkisoma nabo o nabo. Neitoki atii eoroto oo nkiaasin enkorrok enkishui oltung'ani makewon pee eyiolou eneas te nkishui enye. Ketii sii nkikilikuanat oo ndamunot naaikilikuan olikai olikai.
5. Ore pee iasishorena ena buku anaa ilturrurri kutiti too nkiteng'emat e Bibilia naa kautu ake nchere pee eutari olainining'oni tiatua nabo o nabo oo rubat pokira ile maa kutiti.
6. Era Tomoni uni oo naapishana nkaatinin naatii ena buku. Ore ake pee eesishoreki enkatini nabo ake te wiki, neaku ore ena kiti buku naa keidim aishoru inkiteg'emat masaa naaiteng'enishoreki tiatua ilapaitin ooudo.

IMBAA NAATII ENA BUKU

(Table of Contents)

INDAMUNOT OOLTAUJA LANG (*ATTITUDES*):

Endamunoto nabo (<i>Single Mindedness</i>)	
1- Enchilunoto	7
2- Iropiyani aashu enkitok	11
Eng'iriata (<i>Patience</i>)	
3- Olpayian Le ng'iriata	15
Nchoo eaku enaaku (<i>Fatalism</i>)	
4- Nchoo eaku enaaku!.....	19
Ang'amu enkitoo (<i>Accepting Advice</i>)	
5- Olchoni Omuguta.....	25

OIKUAK (*BEHAVIORS*):

Isiaitin naanare nikias (<i>Responsibility</i>)	
6- Milej Kewon	29
7- Enkitoo Natanyaki	33
8- Osinka oisiligayu	37
9- Olkila ojung'uno.....	40
Olkuak le mesidai (<i>Mischief</i>)	
10- Enkitojo Olosek	44
11- Olukunku Arruoni.....	48

12- Ilchoreta alejak.....	51
13- Shoruetisho Namoda	55
14- Enkisiaul Ekeeya.....	59
15- Orreshet	62
16- Enkiti Lejare	66
17- Kelejisho Nkonyek.....	70
18- Keyaisho Enkurruna.....	74

Enanare nicias (*Conduct*)

19- Ntoyie Uni	78
20- Emborbor elukunya e Nareruk	82
21- Enkidetidet.....	86
22- Ematua e Tomon.....	90
23- Olomoni le Melioo	94
24- Enking'asia Osinkirri.....	97

Emodai (*Foolishness*)

25- Ing'ok Inono nikimbalunyie	101
26- Oloata Nkiyiaa Toning'o	104

Irresheta (*Snares*)

27- Kirreshitoi te Kutuk aji	108
28- Olomoni le Meitoomono	112

Ilosekin loo ltung'ana (*Manipulation*)

29- Entarakuwet Kalamas	116
-------------------------------	-----

ENKIRUKOTO (FAITH)

Ing'ok (*Sin*)

30- Olola le Keeya	120
--------------------------	-----

31- Emotonyi Nemeishopo.....124

Enjeunoto (*Salvation*)

32- Emuto!.....128

33- Ailany Keeya132

34- Kutuk aji Napirik135

35- Terretenayu138

36- Etua Nabo Kata.....142

37- Inkituaak Imiet.....146

Enchilunoto - 1

Etii apa entito nabo natayieua enkiyama, nedumunye alo amanaa ashilu olee supat. Nelo apake o meirribo olee oisul ilewa pooki ootoduaa. Neshipa oltau lenye oleng. Ore pee elusoo ilkuti apaitin eidipa aayamata, neiteru olpayian lenye amera. Neibelekenya indamunot, neibelekenya olkuuak lolpayian tenkaraki emerai nemeeta olkekun.



Neiteru olpayian apianu, neiteru aibayu enkitok enye, nelo ometaa kejoki te nkiba, "Meekure aanyor pi. Neeku tudumu pooki toki niataiyie tipat tiatua ena aji tanapa pee ishuko alo enkang e Papai lino."

Nedumunye enkitok te mion sapuk oltau amanaa tiatua enkaji aing'oru intokitin pooki naata tipat, etii imesai, ilorikan, eredio, imbaisikelini o telefisen. Kake ore hoo duoo neitu elau tenkaji enye masaa naata tipat naaidim iropiyiani aainyang'u, neton ake etalaikine oltau lenye ategelu emasaai nabo naata tipat te ninye tiatua nena masaa pooki naatii aji. Ore te mion sapuk oltau, nemut ajo, "Ore entoki nadolita ajo keeta tipat te nanu aisul pooki naatii ena aji naa olpayian lai ake. Naa ninye ategelua too masaa pooki naatii ena aji pee adumu aya enkang e Papa.

Nebik arreshu olpayian meu ang taaisere etemere oleng neiperiperare esarng'ab. Ore ake pee edol ajo meekure ening'isho te merai, nedumu apik enkoriong enye nenap aya enkang e Papaai lenye. Ore pee eishiu olpayian e merai nedumunye, nejoki enkitok enye "Aha kaji doi ene natii? Ainyoo doi naayaua ene natii?" Newaliki enkitok enye ajoki, "Iyie doi likitiaaka tudumunye shomo enkang e Papai lino niya entoki pooki naba anaa eniaatayie tipat. Nadol ajo iyie ake olpayian lai emasaai nategelua naatayie tipat te pooki toki natii ena aji!" Ore ake pee ening olpayian lenye ina neiteru aishir,

amu etoduaa ajo kenyor enkitok enye oleng tesipata. Nemut toltau lenye nchere etaa keibelekenya aaku olpayian supat onyor enkitok enye taata ontarasi. Nedumunye pokira te nchipai aashuko aapuo ang. Nanya olmumai nchere kepuo aaisiaisho tenebo neitobir enkiyama enye metagolo.

Enkorrok e Nkisoma:

Yesu, enkitanyaanyukoto ele payian, ninye ojoki iyiook mategelu ina nikidol aajo ninye naata tipat tenkishui ang. Ore pee eisimaki ele payian enkitok enye metegelu imasaa naata tipat too masaa enyena pooki enkop neibalayu ajo eitu etum enkitok enye enyamali te ngelunoto.

Etegelua olpayian lenye amerani, lemeeta enyorrata metaa ninye emasaai naata tipat alang masaa pooki naatii aji. Etoduaa eredio natii aji o nkilani oe mbasikil, kake eitaa nena pooki naatoduaa pesho amu meitudutie olpayian lenye.

Emategelu emasaai naata tipat aisul masaa pooki naata tipat te nkorrok enkishui ang. Emategelu emasaai sidai naata enkishui nikimbayu ina torrono nemeeta enkishui. Naa ore kigelu emataa asipak nchere, ore ina nikigelu naa keitiship nenyorraa e Nkai. Eitanapa iyiook e Nkai pee kigelu "enkishui." Amu, ore enemetii e Nkai nemetii "enkishui" te yiook aashu too nkera ang, teneitu eiteng'eni iyiook enkipirta e Nkai. Keishiaakino iyiook pee kigelu "enkishui," eton kitii ena kop amu ore ake pee eye oltung'ani ena kata nabo nemeitoki aata erishata nagelunyie "enkishui."

Tayiolo kulo kigerot toltau lino:

Ilsealonike le dukuya ematua 5:21-22, *"Eneneng'a pooki toki. Embung'a entukurraki ina sidai. Entalam empukunoto pooki entorroni."*

Iroma 12:9, *"Embai ntai intorrok, entirrishia isupati."*

Timoteo liare 1:14, *"Torripo ina sipata nikinchooki iyie te Nkiyang'et Sinyati natamanya atua iyiook."*

Matayo 13:45-46, *"Etiu enkitoria e shumata anaa oltung'ani omirisho, oing'oru soito oogol enkinyiang'a. Ore pee etum obo, nelo amir ntokitin pooki naata, neinyiang'u ina."*

Enkigilata oo nkitanapat 30:19-20, *"Kaipotu nanu keper o enkop nikinchakenoki iyie ena olong, nchere airragie nanu tedukuya iyie puuan o keeya, emayianata oldeket, ore naa tegelu puuan, pee itum iyie eishoi ino atobikoi, ninyorru Olaitoriani e Nkai ino, nining oltoilo lenye, nimbang ninye akurraki."*

Timoteo liare 4:8, *"Ore ebaiki taata naatushumakaki nanu emaupe enkitoo e supatisho, naa Olaitoriani, ilo arishani asipani laayooki aisho, tena olong, neme nanu ake eishori, kake keishori sii lelo ootonyorra enkata naliooyu ninye."*

Mbaa naaipirta enkishui ino:

Enkorrok oo nkiteng'emat etipat:

1. Tegelu "enkishui naata tipat" pee inchu tenebo o nkera inono.
2. Irrita emasaai naaisul eeta tipat tenkishui ino aa inchere Ilomon Supati.

Eimaki nikurrakiki:

1. Ereikini oshiaake aikok iyiook pee kineneng pooki toki nikigelu "esidai" ake, naret iyiook. Nteng'enayu pee iyiolou empaashata oo supati o ntorrok. Ore anaa analilitu olbiasharai osoit ogol enkinyiang'a, keishiaakino sii ninche iyiook pee kililitu emasaai sidai nanyorroyo te Yesu Kristo. Ore ake pee kikurraki aaibung ena "masaai etipat" nikitum olmarisian le supatisho.

2. Ena tenakata erishata nikelunye "enkishui." Ekiata engelunoto kake keiririkino pee kigelu eton kinchu tena kop. Eiriamari imayianat oe nkishui, neiriamari oldeket o keeya. Ore ake pee eaku kituata, nimikintoki aata erishata engelunoto. Tadamu ajo etejo Yesu nchere, "Ore ilo lemetii tenebo nanu naa nanu egilunore" (Matayo 12: 30).

Nkilikuanat ondamunot o nkibirribirat

1. Kenaata itegelua doi iyie ele amerani pee inap? Kainyioo pee igelu arashu kainyioo pee eitu igelu?
2. Kainyioo "osoit likililitu ogol enkinyiang'a"?
3. Amaa tinikigelu "enkishui" kainyioo eitodolu tiatua enkishui ai? (Enkigilata oo Nkitanapat 30:19-20)
4. Ining'ito pasa anaa keiririkino pee igelu "enkishui" eton inchu tena kop? Kainyioo pee eirikino arashu pee meirikino?
5. Imbirribirra: Amaa inoto oshi aikata engoloto aashu enyamali pee irrip "olchumati sidai" likintaakaki iyie to siligi. Amaa indim atorripo openy?
6. Imbirribirra: Amaa naaji tinikijokini tegelu emasaai ino naaisul naata tipat te iyie tena kop, kainyioo igelu?

(**Indamunot Naatoponyie Paul Highfield** - Keretu sii iyiook ena atini pee kisipu intokitin naata tipat naaisul too nkang'itie ang o tiatua enkiyama ang. Eisdain imasaa kake ore enaisul te pooki naa tenetii enyorrata, eseriani tiatua enkang ino o enkiyama ino. Amu ore pee eeta oltung'ani imasaa kumok kake metii eseriani atua enkang enye aashu enkiyama enye, naa pesho nena tokitin pooki. Neaku, ore enkiokoo too lpayiani naa inchere matonyok pee kinturukie imbaa naata tipat tiatua enkiyama ang nikiramamat inkituak ang anaa enkishooroto naing'uaa Enkai. Nikipik sii Yesu empolos enkiyama ang amu ninye oisho iyiook engolon nikiramatie olikae olikae. Nimikincho inkulie tokitin meitoria iyiook neme Yesu - Iroma 6: 15-18; 12: 1-2).

Iropiyani arashu kenkitok - 2

Etii apa olkinki oata entito sidai oleng naa ninye ake enkerai naata. Netum ele kinki iltung'ana kumok karsisi oata ilookeri sapuki neata nkishu ontare kumok o nkajijik sapuki ootoomono ena tito enye sidai pee eyam. Neitoki atum oltung'ani obo aisinani oleng ootoomono sii ninye ena tito enye pee eyam! Nedung olkinki nejo, ore taa eng'eno naisul nagelunyie oltung'ani oishiaakino neyam ena tito ai, naa tenaisho kulo lewa meitukujata. Ore pee eaku ina olong enkitukujata, neishop entito enye too nkilani naata imbenia kumok nepikaki iropiyiani metaa kedodooyo. Basi, neosh lewa olkereri lenkitukujata nemeata olemejo ninye oitukuj ilkulikai pee eishori entito. Nejoki olkinki entito enye, iyie taa nang'as akuet. Basi, ore ake pee ekuet entito neiteru olkereri lenkitukujata loo lewa aakuet aajo kalo ong'asie ilkulikai entito. Neaku ore ake pee edol entito ajo etii ilewa ootupunyakita oleng neoku emborei enkaina ooropiyiani neisuaya tesiadi ninye.



Neaku kepal ilkarsisi entito eitu einepu aabung, neitashe nabo kata aasotu iropiyiani, nepalaa entito aaisho meshomo dukuya akuet. Kake ore ninye olapa lee aisinani oleng neitu eshilaa ninye iropiyiani, kake eshomo ake amir entito ometaba anaa neinepu aibung. Ore ake pee eishunye enkitukujata netum olaisinani iropiyiani kumok olokeri sapuk oleng oishoo olkinki, tenebo o entito enye.

Enkorrok e Nkisoma:

Ore tena atini naa ketii apa ilewa ooyieu neyam enkinki. Anaata eibung'a aakurraki ina kipirta nabo inchere pee emir ina tito aabung ninye anaa enkishooroto. Kake ore ake pee edol

ninche iropiyiani naaisuayie enkingi aisuaaki enkop nerikino ake tenkiti rishata enkipirta olekoisiaayio, neshukokino enkop aasotu iropiyiani pooki. Ore tena oitoo naa keishiaakino iyiook pee kidumu nkonyek ang aaimariri Yesu nikinyok tenkoitoo pooki sidai naidimayu pee kimirishore olekoisiaayio le nkishui oo ntarasi. Kake, kelelek taa pee kipaash endamunoto enkipirta ang. Eikumok taa mbaa enkop naatem iyiook anaa enikikuetita, metaa ore tenkiti kata dorrop nepaashari nkonyek ang tenkoitoo enkidipata naa Yesu Kristo taa ina oitoo. Kake, ore te kulie katitin naa kelelek eirin yiook "intokitin sidain" naatii ena kop o metaba anaa neaku mikintoki aashilaa ina kitukuja sidai. Melelek taa enkitukuja enkuetata. Keedo oleng ina kuetata enkitukuja (*marathon*). Ore taa ena kitukuja enkuetita naa ketii ngumot kumok oloketa naatii enkoitoo. Ore nkatitin kumok naa keipotii olairukoni le Kristo meisilisili to sesen, neisilisilo te mion, neisilisilo te nkurruna ometabaiki keeya te kulie rishat. Kake ore ake pee kishumaki nkonyek ang Kristo nemeitokini aaitoki katukul aata entoki naaidim aibooi iyiook eitu kibaiki enkipirta ang. Mbung'a too ndamunot inono nchere ore enkurruna ang taata tenkaraki dupoto oo Lomon supati naa keata tipat oleng tosilingi leina kitoo nalotu. Nejo Romans 8:18, *"Ayiolo nanu ajo ore nkisilisilot ena kata meitorisiokini ina kitoo nayookini aaboloki iyiook."*

Tipika oltau lino kuna matuan:

Ilhebrania 12:1-2, *"Ore tenkaraki nena, amu etaa emanita iyiook enkatampoo kitok elelo shakenini, emaiturrai sii iyiook enkiroishi ake pooki, o eng'oki naonyikino iyiook oleng, emaipirrio teng'iriata teina kuetita natipikaki te dukuya iyiook. Emaimariria Yesu olaa ninye olaiturukoni naa oloitabaya enkirukoto ang, olaa ore tenkaraki eng'ida natipikaki dukuya ninye neting'iria osalaba, nemenu ina kurruna, neton taata tenkaina e tatene olorika le nkitoo e Nkai."*

Yohana le dukuya 2:15, 17, *"Eminyorru enkop anaa intokitin naatii enkop. Ore oltung'ani ake pooki enyor enkop, nemetii enyorrata nanyorr Papa atua ninye. Naa keishari enkop, ong'urrat enyena; kake ore ilo oas enayieu Enkai nebik intarasi."*

Timoteo liare 4:7-8, *"Ataarare olarrabal sidai, aidipa ina kuetata, atagolie ina kirukoto. Ore ebaiki taata naatushumakaki nanu maupe enkitoo esupatisho, naa Olaitoriani, ilo arishani asipani layooki aisho, teina olong, neme nanu ake eishori, kake keishori sii lelo ootonyorra enkata naliooyu ninye."*

Yakobo 1:12, *"Emayiana oltung'ani ong'iri too ntemat, amu ore pee eidip ating'iria entemata neng'amu ninye enkopiyia enkitoo e nkishui naisiligie Enkai, lelo oonyor ninye."*

Ifilipi 3:14, *"Nanyok aisarisarie pee abaiki idia rishata o enkishooroto o enkipototo e Nkai e shumata tiatua Kristo Yesu."*

Mbaa oltau:

Enkorrok oo nkiteng'emat etipat:

1. Enkinchiaakino pee ing'iri tena kuetita nikuetita. Amu, enkuetita nemelelek naa eikumok iloketa.
2. Mincho ake kintanyamal isikarri naaiting ena kop.

Eimaki naa nikurrakiki:

1. Ekitii pooki ena kuetita enakata eton kinchu tena kop.
2. Ore isinyat ootulusoitie teidialo yiook, ooidipa ninche ena kuetita, naa ilchakenini ooitagolito iyiook tena kuetita ang.
3. Keatai iloketa kumok, netii imbaa kumok enkop naagilunore iyiook, o ltung'ana kumok ooyieu neiwuang'ie inkonyek ang tialo ina kipirta ang naa ninye Yesu Kristo. Kake ore anaa Paulo, naa keiririkino sii ninche iyiook pee king'iri pee

king'amaa "enkishooroto." Ore ngolikinot, o enkurruna o enyat nena naara erubata ena kuetita. Ore ake pee kiaku ilooisiligayu ometabaiki enkiting'oto, nimikiindim aatayio-
loto enkishiaa nayookini aaboloki iyook.

4. Tadamu nchere, ore esikar ena kop naa keiting. Masaa e Nkai ake naabik ntarasi.

Nkikilikuanat o ndamunot o nkibirribirrat:

1. Amaa tialo enkuetita e Paulo, kainyioo iloketa naaitanyamala ninye?
2. Keidimayu pee iata enkitanyaanyukoto oltung'ani obo liyiolo oidima akueta teng'iriata enkuetita naibale te ninye.
3. Kaji eikuna pee etaa Yesu "enkiterunoto o enkitabaroto" enkisiligata ang? Amaa naaji tinikimpotokini iloketa oonyamalaritin anaa Paulo idamu pasa anaa indim akueta?
4. Imbirribirra ena kikilikuanata: Kainyioo iloketa nikintanyamala aikata te nkorrok enkuetita ino? Naa, amaa isula aikata too nena loketa? Naa kaja inkuna pee isula?

Olpayian Le ng'iriata - 3

Etii apa olbarnoti obo otadamua pee eyam entito, neya esiret enkiroret enkang entito, netoni aaimaki ena bae tenebo ontoiwuo entito. Nening'okino pee elo olbarnoti alak nkishu



enkaputi. Ore eidipaki olning'o nejoki entito ng'otonye, "Mayieu nanu naayami." Kake nekurraki ng'otonye ajoki. "Meekure eata nchere pee eitu kiyami amu kitoning'okinote pee elak olbarnoti nkishu enkaputi naa ekiata enkipankata te nena tokitin nikitum." Netoni entito o ng'otonye aaimaki nkoitoi ong'uan naa meeta nchere pee

megil enkiyama too nkuti olong'i dorropu.

Ore embae "endukuya" natiaka ng'otonye entito enye naa nchere, ore ake pee ilo ayiaraki olpayian lino endaa, tadamu tipikaki shumpi sapuk naitaduar endaa paa, ore ake pee etem ajo anya nelaikino nikiaraa!" Ore ake pee eyam olbarnoti entito nelo aas anaa enapa natiaka ng'otonye. Kake, ore ake pee eishamisham olpayian endaa neshipa oleng. Nejo. "Ore olkurto pooki otii enkoshoke ai naa keidaaya taata ena olong."

Ore pee elusoo nkuti olong'i, neitoki aas enkae bae eare aa nchere, eitu epik shumpi katukul endaa enye, eata osiligi nchere kegoro olpayian nearaa. Ore ake pee eishamisham olpayian endaa nemeishamu shumpi nekueni, nejo. "Ashe oleng, entomononi ai nanyor. Ore ena shumpi naitaduara endaa naaiterua aitotir enkoshoke ai, metaa ore ena daa nemetii shumpi naatareto aishiunye enkoshoke." Ore tenkolong nasujita ina, neitoki atem enkae oitoi e uni natiaka ng'otonye, intukuo nkilani olpayian lino nimilo metoito. Neshipakino olpayian ina nkae oitoi nemesidai, nejo, "Eisidai oleng amu intukuo nkilani aainei neitu iya boo alo meinyiala enkolong."

Ore enabayie, enyaaka entito atem enkoitoi e ong'uan natiaka ng'otonye pee eas. Etudumua nkilani pooki olpayian

lenye nemuk te ilata endaa (aashu ilata o ltukai). Kake, eitu ake eitagor ena bae olpayian lenye. Newaliki olpayian tenchipai sapuk nchere, "Ashe aitoki entomononi ai. Amu, aaiterutua oshi ilashe aagira aaonyiony too nkilani, neaku ore ena oitoi ino sidai nitaasa amuk nkilani aainei te ilata naa keishu enyamali pooki oo lashe too nkilani aainei. Esipa ira iyie enkitok supat naa sidai oleng tenkishui ai. Neyiolou ina kata ajo eisupat oleng olpayian lenye nedol sii ajo enoto enkoittoi pee eitiship olpayian lenye oleng. Neaku ore tenkaraki ina nyena olmumai tenkishui enye inchere, katon nanu tenebo olpayian lai, naaku enkitok enye neaku ninye olpayian lai ometaba anaa neor iyiook keeya.

Enkorrok e Nkisoma:

Eirrashua ninye ele payian inchere, ore tesipata naa enkiting'oto ena bae esidai alang enkiterunoto. Ore apa enchilunoto (entilanet) enye neitu enyorraa pee eyam ele payian. Kake, ore tenkaraki enaidima ninye olpayian aaibooi engoro, neitodolu esupatisho o eng'iriata enye neibeleyenyo entito metonyorra olpayian. Ore tenkiting'oto neitiship olpayian ina tito oleng o metaba anaa neibeleyenyo entito anyorru ninye. Tena ketagore olpayian tenkaraki nena temat entito anaata einyiala esiaai pooki enkiyama. Ore engoro entito terishata oo ntemat naatasa te dukuya olpayian lenye naa anaata einyiala esiaai pooki enkiyama. Kake etegelua naa ninye olpayian pee eng'iri terishata enena temat pooki.

Ore tenkishui e taata naa ekipuo sii iyiook aatum nkisilisilot. Neaku, ore enkoittoi nikiarare inkisilisilot neigarakino enkishui nikitum teidialo keeya. Ore pee kisilisilo tenkoittoi nemesipa tenkaraki Kristo naa ekitem enchunet. Tena ekiindim aaitasho ti abori kuna kisilisilot pooki anaa enataasa iloibonok le Nkai, naa ekitem olekoisiaayio lang. Emikigorokino naa Enkai teneitu easayu mbaa anaa enikidamu iyiook. Kaasipani ninye Enkai neisiligayu neitabaya nkisiligat enyena. Ekilaaki Nkai olekoisiaayio leng'iriata ino.

Tipika oltau lino kuna Matuan:

Ilgalatia 6:9, *"Ore aa isupati kiasita emikidukunya, amu kelotu enkata niksotisho teneitu kintololong enyuaata ang."*

Timoteo li aare 2:12, *"Tiniking'iri nikiyooki sii aaitoreisho tenebo ninye; tinikimiki ninye nemiki sii ninye iyiook."*

Olaikooni 7:8-9, *"Enaikash enkiting'oto entoki alang enkiterunoto enye; neikash ilo ong'iri toltau alang ilo owuasa toltau. Migoro asioki, amu ore engoro neirrag to lgoo loo madai."*

Petero le dukuya 2:19-23, *"Amu keishori oltung'ani enchunet tenaa, ore tenkaraki nadamu Enkai neng'iri teneidong'i metii esipata. Amu kaa dupoto ina, teneitamei intae enkata niasiasa intorrok? Kake tiniaasiasa isupati, ning'iriri teneisilisil intae niatata enchunet te Nkai. Amu teina eipotoki intae, amu eisilisiloki sii Kristo tenkaraki intae, neing'ueki intae enkitanyaanyukoto, pee isujusuju iroruat enyena. Eitu eas ninye eng'oki, neitu etumieki tenkutuk enye ororei lo losek laa ore pee emori, neitu eshukoki emorisho, ore pee eisilisili neitu ejo aarisho, kake eitarasaka mbaa enyena pooki ilo oiguanare te sipata."*

Yakobo 5:7-8, 10-11, *"Enting'iria, intae ilalashera; o metabau elotunoto Olaitoriani. Eng'ura eanyu olaturoni le nkurma ilng'anayio sidain lenkop. Neng'iri ometaba anaa netum enchan edukuya o ene siadi. Enting'iria sii ntae. Entagolo iltauja linyi, amu etinyikua elotunoto Olaitoriani. Entusuj, ilalashera laainei enkitanyaanyukoto osina o eng'iriata oo loibonok le Nkai ooiroro te nkarna Olaitoriani. Eng'urai, kijo emayiana lelo oong'iri."*

Mbaa Oltau:

Enkorrok oo Nkiteng'emat e Tipat:

1. Ore engoro nemesieku o eng'iriata naa keata olekoisiaayio.
2. Ting'iria too nyamalaritin o sinaitin.

Eimaki naa nikurrakiki:


1. Ore tenkaraki eng'iriata o eng'eno ele payian neibeleyenya entomononi enye metonyorra ninye.
2. Meidim engoro o enkitoria olwuasa atesheta enkisiligata aashu enyorrata enchoruet aashu enolchore.
3. Keidimayu katukul pee elotu erishata enkishui ino nikisilisili tenkaraki enkirukoto ino anaa enaisilisiloki Yesu.
4. Enkai ake openy nikincho olekoisiaayio.

Nkikilikuanat o Ndamunot Onkibirribirrat:

1. Kainyioo endamunoto ino edukuya tolpayian? O tenkitok?
2. Imbirribirra: Amaa keata aikata erishata enaa anaata inoto ewalata sidai tenaa itang'asa aibooyo engoro ino? Ebaiki niyieu niimaki enkipirta erishata nikintaasaki mbaa enkin-yiala tenkaraki nira olairukoni le Kristo.
3. Imbirribirra: Amaa, itijing'a aikata erishata nashomo ometaa eng'iriata iyieu. Amaa, itaasa anaa enaisilig Enkai pee ias?

Nchoo Eaku, Enaaku - 4

Ore tiatua entim e Ituri naa ketumo olkeju le Nepoko olkeju le Ituri neitayu ninche olkeju le Aruwimi. Naa, iip nkuyu ooltung'ana naarru (oosing'orita) ele keju tenkaraki nkolati enkishui enye oo nkolong'i pooki. Naa, ore too nkatitin kumok naa keruko ele keju sidai airurari. Naa ilkuti tung'ana ake ooyiolo nchere ketii ele keju ilkinyang'in (ilkinosin) oonya iltung'ana. Naa keikurrurro kulo kinyang'in (ilkinosin) erreshu ntokitin naanya, nerretena pee etumoki aapidoki tenepunyu aadoiki enkare aaing'ol. Keidimayu metaa empeut nabore iltung'ana aashu enkitok nalotu adoiki embata olkeju aoku enkare nemeiteiki ajo ketii ilkinyang'in (ilkinosin). Eisapuk oleng batisho oo lkinyang'in (ilkinosin) naa kesipa teneji meatai hoo emurua nabo neitu einosie olkinyang (olkinos) oisumash oltung'ani.



Ore nabo olong egira oloti barnoti aretu menye aarrumoki empeut enye atua olkeju le Aruwimi nening entoki naibung'a nabo kata enkeju enye neiteru ayiataa. Neibung menye olayioni lenye, ina taa pee eiterunye olarrabal leyiata. Ore tenkiting'oto, neaku enyuaata o enkidimata eng'eno e papaai lenye naidimie meteyiatai olayioni lenye atua empeut kake eimina enkeju nabo.

Ore tenkolong eare, nelotu enkitok nanaure nanapita orridati loo nkilani oo loirerioni nedoiki olkeju. Nemeget enkare teine wueji neshomo, kake ore tembata empolos olkeju naa ketii isoito sidain ooidim aironyie nkilani ena kata eitukito. Ore pee edoiki empolos enkare neiteru taa aas esiaai enye enkitukuore enauri oshiaake naas too wikii pooki. Nelotu oltung'ani oing'uaa Bomili ooata shakenisho enkeju olbarnoti natudung'o ilkinyang'in (ilkinosin) teilo keju otii enkitok. Neirut oleng pee edol enkitok enyamaliki enkitukuore oo nkilani tiatua enkeju. Neitashe olupayian neipot enkitok nejo, "Nakitok, kaa doi iasata

tiatua olkeju? Emiyiolo doi ajo keata ilkinyang'in (ilkinosin) esumash naa teng'ole etarasakita oloti barnoti tene? Neng'as enkitok aitasheyie enkitukuore oo nkilani tenkiti rishata, nedumu nkonyek aing'or ilo payian ooata olng'ur nejoki, "Ee, kesipa kayiolo. Kake tenemaata oldeket le likae tung'ani nemaata entoki naanya. Kake ore ake paa kaata oldeket loltung'ani naa kaye ake ata tenaa emarti nalamita enkare atii." Neshukokino aituku nkilani enyena, eisilig endamunoto enye inchere, "Tenaa kaye, naa kaye, naa tenaa kaishu, naa kaishu."

Enkorrok e Nkisoma:

Eibung'a ena kitok enkirukoto inchere ore mbaa pooki naasayu tenkishui naa imbaa nemeibelekenyayu katukul. Ore too ndamunot enye naa keigarakino esakut arashu enkiyang'et oo loo nkakuyiaa nemeekure eishu. Ore ake pee emut ajo keye tenaa kesakuto toltung'ani, neaku naa meekure eata eseriani te pooki wueji. Eidipa ataa esinka "enchoo eaku enaaku," eidipa ataa batisho naitore enkishui enye. Etonyorraye ninye "nchoo eaku enaaku" nemeekure eata enkoitoi naibelekenyie ina pukunoto. Ore te sipata, naa kegira ninye aretu batisho e "nchoo eaku enaaku" apik enkishui enye batisho olkinyang oinosisho.

Keng'ar iltung'ana kumok ele kuaak. Kenyorraa rorrot e batisho torrok oleng enaa ore eton eitu easayu naa ironyi ake ninche eipirripir amu meshilaa edamu aajo, "Nchoo eaku, enaaku." Eidipa sii ninche aataa isinkan le "nchoo eaku enaaku." Kake kelaikino oshiake iltung'ana aatayioloitto inchere keata iltung'ana elakunoto pee eibelekeny imbaa. Ore tenkaraki naa oltung'ani oata elakunoto neton eidim ataasa enkibelekenyata enkorrok enkishui enye. Menarikino nenyorraa aang'amaa pooki toki nalotu enkishui enye tenaa eton eitu easayu. Ketii erishata pee eibelekeny oltung'ani imbaa. Menarikino nenyorraa aang'amaa pooki toki nalotoki enkishui enye. (**Esipata:**¹ Kake ekiyiolo pooki aajo ore inkulie katitin keponu imbaa neitu kinteiki. Neasayu ake eitu kimpanka neme entioto ang. Ore

pee easayu neijia naa kenare niking'amu tengolon Olaitoriani nikisilig ninye pee kiimaa nena temat.)

Kiaata enkitanyaanyukoto sidai enkaiguanani Esta. Ore ake pee ening Esta enkitanapata nchere, keari Ilyahudi pooki metuata tiatua olosho pooki, neitu ake duo eton eji aanyu o metabana neari ninye metua. (**Esipata** – Amu, tadamu ajo era ninye Esta eno Lyahudi sii ninye.) Kake, ewa eroruata aa inchere, etoomono e Nkai, nepukoo, nepik enkiaas. Keidimayu pee ias sii iyie embae najio ina. Miton ake duo amuat nkaik eji aanyu "nchoo eaku, enaaku" mikimbulai. Toomono Enkai nimbelekeny imbaa eton eitu easayu.

Tipika Oltau Lino kuna Matuan:

Enkigilata oo Nkitanapat 30:19-20, *"Kaipotu nanu keper o enkop nikinchenoki iyie ena olong, nchere airragie nanu te dukuya iyie puuan o keeya, emayanata oldeket, ore naa tegelu puuan, pee itum iyie eishoi ino atobikoi, ninyorru Olaitoriani e Nkai ino, nining oltoilo lenye, nisuj ninye."*

Enkigilata oo Nkitanapat 32:47, *"Amu mme irorei le pesho kulo tentai, kake enkishui inyi, ore tenkaraki ina, ipuopuo aabikoo teina kop nilang'akiki te lido kekun le Yordan nipuopuo aaya."*

Ilsesalonike liare 2:10, *"Neleji lelo ooimin te monkoi e ntorroni amu etanyaita ninche enyorru esipata naaidim aitajeu ninche."*

Petero liare 3:11-12, *"...Keishiaakino intae niaakuku iltung'ana oikununo aja? To rrekie le sinyatisho o esidano e nkishiaa inyi too naaishiaakinore e Enkai."*

Esta 4:15-16, *"Neitoki Esta ajoki ninche metawaliki Mordekai, 'Shomo inturrurro Ilyahudi pooki ootii Susa nieniene ate*

aaitupukoo terishata ai niminyanya endaa aashu iokioko too nkolong'i uni dama o kewarie. Ore nanu o nkaisiaayiak aainei nikien sii yiook ate aitupukoo anaa intae. Ore pee easi ena nalo enetii olaiguenani, hoo naa engilata oo nkitanapat ina. Naa tenaa kaye nanu naye.' "

Mbaa Oltau:

Enkorrok oo nkiteng'emat etipat:

1. Keata oltung'ani elakunoto naasakinyie kewon mbaa enyena neitobirua e Nkai, neisho Enkai ninye engolon naidim ataasishore engelunoto iyieunot enkorrok enye. (**Esipata:** Kake keliki iyiook Iroma 6: 15-18 inchere ore metii Yesu atua enkishui ang naa ekira isinkan loo ng'ok. Kesipa inchere eton eidimayu pee kigelu enkoitai sidai kake ekiiyieu eretoto sapuk naing'uaa Enkai. Amu, ekishal naa kelelek pee elej shetani iyiook.)
2. Ore ena kiroroto najo, "Nchoo eaku enaaku" aashu ina damunoto najo meidimayu pee kimbelekeny imbaa, naa keinyial enkirukoto, neibooyo maendeleo, neinyial enkidimata naaidim oltung'ani ataasaki kewon eitu eanyu likae tung'ani metoliki enaas. (**Esipata:** kesipa ina bae oleng amu ebaiki nemeipiru oltung'ani imbaa amu kejo meidimayu aashu keure ilkulikae tung'ana. Amu, ore pee etem embae ng'ejuk kejo ebaiki nemenyor ilkulikae aashu kekueniyie ninye.)

Eimaki naa nikurrakiki:

1. Ore ena kiroroto najo, "Nchoo eaku enaaku" neton aa oldeket te nkop ang amu eton eata iltung'ana kumok enkirukoto nchere eton meata oltoilo lenaidim aatejo te nkorrok enkishui enye. (**Esipata:** Neaku, ketoni ake ninche aitirring'a nemeeta enaas pee eibelekeny imbaa. Ore pee eitirring'a oltung'ani, nemeeta enaas naa kegol pee eibelekenya imbaa. Ore pee

meas ilairukok imbaa sidain neasayu imbaa torrok alang isidain.)

2. Eitobirua iyiook e Nkai tenkitanyaanyukoto enye makewon neisho iyiook enkidimata o eng'eno nikiyiolounyie mbaa nikintoreiyie ndamunot ang o nkiasin ang pee kitumie dupoto naishiaakino. Menarikino pee kinyorraa pooki toki nalotoki iyiook eitu kimbooyo pee measayu.
3. Keidimayu pee kimbelekeny imbaa neme te nkishui ang ake maate kake o tenkishui oo lkulikae sii. Amu ekiata osiligi tiatua Yesu Kristo.

Nkikilikuanat o ndamunot o nkibirribirrat:


1. Amaa, ketonyorraiyie doi Esta ina kitanapata olkinki inchere pee eari Ilyahudi pooki metuata metii osiligi aajo keibeleyen-yayu ina bae?
2. Kainyioo empukunoto osiligi natii ena kiroroto najo, "Nchoo eaku enaaku," aashu teneji meidimayu pee kimbelekeny imbaa.
3. Kainyioo enkikoo nincho oltung'ani oibung'a akurraki enkirukoto ena kiroroto najo, "Nchoo eaku, enaaku?"
4. Kaji eiko ena kiroroto najo, "Nchoo eaku, enaaku" pee eibooyo maendeleo?
5. Keidimayu pee eaku oltung'ani olairukoni le Yesu Kristo neaku ole "Nchoo eaku, enaaku?" Aashu kejo meidimayu pee kimbelekeny imbaa?
6. Mbirribirra: Amaa, irrashua aikata kewon ajo iata ena pukunoto najo inchere, "Nchoo eaku enaaku?"

(Esipata: Tadamu sii Yona. Amu meyieu nelo Yona Ninawi. Ore pee elo ade neibeakenya iltung'ana pooki neitu ear Enkai ninche. Anaata etaase nyoo tenaa eibung'a Yona ina kiroroto, "Nchoo eaku enaaku? Amaa anaata etaase nyoo te Korintio tenaa keitu elo Paulo aiteng'en ninche, nejo ninye, "Nchoo eaku enaaku?" Kejo Iasat 18: 4 enaipirta Paulo, "*Neiguana anaake te*

nkaji e ntumo too nkolong'i e sabato ejo ayietu Ilyahudi o Lyunani meiruko." Nejo olkereri le isiet, "*Ore Krispas laa ninye oitore ina aji e ntumo, neiruk Olaitoriani, neiruk sii enkaji enye pooki; ore pee ening Ilkorintio kumok neiruk neibatisae.*" Tadamu maendeleo. Ainyoo pee medamu Ilmaasai pee etem aaun inkujit naabulu ata to lameyu? Ainyioo pee medamu enkoittoi sidai pee easishore enkare naata pee eidip iltung'ana kumok? Ainyioo pee metem aun inkulie tokitin naata dupoto to sesen alang ilpaek? Ainyioo pee meyieu nemir inkishu enye pee eshet inkajijik nemejing enkojong'ani aashu ilojong'a pee metum oltikana o nkulie muoyiaritin? Ainyoo pee meing'oru oleng te nyuata enkoittoi narripie ninche ate pee meok enkare torrongo naata imuoyiaritin? Ainyioo pee memir inkishu eton eitu elotu olameyu paa ore pee eishunye olameyu neitoki ainyiang'u inkishu? Ainyioo pee epuo dukuya Ilmaasai aamuk enaisho too siruai? Ainyioo pee eton aa sapuk eloloito tiatua enkop o Lmaasai? Ainyioo pee eton eibung'ita Ilmaasai oleng emurata oo ntoyie? Tenkaraki sa kesujita ina damunoto "Nchoo eaku enaaku?" Ainyioo pee eton egira aidong eseshata o Lmaasai inkituaak enye tenepong'ori? Ekeidimayu pee eata sii ninche ina damunot, "Nchoo eaku enaaku?" Kainyioo naibeleyenya ina damunoto?).

Olchoni Omuguta - 5

Ore nabo olong neitoomon Olng'ojine olchore lenye, Oldia, pee epuo aaparana. Basi, neiteru elototo tenebo, ore eshomo oloti lekigutet (ewueji nemeado) nesioki olng'ojine aiwuang'aki entim tenkiti rishata.



Ore eton etii atua entim nedol oltome otua. Neibelekenya akuetu aliki olchore lenye pee elo adol ilo tome otua. Eitu eitoki aaitashe basi, neipirri pokira aare aashukokino oltome otua. Basi, neikok olng'ojine olchore lenye pee menya nkiri oleng amu eton eitoki aatum ai daa tedukuya elototo enye.

Kake etanya Oldia ening enkikoo. Basi, nedumu Oldia olchoni lo ltome otua, neitaleng'oki enkoriong enye meisiong'ayu too nchot pokira osesen, pee tenening esumash neidim ainsa enkiti pee eidim ashomo dukuya te lototo enye. Ore pee edol olchore lenye enaasita neliki pee epal, kake etanya Oldia aning. Neaku, nedumu Oldia neitaleng'oki enkoriong enye nepuo ninche aairiamari tenebo te safari enye. Kake ore ake pee eiteru aoshu enkolong neiteru olchoni amugutakino osesen, neiteru arrishu akurrakino osesen. Neiteru aibiitiaa enkiyang'et oldia maa kutiti. Nejoki Olng'ojine Oldia, "Ng'ura, aatolikio duo ena. Ore tenakata kitagamakine olchoni metaa meekure eitayunoyu."

Ore tenkiti rishata neye oldia.

Enkorrok e Nkisoma:

Enkisepe natorikoko oldia keeya enye. Etoduaa ninye anaa kesipa enkoitoi enye, kake eibale naa ajo mesipa. Neaku olmodai oshiaake odol anaa keyiolo pooki toki aitobiraki. Etanya olmodai ening enkikoo. (**Esipata:** Kejo Ilmaasai,

"King'as olemaai pee kintoki oleng'eno." Nejo sii, "Meeta endamata nadol kewan.")

Ore ewalata eanyata en kikoo neikes dupoto ekeeya emodai enye. Ketii olarrabal le nkiyang'et enkishui e pooki tung'ani oloito dukuya, aa inchere, mbaa supati naarare mbaa torrok. Ng'uarrat oo ng'ok e tung'ani o ng'uarrat e Nkiyang'et. Shetani enkiterunoto enkorrok oo ng'ok, neitore e Nkai isupati pooki enkorrok e Nkiyang'et. Ore ninye Paulo openy, naa keata apa olarrabal ogol oleng. Etayiolo apa ina nayieu e Nkai neitaas ninye, kake eteyiatayie eng'uarrata e tung'anisho nayieu neitiship kewon enye (tung'anisho oo ng'ok enyena). Etarruoyie olarrabal te kulie katitin ometaa kepalari. Ore kulikae lang oisho ate meitoria ng'ok e tung'anisho nemeidim aaitishipa e Nkai katukul. Ekira ilmang'ati le Nkai te tung'anisho ang naa ore enkiting'oto ang naa keeya.

Tayiolo Kulo Kigerot To Itau Lino:

Iroma 8:5-8, "Amu ore lelo oopuo erubare osesen naa mbaa osesen naaitore iltauja lenye; kake ore lelo oopuo erubare e Nkiyang'et naa mbaa e Nkiyang'et naaitore iltauja lenye." Ore paa osesen oitore mbaa oltau nelotu keeya, ore paa e nkiyang'et naitore oltau neaku ina enkishui o eseriani. Amu ore oltau oitore osesen naa olmang'atinta te Nkai; amu meishoru meitoria nkitanapat e Nkai; nemeidim; naa ore lelo laa osesen oitore nemeidim aaitishipa e Nkai."

Ilgalatia 5:16-18, *"Kajo nanu enchom te Nkiyang'et nimintabaya iyieunot osesen; amu ore iyieunot osesen negilunore ine Nkiyang'et ore iyieunot enkiyang'et negilunore ino sesen, amu mening'ok pokira are, neaku mindimidimi aataas nena niyieuu niaasiasa. Tena e Nkiyang'et narikito ntai, nimitii intae abori nena Kitanapat."*

Ndung'eta Erashe 14:12, *"Etii enkoittoi nalioo toltung'ani, kake ore enkiting'oto enye naa keeya."*

Ndung'eta Erashe 12:15, *"Ore enkoittoi olmodai nelioo aa sidai too nkonyek enyena makewan, kake ore oltung'ani ng'en nening enkikoo."*

Iroma 7:15-20, *"Amu mme e Nkiyang'et errindikisho eishooki intae entushukokinoto enkuretisho, kake eishooki intae e Nkiyang'et oo nkera inot. Ore tenikijo "Abba! Papa!" Enkiyang'et kewan naishakenu tenebo e Nkiyang'et ang nchere kira nkera e Nkai, naa tinikira nkera, nikira ilajung'ok, kira ilajung'ok le Nkai tenebo Kristo, te naa keisilisili iyiook tenebo ninye pee eyookini sii aaisho iyiook enkitoo tenebo ninye."*

Mbaa Oltau:

Enkorrok oo nkiteng'emat etipat:

1. Eata ake oltung'ani pooki nkoittoi are naara tiatua ninye.
2. Ore enkoittoi nalioo esipa toltung'ani makewon naa keeya eiting'oki too rishat kumok.

Eimaki Nikurakiki:

1. Ore enkishui e obo o obo lang naa ketii nkoittoi are etung'anisho. Ore ilo oipirare ng'ok ong'uar aitiship kewan, naa keeya eiting'oki ilo. Naa ore ilo likai, oipirare Enkiyang'et naa e Nkai enyok aitiship, neiting'oki ilo e Nkishui oo ntarasi. Keishiaakino naa pee egelu pooki tung'ani anaa enayieu te makewon enye. Keiririkino ake pee eisho oltung'ani e Nkiyang'et e Nkai metimira eng'oki e tung'anisho enye.
2. Ore enkoittoi nasipa nabulunyiye oltung'ani te Nkiyang'et naa pee ening nesuj inkikoot oo ltung'ana le Nkai.

Nkikilikuanat oo Ndamunot o Nkibirribirrat:

1. Iata iyie empukunoto oo larrabali oonyaanyukie ile Paulo tiatua enkishui ino?
 2. Kaa pasa eas oltung'ani teneaku keloito olarrabal laijio ele dukuya anaake?
 3. Ijo pasa keata ilalikiorok pooki litumore enkariyiano nikinchorie enkikoo e Nkiyang'et? Ainyioo pee eata/Ainyioo pee meata?
 4. Kejo aa Ndung'eta Erashe 14:12 te iyie?
5. **Imbirribirra:** Kaa rishata nabayie kinkooki niany ining enkikoo? Naa Kainyioo pee itanya ining?

Milej Kewon - 6

Etii apa olbarnoti obo oshomo aisiaai olkarsis omanya Afrika. Neisho Olkarsis ilo barnoti masaa pooki esiaai pee easishore neiteng'en enkariyiano enaiko pee eshet enkaji sidai naata olbakunoto ogol. Neshet aidip enkaji sidai oleng, neshipa olopeny enkaji ashipakino esiaai sidai olaisiaayiani ng'ejuk.

Ore too nkolong'i, nedamu pee eshet ai aji. Neipot olaisiaayiani lenye oti nejoki, "Itayiolo taata ateshetisho esidai. Kayieu taata nishet ai aji openy. Kake tesheta ena aji aitobiraki enalang ena edukuya nikitesheta iyiook pokira aare." Basi, ina taa pee edumunye olbarnoti aiturrur masaa pooki enchetare o ropiyiani naainyang'unye pooki toki nayieu. Ore ake pee ebaya sokoni nedol isoito sidain


oltorrok ooshetieki olbakunoto.

Nejo toltau lenye, "Meyiolou olkitok. Kainyang'u kulo soito torrok oolelek pee ashumaki kewon iropiyiani naaleku."

Neas ake anaa enatejo, neshetunyie enkaji olbakunoto torrano. Ore pooki toki nain-

yang'ua pee eshetie enkaji, mabatini, inkeek tenebo osimiti nemesidain. Eitorrono pooki toki nainyang'ua, kake eidipa naake atesheta enkaji.

Ore ake pee elo aliki olopeny enkaji nchere eidipa atesheta enkaji, nejoki olopeny enkaji, "Paa amaa itesheta aitobiraki?" Nyenorraa olbarnoti ashetani nchere etesheta aitobiraki. Neitoki olopeny enkaji ajoki, "Ashe oleng. Itaasa esidai oleng metaa kaisho taata iyie ena aji. Etaa taata ena aji enino!" Neitarasaki olopeny enkaji isunkuuni le nkaji. Netum olbarnoti ashetani osina toltau lenye amu etayiolo nchere kewon eteleja. Tenemutu eirrashua nchere kewon enye eshetaki ena aji, anaata etesheta aitobiraki.



Enkorrok e Nkisoma:

Keasita taata ilkumok lang anaa enataasa ele ashetani ina kata kishetita nkajijik ang te shumata. Mikishetie masaa sidain nikiaata. Ate kishumaki nena sidain nikiaata nikincho e Nkai nena naaleku. Kesipa ajo aitorrono ele barnoti. Keibala ajo eiteng'enaki enaiko pee eshet enkaji te nkariyiano, kake ore tenkaraki eului natii oltau lenye neesek nelej olkitok lenye.

Tenemutu etesheta ninye enkaji te nkariyiano anaa enaiteng'enaki anaata aa ore enkariyiano o esidano esiaai enye neyaki olekoisiaayio sidai. Etukurraka Paulo aikok ilairukok pee epik ate katukul atua enkariyiano esiai enye naas. Mme lasima pee etii "olkitok" olo dukuya anaake aitasheiki ninche. Keishiaakino pee enyok aas esiaai sidai tenkidimata enkariyiano enye anaa iloosaki Kristo kewon.

Tayiolo kulo kigerot toltau lino:

Ilkolosai 3:23-24, *"Ore esiaai inyi pooki entaas tooltauja, anaa Olaitoriani iasakiki neme iltung'ana, iyiololo aajo to Laitoriani itumutumu enjung'ore anaa olekoisiaayio linyi; Olaitoriani Kristo isiaaitata."*

Matayo 7:24-27, *"Metaa ore pooki ng'ae oning lelo rorei laainei neas, neitanyaanyukieki oltung'ani oteshetaka enkaji enye endapidapoi, nesha enchan, nenang'unye enkare, nekut olkutati, neosh ina aji, neitu euro; amu etuunokoki olkitamanyunoto lenye shumata endapidapoi. Naa ore pooki ng'ae oning kulo rorei laainei nemeas, neitanyaanyukieki oltung'ani omoda oteshetaka enkaji enye shumata osinyai; nesha enchan nenang'unye enkare, nekutu olkutati, neosh ina aji, neurori neaku kitok euroroto enye."*

Indung'eta Erashe 22:29, *"Idol oltung'ani arriyia te siai enye? Keit Ashe tedukuya ilaiguanak; meit Ashe tedukuya iltung'ana misili."*

Ilkorintio le dukuya 3:10-15, *"Ore tenkaraki empiris naaisho e Nkai, atotiwuo nanu anaa olashetani arriyia aitobir enkitamanyunoto; likai taata oshetisho teine. Toduaa naake likai tung'ani eninkuna enchetata ino te ine. Meetai hoo oloidim anyaaki aitamanyu ae kitamanyunoto neme enapa ake naidipaki aatipik, naa ninye Yesu Kristo. Kake tenaa keshetaki likai ena kitamanyunoto sahabu, anaa enkosholai, anaa osoit le tipat, aashu nkeek, aashu olkujita, aashu isuut, kelioyu kenyake esiaai oltung'ani. Amu keyooki akenyu ina olong tenkima naibalunyie enatiu esiaai oltung'ani. Ina kima naitisip eneikununo esiaai oltung'ani. Ore pee etune enchetata naitayio oltung'ani, netum ilo olekoisiayio lenye; ore pee eaku etapejoyioki; nemetum olekoisiayio lenye kake keitajeuni ninye enkorrok, kake ketiu anaa oloimunyeiki enkima."*

Mbaa oltau:

Enkorrok oo Nkiteng'emat e Tipat:

1. Kenare pee kiaasisho aaitobiraki anaa ilaisiaayiak le Yesu.
2. Keng'amaa esiaai sidai olekoisiaayio lenye.

Eimaki Nikurrakiki:

1. Ore pooki toki nikiaas neiririkino pee eibalunyie esidano eatua yiook. Mikipalaa esiai nimikishalu tenkaraki nemetaana olkitok lang.
2. Kelimu esiai sidai kewon enye. Naa keyau olekoisiaayio lenye makewon.
3. Mataasisho anaa iloishoo Yesu esiai: Amu ninye doi olkitok lang.
4. Etipika iyiook e Nkai ena kop pee kishet olkitamanyunoto sidai tiatua Yesu Kristo. Ore imasaa nikiasishore naa keipimi. Sahabu, enkosholai, isoito oogol enkinyiang'unoto naa ninche pooki olmonokie le sidano oo nkiteng'emat o enkishui.

Inkeek, olkujita, isuut ninche olmonokie lenchalan oo nkiteng'emat o e nkishui eng'oki.

Nkikilikuanat oo Ndamunot o Nkibirribirrat:

1. Idamu pasa iyie nijo eitisipaki ele barnoti tenkinyiang'unoto oo masaa torrok o e nchetare enye torrono?
2. Keng'eno pasa tiniasishore imasaa sidain, nias esiai etipat enchetare tenkaraki olmarei le nkorrok ino ake?
3. Kaja pasa eiko pee eitoduaaya esiai sidai te kewon enye? Paa maa keata tipat tinilo dukuya aas esiai sidai hoo netii enyamali?
4. Amaa, imasaa naaikununo aja igira aasishore ashetie olbakunoto le Yesu Kristo?

5. Imbirribirra: Amaa erishata pooki nemetii olkitok, ilo dukuya aas isupati te siaai nanyorroyu?

Enkitoo Natanyaki - 7

Etii apa olbarnoti obo laa olaranyani arriyia oleng. Ore enkata pooki naata oltung'ani le murua arashu olkinki ntaleng'o arashu osirua sapuk, neitoomoni ele barnoti aranyani pee elotu arany. Ore tenkaraki enkishooroto enkariyiano eranyare enye, neaku keitoomon olkinki pee elotu



arany too ntaleng'o o too siruai pooki le nkitoria enye. Eitishipa enkariyiano eranyata enye iltung'ana pooki oetuo aaing'or eranyita. Ore ewalata enkariyiano olning'o otoning'e enkishooroto eranyare enye, nekarsisu oleng netum imasaa pooki naaidimie ina kishooroto eranyata.

Ore nabo olong neye olkinki lenkop neaku lasima pee egelu iltung'ana likai tung'ani oaku olkinki lenye ng'ejuk. Ore pee elusoo erishata naado enkiimakinoto neponu aaning'okino pooki nchere, ore oltung'ani oishiaakino ena rishata naa ilo barnoti oranyisho. Kake ore ake pee ening ewalata o ltung'ana neisinanuo oleng. Nejo te makewon enye, *"Ore ake pee aaku olkinki, nemaitoki atum erishata osinkolio terishata pooki nayieu amu keaku kanyamal aasita nkulie siaaitin. Mayieu pi naaku olkinki!"* Ore tenkaraki ina ore ina kewarie neirot ilolan lenyena nepurrorri aisik tiatua ina anasa. Ore tenkolong nasujita ina nesoto iltung'ana pooki pee eput olkinki lenye ng'ejuk, kake meekure etumi olaranyani. Neiposha iltung'ana too neeika o too neegum kake eitu etum te pooki wueji. Ore etapalari nepuo aayiolou nchere eisika apa.

Enkorrok e Nkisoma:

Etiu ele aranyani anaa enatiu iltung'ana taata lenkop. Kenyor esikar nenyor karsisisho. Ore pee eipot Olkinki Yesu iltung'ana pee esuj ninye, neisik aailany tenkaraki esikar enkop. Ata hoo

teneirriwaka Yesu olkilikuai, kulikai airukok, ata ilalikiorok pee eitoomon ninche, naa pesho amu eidipa naa aaisika. Keibala nchere eng'urrata osesen naata tipat oleng too ltung'ana kumok taata tenkop. Eitamodooki nkonyek enye pee medol olchumati oitobiraka e Nkai lelo tung'ana oisilig ninye.

Meyieu apa ele aranyani neaku Olkinki amu keaku olaramatani loo ltung'ana lenyena. Eiputakine ninye pee etonie karsisisho o enkisisa natumie osinkolio. Meyieu enkumoi ang enkibelekenyata. Mikinyorraa pee eitanyamal iyiook ai oitoi enkishui. Kitishipakinote empukunoto ang e taata. Etegelua ninye Musa enkae oitoi enkishui. Etegelua pee eing'uaa enkitoo olkar lenye teine wueji enkitoo pee eretu olosho lenye, Israeli. Kegira apa aing'or dukuya atalu olekoisiaayio lenye otii shumata.

Tayiolo kulo kigerot toltau lino:

Mark 8:34-36, *"Teneyieu oltung'ani naasuj nanu, nchoo metanya naayieu oltau lenye, nedumu osalaba lenye naasuj nanu. Amu ore olojo aitopok enkishui enye neiminie; ore oloiturraa enkishui enye tenkaraki ele rorei supat, neitajeu. Amu ainyoo edupore oltung'ani, tenetum enkop pooki neiturraa enkishui enye?"*

Yoab 21:14-16, *"Ejoki ninche e Nkai, shomo tung'uai iyiook! Miking'uar ina ng'eno oo nkoitai inono. Aing'ae doi ilo Magilani, netaa aikisiaai ninye? Naa kainyioo kitum tinikiomon ninye? Ng'ura, aimetii nkaik enye ina dupoto? Ore enkiguana oo larruok naalakuaniki nanu."*

Luka 21:34-36, *"Kake eng'ura ate pee meaku iltauja linyi biitia o emerai o nkolati ena kop, neirrashu intae ina long neluam intae anaa orreshet; amu neijia etiu kedoiki lelo pooki, oomanya enkop pooki. Kake enchololoto intae inkatitin pooki, niomonunu meishori intae engolon nipaashieshie nena naaponu, pee intasheshe tedukuya e Nkerai e tung'ani."*

Matayo 11:29, *"Enteleiki ate enchata ai oo murto, enteng'ena ate te nanu, amu kabor nemawuasa toltau, naa itumutumu intae enkiyeng'iyeng'ata tiatua nkorroki inyi,"*

Ilhebrania 11:24-26, *"Tenkirukoto, etanya Musa, etubulua, eipoti aajo olentito e Farao. Nedutaa meinosieki osina tenebo iltung'ana le Nkai alang teneton aitemurru olkar loo ng'ok. Etoduua ajo emoroto namori tenkaraki Kristo naikash alang enkarsisisho o masaa kiroteti e Misiri, amu keanyita idia kishorunoto."*

Mbaa Oltau:

Enkorrok oo Nkiteng'emat e Tipat:

1. Mme pooki ng'ae ooata enkishooroto, enkidimata naakunye olarikoni.
2. Ore ilchumat pooki lena kop naa ile rishata dorrop ake.

Eimaki Nikurakiki:

1. Meidimayu pee kinchu nikisis ate ake. Meata nchere pee eitu kinap ilolan tena kishui kiretu ilkulikai.
2. Ore enkibelekenyata, nikincho e Nkai enkorióng, nikimenaa enkoitoi enkishui oo lairukok, naa enkoitoi naibala nikintorrarrie iltauja lang.
3. Ore esikar ena kop naa ene rishata dorrop ake kake ore ninye karsisisho e Nkitoo e Nkai naa enoo ntarasi.
4. Tinikining'oyu arashu kitum enkishooroto entoki naje, neme ina ake duoo naitadede iyiook mataa iloata enkiyang'et naidimie iyiook mataa ilarikok le dede.

Nkikilikuanat oo Ndamunot o Nkibirribirrat:

1. Amaa, keata pasa apa ilo aranyani empukunoto naitadede metaa Olkinki?

2. Ngero sii iyie esiana oo mpukunot naitadede esupatisho Olkinki.
3. Amaa pasa naaji, tinikinchooki erishata engolon erikore iany? Ainyioo?
4. **Mbirribirra:** Amaa, iata sa aikata erishata nikintukurruaki arashu kitusulaki tenkaraki enkirukoto ino?

Osinka Oisiligayu - 8

Etii apa oltung'ani obo oata olchampa sapuk, neiger iltung'ana aare ng'ejuko pee eretu aaokoki enkare ndaiki natii olchampa lenye. Naa ore obo naa olaisiaayiani odupa oleng menyok sii, neshal olikai. Meata ake oleitu eisho olopeny olchampa te pokira aare oltoo, nejoki enchom olchorro entooku enkare pee inapupu aayau emukunta. Neas olaisiaayiani odupa anyuani anaa enatiaakaki, nenapu enkare tolchorro apik olchampa endama pooki. Kake, ore naa ninye ola duo aisiaayiani oshal netanapua enkare tolchorro enkiti rishata ake nedol ajo enaure nelo airura to loip lolchani.

Ore ake pee elotu olopeny olchampa negoro tenkaraki olaisiaayiani oshal. Neisikong ninye tenkaraki eirure etii esiaai nejoki, shomo tung'uai esiaai ai. Netum olaisiaayiani anyuani errepet sidai tenkaraki engolon enyuaata enye. Ore egira olaisiaayiani oshal alo nedol ajo ore oltoo lolaisiaayiani anyuani naa osoit ogol enkinyiang'a obore (keji "gold" te Kingeresa). Neing'asia oleng. Nejoki, kaji doi eing'uaa ele soit ogol enkinyiang'a. Newaliki ajoki, katamanikia ake sii nanu osoit ogol enkinyiang'a etii oltoo lai, ina kata ake aoku enkare tolchorro endama pooki. Neshipa olopeny oleng neisho enashe olaisiaayiani anyuani tenkaraki ilng'anayio ootudupore anaa pee eidip esiaai enye enauri endama pooki.

Enkorrok e Nkisoma:

Eitu eirrashu iltung'ana kumok nchere kainyioo pee etii ena kop. Ore tesipata, nemegira enkumoi ang aakilikuan ate ena kikilikuanata. Kinchu ake iyiook enkolong enkolong kias enairirikino tenkaraki empukunoto naje enkishui. Kiasisho tenkaraki pee kitum olmushaara, kake mme tenkaraki dupoto oo lkulikae. Mikitem aajo mataas anaa enaisul oshi. Kake king'oru enkoitoyi pee kias enkiti siai ake nemedupa. Kake, mme naa ina

enkoitoi e Nkai. Ekitii ena kop pee kias eyieunoto enye nikincho enkanyit o enkitoo e nkarna enye.

Taiolo Kulo Kigerot Toltau Lino:

Ilkolosai 3:23, "*Ore esiaai inyi pooki entaas too ltauja, anaa Olaitoriani iasakiki neme iltung'ana.*"

Ile Efeso 2:10, "*Amu kira iyiook esiaai enye naitayioki tiatua Kristo Yesu tenkaraki isiaaitin sidain naaitobira apa e Nkai tedukuya pee kipuo tiatua ninche.*"

Ilfilipi 1:27, "*Ore too mbaa pooki enkuna ena nabo enchoo orrekie le nkishui inyi meishiaakinore ororei supat le Kristo, peyie te naewuo adol intae aashu tenematii naning'oo ajo ituunote intasheshe toltau obo, o te ndamunoto nabo, ninyokinyoko aairiamari tenkaraki enkirukoto ororei supat.*"

Ilkorintio liare 5:9, "*Metaa tenikitii ena ang, aashu tinikitii idia, ninye kiyyieu nikintiship oleng.*"

Luka 9:62, "*Nejoki Yesu, ore oltung'ani otonyorra enturore neitoki anang silig, nemeishiaakino enkitoria e Nkai.*"

Embolunoto 21:7, "*Ore ilo omirisho naa ketum ena jung'ore naa kaaku nanu e Nkai enye neaku ninye enkerai ai.*"

Iroma 12:1, "*Aishiraki naa intae ilalashera laainei, te ilo ng'ur le Nkai, enchoru iseseni linyi metaa olasar oishu, osinya neng'amunoyu te Nkai, amu ina eseremata inyi e Nkiyang'et.*"

Mbaa Oltau:

Enkorrok oo Nkiteng'emat e Tipat:

1. Eitobirua e Nkai oltung'ani pee eas isiaaitin sidain naaterrete-naka iyiook pee kias.

2. Eisiligita e Nkai esiaai sidai too nkolong' i pooki te kila obo obo te yiook.

Eimaki Nikurrakiki:

1. Etipikaki iyiook ena kop tenkaraki enkipirta. Emikincho ake duo inkolong' i metupurjukare iyiook meeta ilng' anayio.
2. Eisiligita iyiook e Nkai pee kinchooyo enaisul nikiaata te pooki siaai nagol nikiaas.
3. Kelo Yesu dukuya aasisho tiatua yiook pee kindim aitabai enkisiaayiare nikitum olekoisiaayio (Ing'orai Ilfilipi 2: 13).


Nkilikuanat oo Ndamunot o Nkibirribirrat:

1. Kaa kiaas pee kipuo dukuya aaitobiraki eton kitii ena kop?
2. Amaa, keitiship e Nkai tinikiasishore oltau lemebore eyieunoto nikiaasishore sii oltau lenyuaata ina kata ake etii olkitok? Naa kainyioo?
3. Amaa naaji tiniata esiaai niminyor arashu nimikintukuj, kainyioo ias?
4. Amaa tinikintanyamal olkitok lino pesho anaake, kaa ias?
5. Mbirribirra: Ketii pasa aikata erishata nitijing' a esiaai kake eitu iasisho enkolong nalulung' a anaa enaishiakino?



Olkila ojung'uno - 9

Etii apa olpayian obo otamorua neboita olayiok lenyena okuni. Netonyuaa ele payian aasisho too lchampai te nkishui enye pooki, neiteng'en ilayiok lenyena pee easisho sii ninche te nyuaata. Ore apa nabo o masaa enyena naaisul eata tipat oleng te ninye naa olkila apa oishopito nkolong'i pooki, ore ele kila oishopito netumutate mbat kake keitadamu enauri esiaai apa nagol naasita ebaiki keraisho enye. Ata hoo duo apa te netonyorra ilayiok lenyena pooki, kake etonyorra naa olkikau oleng aitalang ilkulikai ayiok pooki. Ore ake pee etaanu erishata enkeeya oltasat, nedumu nusu oo ropiyani enyena nepik atua inkirakani naatiripaka ninye iwuejitin neetumutate tolkila lenye. Neram nena wuejitin neetumutate tolkila tenkoitoi nemedol hoo oltung'ani obo ajo keisudoro iropiyani. Neisho oltasat olayioni lenye olkila metujung'o, neye ninye.



Neishop olayioni ilo kila otujung'uo too nkuti olong'i, neiteru amenu amu etamorua olkila oleng. Neik olkila ailili tiatua enkaji enye. Ore nabo olong nelotu olchore lenye aparant, nejoki olchore lenye, "Ore taa amu itiika ele kila lino nkolong'i kumok ailili te suntai. Kagira oshiaake aing'oru olkila laishop te siaai. Neaku, nchooki nanu ele oililio te suntai pee aaing'uraki likai taaisere." Nenyorraa olayioni aishooyo olkila otujung'uo te menye amu etumusana neeta oloirerio."

Ore ake pee ebaya olchore lenye ang neton, neiteru ang' eru irameta pee edol tenaa keton eyieu olkila neripi aaitoki. Nemaniki iropiyiani naisudoro tiatua nena wuejitin pooki neerama neshipa oleng, oleng. Neaku olkarsis tenkaraki nena ropiyiani naanoto, neaku nkuti ropiyiani ake etoponayie pee einyang'aki olchore lenye olkila ng'ujuk.

Enkorrok e Nkisoma:

Neijia kitiu iyiook enkumoi oo lairukok taata. Eking'amaa enkishooroto e Nkiyang'et Sinyati, kake ore tenkaraki enimikintaa entii enye emasai etipat tiatua enkishui ang, basi, nikinturraa enjung'ore ang, aa nchere, enkishui oo ntarasi. Ore enkumoi ang taata naa ekimenaa esipata enjung'ore ang e Nkiyang'et anaa Esau otemenayie enenye. Eiputa nkolong'i ang mbaa nemeata tipat neibung'a ndamunot ang nchere, meekure kiaata erishata pee kidamisho tenkipirta enjung'ore ang e Nkiyang'et. Etaa kulie kulati kinturukie tenkishui ang. Mbung'a tukurraki ina niaata, pee metii ake oltung'ani likiwuaparie olkila aashu olmarisian lino le njung'ore!

Tayiolo kulo Kigerot Toltau lino:

Ilhebrania 12:16, *"Niminchosho etumi oltung'ani hoo obo ololoito aashu olemeserem e Nkai anaa Esau, otimira enjung'ore e ikinet enye neinosie endaa enabo kata."* Isoma Enkiterunoto 25:29-34.

Jeremiah 17:10, *"Kajur nanu Olaitoriani indamunot natem oltau, pee aisho pooki tung'ani terisioroto oo nkoitoi enyena te risioroto oo lng'anayio loo nkiaasin enyena."*

Embolunoto 21:7, *"Ore ilo omirisho naa ketum ena jung'ore naa kaaku nanu e Nkai enye neaku ninye enkerai ai."*

Ile Efeso 5:5, *"Entayiolo ena nasipa nchere meetai hoo olololoito aashu oloo loirerioni, aashu oloo ng'uarrat torrok (nkitanyaanyukot taa eomon olotiu neijia), otum hoo enjung'ore ti atua enkitoria e Kristo o ene e Nkai."*

Iroma 8:23-24, *"Neme seuseu ake, kake ore sii ninche iyiook, ooidipa aanoto enkishorunoto e Nkiyang'et naiturukuo te kulie naaponu, nikin chirita sii yiook tiatua ate kiaanyu meitaa e Nkai iyiook inkera enyena, neitabaya elakunoto ang. Amu tele siligi apa eitajewuoki iyiook. Te naa ekidolita entoki nikisiligu, nemeitoki ilo siligi aata tipat. Keisiligu pasa oltung'ani entoki nadolita?"*

Mbaa Oltau:

Enkorrok oo Nkiteng'emat e Tipat:

1. Iltung'ana ake ooas eyieunoto Enkai ootum enjung'ore enye e Nkiyang'et.
2. Meishiaakino pee eishiang'itie oltung'ani "enjung'ore" enye.

Eimaki nikurrakiki:


1. Lelo lewa ake o nkituaak naas eyieunoto e Nkai eishori metujung'o e nkishui oo ntarasi.
2. Keiririkino "enjung'ore ang e Nkiyang'et" pee etum erishata edukuya tiatua enkishui ang.
3. Ketum ake oltung'ani obo o obo ole koisiaayio lenye terisio-roto olkuaak lenye o nkiaasin naasu tiatua osesen lenye.

Nkikilikuanat oo Ndamunot o Nkibirribirrat:


1. Ijo iyie anaata eishori apa Esau metang'amai esipata enjung'ore o mayianat e Isaak? Kainyioo pee aa anaata eishori naa kainyioo pee aa anaata meishori?
2. Kainyioo enjung'ore ang e Nkiyang'et?

3. Inchooyo pasa aikata iyie "esipata enjung'ore ino e Nkiyang'et" miata endamunoto anaa enataasa ele barnoti?
4. Imbirribirra: Inyamalu sa oshi te kulie rishat metaa ore "enjung'ore ino e Nkiyang'et" neliooyu anaa emesipa nemeata tipat?

Enkitojo Olosek - 10



Ore nabo onlong negira enkitojo aloo lo tiatua entim. Nedol oloitiko oirragita tembata enkoitoi. Neiroroki, ore ake pee eidip airoroki nejoki kainyioo doi pee irragita tembata enkoitoi. Newaliki oloitiko ajoki, "Olchore lai, etaa duo kaaya esumash. Ene uni taata ena onlong eitu aagil anya endaa." Nening enkitojo onlg'ur nejoki, "Miureishoyu; Kaalo aing'uraki endaa." Basi, nelo enkitojo aing'uraki oloitiko endaa. Ore ake pee elo enkiti rishata nedol likai oitiko oirragita sii ninye tembata enkoitoi. Neitashe, neikilikuan ajoki kainyioo doi pee irragita tene. Newaliki oloitiko nejoki, "Olchore lai, kamuoi oleng." Neitashe enkitojo adamisho enkiti rishata nejo, "Oh, pole kaaing'urrie. Kaalo aing'uraki olchani." Basi, ina taa pee elo aing'uaa oloitiko liaare, kake mme pee elo aing'uraki olchani. Nepal enalo aing'oru olchani neshukokino oladuoo oitiko ledukuya nejoki, "Inyio tasiaku; Amu anoto endaa ninya. Keirragita ake tembata enkoitoi ketaana oleng, tudumunye tasiooi shomo tara eton eitu edumunye alo." Ina taa pee edumunye oloitiko le dukuya aas anaa enatiaakaki, neinepu oladuoo oitiko omuoi eirrag tembata e nkoitoi. Neshipa oleng oloitiko omuoi pee edol olikai oitiko eitashe airoroki ninye. Basi, ina taa pee eiteru oloitiko oisumash aipidoki oloitiko omuoi aro atem ajo aar metua. Nedol oloitiko omuoi ajo etijing'a enkishui enye batisho, ina taa pee edumu nkejek akuet aisik. Basi, ina taa pee ekuet oloitiko omuoi



aiulokino enkitojo nebuaaki ajoki tenking'asia, "Maagira doi elde oitiko aretu. Kake kaajo aar matua!" Nekueni enkitojo nejo, "Oh, a'a. Iyie doi leitu eyiolou. Ore doi eruata nikiro naa enkoitoi enye nikirorokinyie. Ore ake pee ishuko alo enetii te naduoo wueji nibayie neaku olchore lino tesipata nikiretu." Basi. nening oloitiko omuoi enkitojo neshuko alo ena duo wueji netung'uarie olikai oitiko. Kake ore ake pee emaniki oloitiko oisumash oladuo omuoi neipidoki near metua.

Enkorrok e Nkisoma:

Eikununo Shetani anaa ina kitojo natuuno mang'atisho tiatua ilalashera. Keun oshi ilantera le lejare, enkiba o lom tiatua ilairukok pee etumoki atooro kanisa. Ore te mbuku oo Larishak 16:1-22 naa ekidol nchere ore Samson naa oltung'ani apa olejaju anaa ilo oitiko apa omuoi. Ore tenkaraki etetema Delila inkatitin uni pee eesek Samson neitu etumoki, anaata apa eirrashua empukunoto enkorrok e Delila nelam ninye katukul. Kake eishoo ninye nkisudorot engolon enye naa ore tenkaraki ina nelotu enkibung'ata, o enata e korokoroni o nkeeya enye. Neijia sii eikununo enkoitoi oloitiko omuoi, amu ore ina kata etulusoyie entemata naibiruo oloitiko oisumash pee etem ajo aar metua, neitoki ake aigil te nkae kata nabo anyorraa endamunoto e batisho enkitojo, ore ake pee enyorraa neshuko alo keeya. Keatae taata iloibonok lelejare tiatua kanisa ilaa te meloni oo nkutukie enkilelemare erikoki oltung'ani atua eng'oki nalotu atiu anaa ina naiting'oko oloitiko omuoi. Keishiaakino katukul pee etem oltung'ani aaku kalamas pee etumoki atujurro ndamunot e lelo tung'ana laa ore elalai enkipirta enkishui enye naa pee eipiru ake eoro. Iltung'ana ninche oiteng'enisho nkiteng'emat elejare. Kake ore tenkiting'-oto neidaikieki ninche, naa tinimikiaku sii yiook kalamasi nikindaakino aiko neijia.

Tayiolo Kulo Kigerot To Itau Lino:

Luka: 17:1-2, *"Nejoki Yesu ilooiteng'eni lenyana, 'Meata nchere meponu ntemat enkarrueisho; kake ee kake aiyia ilo laa ninye eimu! Enaikash te neenikini ninye osoit oituutishoreki emurt nenang'akini atua enaiposha, alang teneitapong'oo nabo e kuna kutiti.'"*

Iroma 16:17-18, *"Asai ntae, ilalashera laainei, entodol ake lelo oopiru enchankar oo ngolikinot, earare ina kiteng'enare natuutakaki intae; entaapaash ninche. Amu ore iltung'ana leeijo lelo mme Olaitoriani lang Kristo eisiaaita ninche kake ng'uarrat enye maate, naa nkutukie eitamelon too rorei le nkisisa pee etumoki aatelej lelo oomae."*

Tito 3: 10-11, *"Ore oltung'ani okepari, indipa aikoo ninye enedukuya o eniare, talama. Iyiolo ajo ore oltung'ani oikununo inji netapong'ori naa aing'okoni netudung'oko kewan enkiguana."*

Petero liare 2:1, *"Kake einyeito sii apa iloibonok lelejare tiatua olorere, anaa enayooki sii aainyototo tiatua intae ilaiteng'enak le lejare, ooyau too nkisudorot inkiteng'emat naaiminie neitarruoo, nemiki doi ninye Olaitoriani laa ninye oinyang'ua ninche, neyaki ate enkidaaroto nasieku."*

Tadamu Iarishak 16:1-31 - Enkatini e Samson o Delila.

Mbaa Oltau:

Enkorrok oo Nkiteng'emat e Tipat:

1. Ketii taata enkop ilaiteng'emat kumok lelejare.
2. Taa naa kalamas! Ata tiatua kanisa, keatae "Ilairukok" ooshipakino embatata o erokan oo nkomomi oo lkulikae.

Eimaki Nikurrakiki:

1. Ingila iimaki olosek le Delila. Intagolo ilainining'ok pee meaku ake modook anaa Samson. Ore sii o taata naa ketii iltung'ana, laa ore tenkaraki emeloni oo rorei lenye o lng'ejepa oo puyiapui, naa keidimayu pee erikoki oltung'ani atua eng'oki e keeya.
2. Taa kalamas tenkaraki lelo ooiteng'enisho nkiteng'emat elejare neyau eoro atua kanisa. Eikumok taata iloibonok lelejare!
3. Intisipa kewon ino nchere ore iyie enkorrok ino nimiyau aikata eoro olarrabal atua kanisa nimirikoki oltung'ani atua ng'ok.


Nkikilikuanat oo ndamunot o Nkibirribirrat:

1. Kainyioo dupoto nanoto enkitojo pee eitasur oloitiko omuoi metaari metua?
2. Amaa, keatae sa iltung'ana ootum olekoisiaayio onyaanyukie ele?
3. Kaa pasa inko pee iyiolou ilaiteng'enak lelejare teneaku inotore ninche?
4. Ketii sa olturrur le kanisa liyiolo otoore oinyiala ilaiteng'enak lelejare?
5. Kejo aa e Nkai tenkaraki lelo oorikoki ilkulikai atua ng'ok.
6. **Imbirribirra:** Amaa itaa sa aikata iyie ololejaya anaa Samson terishata enkishui ino?

Olukunku Arruoni - 11

Eti apa oltung'ani obo oata olukunku o lkuoo le kerr tenkaji enye. Ore nabo olong netum empalai naliki nchere kegira olkinki alotu abaiki ninye. Neitodol ilchoreta lenyena ina palai nejoki, "Ore taa paa kegira alotu openy arashu erikito ilkuti tung'ana naa kayieng'aki olukunku. Kake ore ake paa iltung'ana kumok erikito naa kayieng'aki olkuoo le kerr." Hoo naa, kegira ninye olukunku aitashe tembata e nkaji nening nena baa naagira lelo tung'ana aajo.

Neiteru teina kewarie aipotisho to ltoilo sapuk, "Keye taata olkuoo leker, metasioku enkakenya. Keye taata olkuoo leker, metasioku enkakenya." Basi, ina taa pee eng'amaa olkuoo leker awal tesiokinoto naa toltoilo sapuk nejo, "Meyiolo olukunku e Nkai, meyiolo olukunku e Nkai." Ore ake pee eaku dama nelotu osinka aya olukunku tenkaraki olkinki amu eewuo naa ninye ake openy. Neaku olukunku naa otua teina olong.



Enkorrok e Nkisoma:

Ore apa olukunku naa keng'uar pee easayu mbaa torrok teilo le ncholiek enye. Ketii sii taata iltung'ana ooata indamunot naijio ino lukunku. Ata atua kanisa ketii iltung'ana ooata olom. Ore ake pee etum olalashé lang obo arashu etum nkanashara ang enkisisa arashu matejo dupoto, nepali enashipai anaa enaitanapa iyiook e Nkai pee kias, nikinteru aapik ilo tung'ani nkitarruorrot. Nikinteru aainyial enkanyit enye sidai pee kintobir iyiook enaang maate. Mme sidai ina oitai. Eitanapa iyiook e Nkai pee kinyorru olelatia lang (olalashé) anaa enikinyor ate. Eyieunoto sidai pee kintagol nikishetu olikai olikai alang tinikitem aabatat.

Tayiolo Kulo Kigerot Toltau Lino:

Ilsealonike le Dukuya 4:11, *"Eng'oru pee itonini aaitirring'a nigolielie isiaaitin inyi. Niaasishosho too nkaik inyi, anaa enikintanapa intae."*

Ilsealonike le Dukuya 5:11, *"Neaku entagoloto oshuaa olikae olikae naa enteshet olikae olikae anaa ina niaasitata."*

Ndung'eta Erashe 3:29, *"Mintobiraki olelatia ino entorroni ainyial, lelo ootoni kisilig tembata ino."*

Ilgalatia 6:9-10, *"Ore aa isupati kiasita emikidukenya, amu kelotu enkata nikisotisho teneitu kintololong enyuaata ang. Ore enkaraki ina, ore ake irishat pooki nikitum, emaitaasa pooki ng'ae isupati, neisul lelo le nkaji enkirukoto."*

Ilfilipi 2:3-4, *"Emiaas ae bae te nkesha o te nkitokoos. Kake te nkitadounoto e kewon meatai olemeituluso olikai aitalang kewon. Nchoo pooki tentai meaku mbaa enyena ake eing'or kake nchoo sii eing'or inoo ilkulikae."*

Mbaa Oltau:

Enkorrok oo Nkiteng'emat e Tipat:

1. Intagolo neshetu olikai olikai.
2. Emidukenya te asata oo supati.

Eimaki Nikurakiki


1. Ekishipa tenebo ilalashera o nkanashera ang tiatua Yesu nikisininuo o ninche to sina lenye.
2. Kenare nikiwuang'ie olom too lelatia lang.
3. Alang nikiyiewuaki ilalashera lang entorroni kenare niking'or dupoto emayianata enye. Naa kenare sii nikiretu ninche.

Nkikilikuanat oo ndamunot o nkibirribirrat

1. Ainyioo pee eetae enchankar te kanisa?
2. Amaa, iyiolo oltung'ani oyiewuaki olalashenye entorroni
3. Amaa, tena kop ekishukoki oshi ake enashe ilelatia lang te asata oo mbaa supati? Ainyioo naa pee mikishukoki.
4. Kaji inko pee iramat pooki toki ino anaa enaishiakino (1 Sesalonike 4: 11) nintoki sii aramat iyieunot oo lkulikae (Ilfilipi 2: 3- 4)?

5. Imbirribirra – Kaa rishata ibayie ninoto olom to lalashenye oilepunyieki aisis tenkaraki esiai sidai.

Ilchoreta alejak - 12



Ore nabo olong nedumunye olowuaru keru te nkang enye pee elo abaiki intoiwuo enkitok enye. Nelo baikino sidai oleng neshipa olmarei lenkaputi enye oleng tenkaraki baikino enye. Kake keyieu apa ninye olaputani lolo wuaru keru neibalie olowuaru keru enyorrata o eramatara o eretoto enye. Neipot

olowuaru keru ajo "Olbarnoti, nchoo pee eton iyieu nitonini e ntito ai anaa enkitok ino, meata nchere pee eitu kiyaki nkera imiet entito ai. Naa ore ake pee iyau pokira imiet nanya ninche." Entoki apa ena nagol oleng pee eas olowuaru keru, kake ore pee eidip atadamisho terishata naado nenyorraa nerrinyo alo enkang enye. Ore ake pee etaniki enkang enye, nedol oldia shore lenye, etonita te ntonata olchani, netum olowuaru keru endamunoto enkipankata torrano. Nejoki olchore lenye, "Supa, olchore lai," "Kalo taaisere abaiki ntoiwuo enkitok ai. Naamanya ai ang naa kashipa oleng tinikiriamarie amu keedo ena lototo. Keidimayu pasa pee aita encholiek?" Nenyorraa oldia nabo kata, nening'okino pee etumo taaisere te ntonata olchani. Neata oldia nkera imiet kutiti naarisiore nkera olowuaru keru. Ore taaisere, etonita oldia te ntonata olchani arreshu olowuaru keru, nekuet ninye olowuaru keru alo enkaji oldia apurroo nkera enyena, nepik atua olbene. Neshuko akuet alo olchani otii oldia, nejo abaiki olchani eidipa anaura, ina taa pee eitarasaki oldia olbene metanapa. Nening oldia eyieunoto sapuk pee eyiolou entoki natii atua ele bene onapita. Ina taa pee ebol adol entoki natii atua eton enyamal olowuaru keru egrira



aing'orisho too nkulie tokitin. Ore ake pee edol ajo nkera enyena naatii, negoro. Nedamu enkipankata naas tesianoto. Nejoki oldia olowuaru keru, olchore lai atadamua entoki naatorikine tenkaji ai. Nenyorraa olowuaru keru pee eton arreshu oldia. Neipirri oldia ashuko alo ang enye, neshuk nkera enyena pee elo aing'uaa ti ang. Nedumunye nelu adumu nkera olowuaru keru, nepik olbene, neipirri alo enetii olowuaru keru. Nenap oldia olbene tenkoitui pooki, nemeyiolo olowuaru keru enataasa oldia. Ore ake pee ebaya pokira aare enkan, neitaarasa oldia olbene aitarasaki olaputani lolo wuaru keru. Nekueni olowuaru keru nejoki, "Olee kajo nanu, ishipakino ena kishooroto oleng." Nedol enkaputani enye ena kishooroto nerretena pee eiteru aitobir endaa aasishore ena kishooroto etipat. Nepik aji neiteru anang'aki ng'uesi enkima pee eng'as aisui meishunye ilpapit eton eitu eikaraanka.

Ore erishata ake pooki nanang'akini nabo enkima, neishir to ltoilo lolowuaru keru. Netum olowuaru keru eyieunoto pee ejing atua aji adol ajo kainyioo doi nagira aasayu tene, kake eibooyie oldia pee mejing aji. Nejoki, "Meishiaakino doi katukul pee ilo eneyerishore enkaputani ino, neisulaki eyerisho." Nening olowuaru keru enkikoo oldia, kake keloito naake olkiyioi dukuya anaa enanang'akini nkera enkima o meishunye pooki. Ore taa kenya pee eshuko pokira aare aapuo nkang'itie enye, neipirri olowuaru keru alo enkan enye, nedol ajo meekure etii nkera enyena. Ore ake pee eyiolou ajo eeseka oldia ninye, negoro oleng. Neisiligie kewon enye nchere meigil aikata ti obo o ti aare aaku olchore loo ldiein. Ore ebaiki ina olong o taata, ore olowuaru keru oldia naa ilmang'ati.

Enkorrok e Nkisoma:

Eitu enyorru olowuaru keru olelatia enye. Tena ketonyorra apa oldia, anaata eitu epurroo nkera enyena. Ata hoo teneiroro ninche pokira aare neasisho anaa ilchoreta, neton ake ebore pokira aare olosek torrongo o ng'eno olosek. Ata hoo tenemeishiakino neton ake kiaasishore enkoitui naajio ena.

Ebaiki nimikipik ilchoreta lang ilbaa loo seseni arashu ilmareita lenye, kake kipik too lng'ejepa lang, oobore ilosekin torrok o eng'eno olosek, mikiing'ash eitu kinyial enkishui enye o nkanyit enye. Neijia etiu enkiting'oto, mang'atisho terishata apa oo lchoreta, o mbaa torrok nikiiyieu neasayu too lkulikae, kake kesesh aa te yiook easayu te rishata elelo.

Tayiolo Kulo Kigerot Toltau:

Jeremiah 9:7-8, *"Neaku nji ejo Olaitoriani loo lororani: Ng'ura kashol nanu ninche natem ninche, amu kaa ae naas nanu, tenkaraki iltung'ana laainei? Embae esayiet olng'ejep lenye; keiro ninye te lejare; ore tenkutuk enye meatae ake olemeirorie olelatia enye te seriani, kake ore tiatua oltau lenye neitobiraki ninye orreshet."*

Yakobo 2:8, *"Tenintabayaya inkitanapat Olaitoriani anaa enajo isirat, 'Tonyorra olelatia ino anaa kewan,' itaasa esupat."*

Iroma 13:10, *"Meitaas enyorrata olelatia entorrono; enkaraki ina paa enyorrata enkitabaroto oo nkitanapat."*

Indung'eta erashe 22:8, *"Ore ilo oun inemesipa naa keisampu engolikinoto, ore eng'udi e ngoro enye napi naa keish."*

Mbaa Oltau:

Enkorrok oo Nkiteng'emat e Tipat:

1. Kenare nikiyiewuaki isupati ake ile latia ang.
2. Ore ilo oun entorrone netum enyamali.

Eimaki Nikurakiki:

1. Tenesipa aikinyor ilchoreta lang nimikintaas ntorrok.

2. Ore oltung'ani oun enchankar olarrabal netum olekoisiaayio le ntorroni.
3. Meishiaakino pee kiaku isunkuro aitaakuno anaa aikenyor oltung'ani oje kake ore tiatua iltauja naa aikimba nimikiyan-yit.
4. Meiririkino pee kurriny entorroni te ntorroni.

Nkikilikuanat oo ndamunot o Nkibirribirrat:


1. Keata pasa oldia esipata nataasie ina nataasa? Ainyioo paa ee? Ainyioo paa a'a?
2. Kaja pasa eiko Olning'o Musana o Olning'o Ng'ejuk pee epaasha too nkiteng'emat oo nkiimakinot e shoruetisho ang o lkulikae tung'ana? (Ing'orai Indung'eta 24: 17; 25: 21; Mata-yo 5: 43-48.)
3. Kaa ias tinikintame oltung'ani?

4. Imbirribirra: Ketii olchore lino obo tiatua ilchoreta linono limba nimiyanyit? Naa keitishipita e Nkai ina?

Shoruetisho Namoda - 13

Keata apa olowuaru keru lolosek eyieunoto sapuk oleng pee eitobir shoruetisho o e ntarakueta, pee etumoki ainosa tenkolong nabo. Ore nabo olong neitoomon entarakueta pee eiriamari entim aapuo aar ing'uesi. Nenyorraa entarakueta, nerik pokira are ilmareita lenye neya irresheta entim pee eitodol enkop shoruetisho enye ng'ujuk. Ore etulusoitie nkolong'i uni eidipa aateen irresheta, nepuo aaleenoo tenaa keibung'a toki. Kake eitu eibung orreshet le ntarakueta aitoki, kake eibung'a ninye orreshet lolowuaru keru entarakueta. Ore teina teipa neitoomon olowuaru keru olchore lenye pee elotu atum erubata entarakueta nanya. Nejoki olowuaru keru entarakueta, "Ore ake pee aidip atara intarakueta pooki te ntim naa ina kata iyiolou esipata enkipirta ajo kainyioo pee kietuo entim." Neaku, ore pooki rishata napuo entim, naa keinepu ake ninye entarakueta irresheta lenyena eitu eibung aitoki, naa keibung ake ninye olowuaru keru intarakueta anaake. Eibung'a olchore lenye nkumok oleng, naatipika entarakueta wasiwasi enkuretisho natejo, keton hoo doi kiaata eseriani nanu olmarei lai.

Ore nabo olong nelu entarakueta aleenoo irresheta lenyena nedol olowuaru keru eirura tembata e nkoitoi. Neing'asia neiputukuny nejo kaja sa doi eiko pee easayu ena. Esipa, kemunyak. Nedumu eremet enye nerem olowuaru keru metua. Ore tenkaraki enchipai sapuk, nedumu empopok anap aya olupul lenye, neranyaa osinkolio eloito tenkoitoi. Ore ake pee ening'u olowuaru keru entarakueta, neipirri alo anang'are pee elo ayiolou ajo kainyioo nataase. Ore tenakata neidipa ataa erishata enye naitoki sii ninye



aing'asia. Amu, ore anaa pee edol entarakuet enapita empopok olowuaru keru neirut metoyio enkutuk. Ore teina teipa neipot entarakuet olowuaru keru nejoki, "Pee ilotu taa adake teipa aya erubata ele owuaru keru, amu ninye o ledukuya laitera aibung. Hoo neme kumok ilowuarak keru tena shoto enkop, metaa majo doi kaya erishata naado eitu aar pooki aishu. Pee itumoki taa atayiolo esipata enkipirta ajo kainyioo doi pee kietuo entim." Newaliki olowuaru keru ajoki, "Olchore lai, meekure kiruba. Kamuoi nanu oleng, neaku kayieu nalo endapash ayeng'iyeng'a." Neiturrur olowuaru keru olmarei lenye teina kewarie neisik aapuo, neluarie entarakuet te ntim. Etasioko olowuaru keru ayiolou ina natayiolo entarakuet maa kutiti; keishiaakino pee eng'ar ilchoreta empukunoto nabo.

Enkorrok e Nkisoma:

Keata Ilkorintio liare 6:14 enkioko te yiook, "*Emishulare aaku nabo o lelo lemeiruk. Ai tiji eshula isupati o ntorrok? Kaa shula eeta ewang'an o enaimin?*" Ore te dukuya neilelemaki neitomodii enkiias eyieunoto e shoruetisho olowuaru keru. Ebaiki nenoto entarakuet oloti wuasa anaa pee eipoti aajo olchore lolowuaru keru magilani. Ore tenkoitoo naajio ena, naa ekiiyieu nkatitin kumok nedoli iyiook kira ilchoreta lelelo tung'ana ooilepieki, karsisi, arashu yiolot. Tenkoitoo namunyak etoduaa entarakuet esipata eton eitu ear olowuaru keru metua. Eirashua nchere, eewuo apa olowuaru keru atem ninye pee eitaas entorrono. Eidima entarakuet airisha orreshet lolowuaru keru pee eirish ninye. Ore te yiolounoto enkitashoto oo sipat o nkitarruorrot, naa ekiindim ake sii yiook aatapaashare eiyiataroto nayiatakini iyiook atua ntemat o ng'ok. Keishiaakino katukul pee kiaata sii yiook eyieunoto enkitashoto nikianyie ntemat pee kinchu te nkishui ang tenkipirta oo nkipankat e Nkai, ata tinikitum intemat oo mpukunot kumok.

Tayiolo Kulo Kigerot Toltau Lino:

Matayo 4:1-4, *"Ore ina kata neilepie e Nkiyang'et Sinyati Yesu arik ong'ata metetema shetani. Ore pee eidip atupukoi nkolong'i artam dama o kewarie. Nelotu olatemani nejoki, 'Tena ira iyie e Nkerai e Nkai, tiaaki kulo soito metaa imukateni.' Kake newaliki ajoki, 'Etisiraki, Meishuyie oltung'ani emukate ake, kake eishuyie pooki rorei opukunye enkutuk e Nkai.'"*

Ilkorintio le dukuya 4: 5, *"Neaku emipuny intae aadung'oki likae enkiguana eng'or enkata, o meeu Olaitoriani. Ninye olotu aitupuku nkisudorot e naimin meetu enewang, nebolu iyieunot oo Itauja loo ltung'ana. Te ina kata kenya etum pooki tung'ani enkisisa naing'uaa e Nkai."*

Indung'eta Erashe 26:24-26, *"Ore ilo oisunkur te nkiba neiro to yieta irorei, kake eisudoo aibok elejare toltau lenye; teneiro too rorei le mpiris miruk ninye, amu etii oltau lenye olminong katitin naapishana. Ore hoo netem aitoipoo enkiba enye te nkeleekisho, ekeibalunyieki ntorrok enyena tolturrur."*

Indung'eta Erashe 4:14-15, *"Mijing enkoitoi oo larruok nimiim ina oitoi e lelo tung'ana torrok. Tapaasha ninye, milo aim ine; imbelekenyunye tung'uai milo agiroo."*

Olkerempe le Nkai 1:1, *"Emayiana ilo tung'ani lemelo enkiguana oo ltung'ana torrok, nemeitasho te nkoitoi oo laing'okok, nemeton tolturrur le lelo loo lderrat torrok."*

Mbaa Oltau:

Enkorrok oo Nkiteng'emat e tipat:

1. Taa kalamas te ngelunoto oo ilchoreta linono.
2. Mincho kilej karsisisho, o e ngolon enkop.

Eimaki Nikurrakiki:

1. Keata tipat tenemetem olairukoni aairiamari olemeiruk, amu meibung'akino kuna oitoi pokira are.
2. Kemayian e Nkai oltung'ani obik too sipat neany ilosekin torrok looltung'ana.
3. Tetema nkoitoo oltung'ani eton eitu inyorraa shoruetisho enye.
4. Minyorraa mikiteleja engolon, enkitoo aashu imali oltung'ani.

Nkikilikuanat oo Ndamunot o Nkibirribirrat:

1. Kaa rishata ibayie irisha ntemat idamu isirat ooje le Bibilia?
2. Kaji kinko pee kintanyaanyuk aashu kintapaash shoruetisho entarakuwet olowuaru keru o shoruetisho oo lairukok o leme ilairukok?
3. Kainyioo paa ore nkatitin kumok nikintoduaaya olkep too lkarsisi aashu too ltung'ana le nkitoo?
4. Imbirribirra: Intoduaaya oshi olkep? Kembae ena nasipa teniaas? Ainyioo paa ee / Ainyioo paa a'a?
5. Imbirribirra: Amaa ekiteleja pasa aikata "olchore" lino anaa entarakuwet nateleja olowuaru keru? Kainyioo itaasa teina lejata?

(**Esipata:** Kesipa kenare nikirrip ate pee mikiriamari o ileitu eiruk tiatua imbaa torrok. Kake ore pee isipu enkishui e Yesu nidol ajo ketii ninye tenebo ilaing'okok inkatitin kumok pee eitodol ninche shoruetisho enye neliki ninche enaipirta enkoitoo empuaan. Neaku, matonyok pee kiasishore eng'eno tenaipirta ina bae amu ketii iltung'ana laa meyieu nanya endaa tenebo ileitu eiruk tenkaraki kejo meishiakino amu mening'o ewang'an o enaimin. Kake kelelek pee ejing olwuasa torrono tiatua ina bae. Kenare niking'oru enkoitoo pee kitii tenebo ileitu eiruk inkatitin kumok pee king'arie ninche ilomon supati nedol sii ninche enkishui ang tiatua Yesu. Kake kenare sii nikirrip ate pee mikias eng'oki kiasita ina. Tisipu 1 Ilkorintio 5: 9-11; 9: 19-23.)

Enkisiaul Ekeeya - 14

Etushukunye ai onlong enkerai kewarie ang eimutie eing'uaa esafari. Ore ake pee etaaniki enkang nebuak ayietu oleng, "Entasaruaki, etaa kejo pee aibung olng'atuny laatemita ajo anya." Nedomunye te siokinoto ntoiwuo olchoreta eata ilalema o remeta too nkaik enye. Kake,



aitu edol olng'atuny, neiteru enkerai akueniyie ninche. Nejo, "Kajo ake duo pee adol tenaa ekinyorrinyorro tesipata. Natoduua taata ajo ekinyorrinyorro natishipe oleng." Negorokino ntoiwuo enyena oleng neikok pee meigil ake aas embae najjio ina too nkolong'i, kake etanya ening ninche. Ore pee elusoo ewiki nabo, neitoki ashukunye eing'uaa ai safari nelotu kewarie neiteru abuak ayietu anaa enapake nataasa. Nekueta ntoiwuo olchoreta lenye pee epuo aaretu ninye, kake ore pee elau olng'atuny, neitoki aagorokino oleng.

Ore tenkolong nabayie, neitoki enkayioni alotu kewarie te safari euni. Ore tena onlong, naa kesipa ketii olng'atuny oitashe tembata e nkoitoi, orreshito enkayioni pee enya. Neipot ntoiwuo enyena tenkuretisho sapuk o tesipata, kake ooi ninye ina kerai nemening'isho. Meatai ninye oltung'ani obo otupukuo aretu ninye, nanya olng'atuny nemut.

Enkorrok e Nkisoma:

Etua ena kerai tenkaraki elejare enye. Ata hoo te netoning'o ntoiwuo olkiyioi lenye pee eretu, kake eitu naa eretu amu kejo kenoshiaaki kisiaul enkerai. Ore tenkaraki enatamoo elej intoiwuo enyena, neiken ntoiwuo nkiyiaa enye pee meitoki aaning oltoilo lenye tenkaraki olkuaak lenye lelejare. Neaku,

tenaa ekiiyieu neiruk iltung'ana iyiook naa meishiakino tinikipuo dukuya aalejisho. Neaku ena ayioni olola o enkurruna too ntoiwuo enyena. Ore tenkaraki enatalaikinote aatarerio ninye to lkuaak lenkanyit anaa pee eiteru ayietu ajo "Olng'atuny" nerikoki ina keeya. Enkiti tiili erubata olng'ejep kake keidim aitarruoi neinyial ilchoreta, nkang'itie o Imareita. Eisiligita iyiook e Nkai pee kinchu enkishui nemeeta ileyiat nikiasishore ilng'ejepa lang too nkirorot naasipa nikishetunye enkarna enye.

Tayiolo Kulo Kigerot To Ltau Lino:

Ndung'eta Erashe 19:5, *"Ore olchakeni le mesipa nemelo eitu eitamei, naa ore ilo oiro elejare nemeilanyisho aisik."*

Ndung'eta Erashe 19:18, *"Intamio tuutai e nkerai ino eeatai osiligi; mincho oltau lino ejing errorroto enye."*

Ndung'eta Erashe: 21:23, *"Ore ilo oiken enkutuk enye neibooyo olng'ejep lenye, neitapaash kewan enyamali."*

Ndung'eta Erashe 17:25, *"Ore olayioni omoda naa osomit te menye, naa emion nadua te ina kitok natoiwuo ninye."*

Olkerempe le Nkai 15:1-3, *"Iyie Olaitoriani, kaing'ae olo aton to lng'obor lino? Kaing'ae olo amany ilo doinyio lino sinyati? Ilo olo meata entioto, neas isupati, neuro esipata to ltau lenye."*

Matayo 12:36, *"Ajoki naa ntae, ore pooki rorei lemeata tipat oiro iltung'ana, eikenu kenya ake te nkolong enkiguana."*

Mbaa Oltau:

Enkorrok oo Nkiteng'emat e Tipat:

1. Meitoki iltung'ana aaisilig iyiook tinikilejisho.
2. Keiririkino iyiook ntoiwuo pee kirerioo nkera ang too sipat.

Eimaki Nikurrakiki:

1. Keiba e Nkai elejare pooki. Meeta enkiti lejare empaashata o e lejare sapuk. Keipirta esiaai ang kira ntoiwuo pee kirerioo nkera ang too mpong'ot enye.
2. Keisilig iyiook e Nkai pee kiro isipat pooki kata, nikirrip nkirorot ang.

Nkikilikuanat o nkibirribirrat:

1. Eitorrono pasa te nelejishoi? Eitorrono sa anaa iloikop?
Ainyioo paa torrono? Aashu ainyioo pee mme torrono?
2. Kaja eikuna ena ayioni pee etipika ng'otonye emion?
3. Keishiaakino sa niro enkiti lejare nemeitarru arashu naretu oltung'ani te nkulat naje, enaa nusu enkiroroto nasipa?
4. Mbirribirra: Kaa rishata ibayie eitu intoki airo esipata?
Kainyioo pee itaasa ina?

Orreshet - 15

Ore te nkakenya pooki naa keputunye oshiaake oloti ng'atuny eputu enkorui o lukunku otaaniki te latia. Ore te nkaraki naa olkuaak oshiaake lo lng'atuny pee enya motonyi o ng'uesi kutiti, nedung ajo kenya ele lukunku. Kake eitu eidim ainosa, amu keure ninye tenkaraki enkorui enye. Ore taaisere te nkakenya o te kulie rishat ake endama naa kening ake ele ng'atuny oti olukunku ebuak toltoilo le nkarrueisho sapuk.



Ore nabo olong nedung nejo, kalo taata aparan ele lukunku. Nelo, ore ake pee etaaniki neitashe ang'as ajurru olukunku enaikununo nedol ajo keata nkonyek naado engoro, olarrabal, negol sii, o ltoilo le nara. Neikilikuan kewan nchere, kainyioo doi pee eeta olukunku enkima nayupuyup tenchumata elukunya enye? Ina taa pee eureishoyu neshuko alo ang eisanuuo amu keyieu duo nanya ele lukunku. Neitoki atum ai damunoto tiaai olong. Nedol ajo aisidai entito enye, ketilisho. Neitanap ninye meshomo aitoduaya kewan tedukuya olukunku, naa shomo ewueji neibala nikidolie; keata apa olong'atuny osiligi nchere keidimayu pee etum olukunku eyieunoto pee eya entito enye aitaan enkitok enye.



Nejoki olong'atuny entito enye pee elo, paa ore ina kata pee eshukunye entito nelotu aliki ninye enataase. Neas entito anaa enaitanapa menye, nedumunye alo. Ore ake pee ebaya nelo aloolo aibalie kewan tedukuya olukunku. Netaaniki olukunku egiroro, ena nabo ake etoduaa olukunku neipotu nejoki amaa inyorraa pee iyaku enkitok ai. Newaliki elipong olong'atuny nejoki, "*Kanyorraa pi, kake keishiaakino pee ashuko alo aliki mpapa kuna pooki. Ore taaisere naalotu aliki indamunot enyena.*" Neshuko entito alo

enetii menye nejoki aatiaka olukunku kayieu naitaa enkitok ai. Newaliki menye ajoki "Tushukoyu shomo tiaaki kanyorraa kake, keishiaakino pee king'as aatoni aaimaki tenguton, paa ore taaisere, neishiaakino nilo enkaji olukunku ajurru oleng enaikununo. Tujurro tenaa kepi ilala lenyana niyiolou empukunoto oo loisotok lenyana. Tayiolo sii enaiko pee eishu enkima te nchumata elukunya enye nemepej. Ore pee ekenyu nejoki entito olukunku etonyorrayie papa lai pee kiyam kake etoomonuo pee kiimaki taaisere mbaa pooki tenguton. Neshipa olukunku neiken nkonyek enyena neirrag aiteleiki elukunya enye nkupesir entito olng'atuny. Neitaakuno entito ilashe egira aing'oru to sesen lolukunku, naa ore easita ina neirrapirrap enkopiya nado natii elukunya olukunku neirrashu ajo mme enkima natii elukunya. Nedol ajo eikununo ake sii ninye olukunku anaa nkulie motonyi ake pooki. Ore pee errinyo alo ang nejoki mpapa lenye, *"Mpapa, meata doi olukunku inareta ata hoo ninye nabo. Ore elukunya enye metii enkima, enkopiya ake. Meata ilala nemeata iloistok."* Ore ake pee ekenyu nedumunye olng'atuny oti alo aar olukunku meata enyamali. Ore o taata neton eing'oru olng'atuny oti kulie lukunkuni aar kake keisudoo ate too nkajijik oo ltung'ana.

Enkorrok e Nkisoma:

Ore te yie o te nanu naa Shetani olng'atuny kiti. Mme sidain iyieunot enyena te yiook. Keyieu negor enkirowuaj oo nkiyang'eta ang. Etejo Petero nchere emanimanaa Shetani anaa olng'atuny oikurrukurr. (Petero le dukuya 5: 8, 9) Eleenoo Shetani ilairukok dama o kewarie adol tenaa keton emanya e Nkiyang'et e Nkai atua ninche aashu emeekure.

Ore anaa enatujurro olng'atuny neyiolou olukunku neitu eya erishata naado eitu eirrashu enchalan oo ndamunot enyena o nareta nemeeta pee erripie kewan. Eing'orita iyiook Shetani nerretena tenkidimata enye pooki pee erasaki enetii enchalan o ndamunot ang. Eing'en Shetani anaa Olasurai. Keishiaakino pee eigany Enkiyang'et Sinyati iltauja lang pee metum ake Shetani

erishata. Etoomonuo ninye olukunku enyamali. Etorikoko ninye eng'uarrata enkomom sidai atua entemata. Ore enkiborra oo nkonyek enyena naiborrie te lepong olng'atuny netipika ninye atua orreshet. Ore pee eiputakino ng'ok neiting'oki keeya.

Tayiolo Kulo Kigerot To Itau Lino:

Ilkorintio li are 6:14, *"Emishulare aaku nabo olelo lemeiruk."*

Ndung'eta Erashe 6:27-28, *"Keidim olee atanapa enkima too lgoo lenye, nemepejoo inkilani enyena? Anaa keidim oltung'ani ashomo aitunyoinkuk naaishu, aimenya ndapi enyena enkima?"*

Yakobo 1: 14-15, *"Kake etemi pooki tung'ani, tenkaraki eng'uarrata enye torrongo; neyietaa aitalamaa neitasur. Ore pee eidip ina ng'uarrata anoto intona neiu ing'ok. Ore pee ebaya ng'ok neiu keeya."*

Ile Efeso 6:13, *"Ore enkaraki ina, entudumu iruparen pooki e Nkai pee indimidimi ntae aairishisho te ina olong torrongo, ore indipa ataasa pooki, nintasheshe."*

Isoma Ilarishak 16:1-22 Isoma sii ninye enkatini e Samson o Delila.

Mbaa oltau:

Enkorrok oo Nkiteng'emat e Tipat:

1. Inchololoyu irishat pooki mbooi Shetani
2. Emishulare aaku nabo o lelo lemeiruk (2 Ilkorintio 6: 14).

Eimaki nikurrakiki:

1. Ore enkipirta sapuk e Shetani te nkishui naa pee emut

- Ilairukok. Kenarikino pee kirripisho. Eishoo iyiook e Nkai inareta erripore.
2. Tenikinguranie enkima nepej iyiook. Mikisiligu ake aajo pee kias ntorrok nimikitung ewalata enkitamioto. Meidimayu pee kinguranie enkima amu kepej iyiook. Mikisiligu pee kias ntorrok nimikitung ewalata enkitamioto.
 3. Ore nabo kata pee eaku eitukuoki iltauja lang too ng'ok nemeeta nchere pee eitu eiput e Nkiyang'et Sinyati pee meitoki Shetani atum erishata napurrokino.
 4. Meyieu enkiyama nedalareki. Ore enchilunoto enchoruet neidimayu paa embae e are naata tipat oleng nimut ajo ias. Entoki etipat oleng te neibung'i neyanyiti enkitanapata e Nkai.

Nkikilikuanat o Nkibirribirrat:

1. Kainyoo ejo Bibilia te naishiaakino niyam o nemeishiaakino?
2. Ijo pasa keishiaakino pee eyam olukunku elipong olng'atuny?
3. Amaa apa te naa eiyie Samson anaata enyaanyuk enkias ino o e ne Samson natoomono Delila. Amu nyoo, Ainyioo paa a'a.
4. Mbalunyie tipat e Ndung'et Erashe 6:20, "*Enkerai ai, imbung'a inkitanapat e papaai lino, niming'uaa enkiteng'-enare e yieyioo lino.*"
5. Mbirribirra: Ketii sa aikata erishata e nkishui ino nikitrikoko eng'uarrata ino atua ng'ok?

(Esipata: Tisipu sii Galatia 6: 7-8 pee ejo, "*Emilej ate: mederrieki Enkai. Amu inaaun oltung'ani elo ake sii aisampu. Ore ilo ounoki enkulupuoni oe nkewan o sesen nelu aisampu teina kewan o sesen erruoroto; ore olounoki enkulupuoni Enkiyang'et nelu aisampu te Nkiyang'et nkishui oo ntarasi.*" Tisipu sii 1 Petero 5: 8-9, "*Enterretenata entashololoto. Amu emanimanaa olmang'atinta linyi, oikurrukuru eing'oru olonya. Erisha ninye te nkirukoto nauno iyiololo aajo osina laaijo ele eimaitie ilalashera linyi te nkop pooki.*")

Enkiti Lejare - 16

Etii apa olpayian o e ntomononi enye, netoni tenebo te seriani o entito enye naata ilarin tomon aare. Toning'o sii iyie enkatinini enataasa ena tito pee einyial olning'o le seriani lo lpayiani o enkitok enye. Ore nabo olong neomon enkitok olpayian lenye elakunoto pee elo enkang enye abaiki ntoiwuo enyena. Neisho olpayian lenye elakunoto kake, etiaaka entito pee eton tenebo ninye. Ore nabo olong nelo olpayian entim ang'or ing'uesi netum ilkuti osikin, kake eitu eitoki atum ai toki. Ore pee eaku teipa nenang'aki pooki enkima, ilbitiko o pooki toki. Ore ake pee edol entito enaikoni ilosikin teneyieri neing'asia oleng o metala embae najo. Neiyier papai lenye ilosikin nanya eoto. Ore ake pee eshukunye ng'otonye te mbaikinoto oo ntoiwuo enyena, nelotu etiooyo olpayian te ntim eshomo ang'or ing'uesi. Nejoki entito ng'otonye, *"Mama, ore ina olong apa nishomo nelo mpapa entim near eng'ues. Naa, aisidain nkiri eina ng'ues amu kepir oleng."* Ina bae ake etoning'o enkitok neiteru aing'-oling'ol enkaji aing'uraa pooki wueji adol tenaa ketii erubata enye. Keyiolo ake ajo kenyor olpayian lenye metaa ore ake pee ear eng'ues, nemeikenaa ajo kaa pukunoto eng'ues ina, keirragie ake erubata enkitok enye.

Ore tenkiting'oto, nepalari amu eitu ninye etum oldung'oti paa aikiti nejo te makewan enye, *"Meekure aaishiaakino naishu amu ore olpayian oshi lanyor nemeekure aanyor."* Ina taa pee edumu ake olgosoi nejing aji agor kewan. Ore teina rishata ake, nelotu olpayian nejing aji. Nedol ajo etushukunye enkitok enye ang neshipa oleng. Neipot enkerai neikilikuanishore ajoki,



"Koree mama ino?" Newaliki enkerai ajoki, "Etii atua aji." Nejing atua olgilata lenkaji nedol ajo etataanikia enkitok enye keeya. Nedung nabo kata olgosoi nesaru enkitok eton eishu. Ore ake pee eshukokino enkitok eng'eno neikilikuan olpayian lenye ajoki, "Kainyioo, enchoruet ai, pee itejo agor kewan?" Newaliki enkitok enye ajoki, "Ore aiteru enkolong nikiyamate neitu aikata kisudorie aitoki. King'ar oshiaake pooki toki. Ore naa tenakata, ena enkolong edukuya eitu kintaany oldung'oti le nkiring'o eng'ues nitara matii. Metaa, atoduaa naa ajo enaikash pee aye alang tenaishu ake duoo neija." Neipirri nabo kata olpayian alo engumoto nanang'akini imauti asotu ilbitiko loo loosiki pee eyau aitodol enkitok enye. Nejoki, "Ena doi eng'ues natara anaa pee ilo. Kaja aiko pee aaitaany erubata." Neikilikuan enkitok enye entito nejoki, "Kena doi eng'ues ninosa?" Ore ake pee ewal entito ajo ee neipidoki enkitok olpayian lenye aitamuat inkaik neshipa oleng tenebo.

Enkorrok e Nkisoma:

Ore tena atini, netonyorrayie enkitok enkitang'oroto olpayian lenye eitu eikilikuanisho aashu eiparu esipata. Etudung'o ake nabo kata enaas eitu eng'as atem ayiolou esipata. Metaa, tadamu taa nchere etomitikio yiook ororei le Nkai ening'unoto oo nkitang'orot naagilunore olairukoni (nemeikenu ajo kaing'ae ninye) tenkutuk olchakeni obo ake.

Ore ilkumok lang taata nikinyaanyukie ena kitok. Ore ake pee kining oloti marenke arashu ilomon oitamanaa iltung'ana oipirta yiook, nikisioki aagoro nikiaas embae emodai eton eitu kijurru esipata. Keeta sii tipat oleng inchere tinikingil embae nikitoning'o nenare nikiuloki esipata nimikiponaa ilomon ootejoki. Nepal enkitok enalo enetii olpayian lenye tenkaraki enyamali pee eimaki pokira, anaa enautuno te mbuku e Matayo, neitaa ninye olbae sapuk. Etarruoyie olbae enatoponari aaku emion sapuk oleng, enaidimie enkitok metapalari katukul neitabaiki erishata nagorie kewan enye. Mme ena enkipirta aashu eyieunoto e Nkai.

Tayiolo Kulo Kigerot To Itau Lino:

Ilawi 19:16, *"Milo iyie idie o idie anaa olaitang'oroni tiatua iltung'ana linono."*

Matayo 18:15-16, *"Tinikinyial olalashé lino, shomo toliki enikinyalie aa ntae pokira aare; naa tinikining inoto olalashé lino. Naa teneitu kining, torikoki likai tung'ani obo aashu aare, pee esipuni pooki bae too nkutukie oo lchakenini oare aashu okuni."*

Enkigilata oo Nkitanapat 19:15, *"Meidip olchakeni obo to ltung'ani le ntorroni ake ninye pooki, aashu tiaé ake ninye kitapong'oto naitapong'o ninye. Too lchakenini oare ake aashu okuni eidimi aaitisipa endung'oto enkiguana."*

Olaikooni 7:9, *"Migoro asioki amu ore engoro neirrag too lgoo loo lmoda."*

Olaikooni 10:13-14, *"Ore enkiterunoto oo rorei le nkutuk enye naa emodai, naa ore enkiting'oto enkiroto enye naa olkuenyi torrono. Eponaa olmodai irorei oleng."*

Mbaa Oltau:

Enkorrok oo Nkiteng'emat e Tipat:

1. Te nikinyial oltung'ani, tetema ntobira tenkoitói o sotua.
2. Tapaasha olmarenke aashu irorei le modai.

Eimaki nikurrakiki:

1. Ore irorei le modai o sipat oo monko naa keidimayu pee eyau enyamali sapuk.
2. Ore enkitang'oroto nagilunore oltung'ani naa pee eitisipi too lchakenini o aare aashu okuni.

3. Misioki akuetiki amut embae tenining olmarenke, tang'asing'oru esipata tiatua ilo marenke.
4. Ore pee kinyial oltung'ani, shomo enetii ninye pee itemiteme aaimaki tosotua.

Nkikilikuanat oo Ndamunot o Nkibirribirrat:

1. Amaa tinining ai olong olchore lino ejoito embae torrongo nikipirta. Kaa ias?
2. Amaa teneas oltung'ani obo enkitang'oroto nagilunore olupayan le sirit otii kanisa kaa easi?
3. Kaji eiko pee eidimi aatapaashare ina nyamali naipirta ina kitok o lpayian lenye tena atini?

4. Imbirribirra: Ketii pasa oltung'ani likinyiala iyie neitu eitutumi intae tosotua? Naa kaji inko pee intobir osotua?

Kelejisho Nkonyek - 17

Etii apa olbarnoti obo otonyorra entito sidai oleng nejoki pee eyam. Ore hoo duoo neme olairukoni le Kristo olbarnoti, netonyorrakita ntoiwuo aaisho ninche elakunoto pee eyama nening'okinoi masaa enkaputi. Ore te rreten osirua, nejo ng'otonye kaitobir endaa sidai oleng oo nkiri elukunku o sukumawiki aitobiraki olaputani lai le idia olong.

Ore aa ina easita, nelotu olomoni oloito te kutukaji enkaji enye aomonu enkare naok tenchorro olmarei. Netum olng'ur tenkaraki ele tung'ani, neisho metaa meekure aa enkare enye ake eok, kake eitoomono sii pee eaku tenebo ninche te misa endaa. Netum olaputani lenye olom sapuk oleng. Ore ake pee eaku keku endaa, nejoki enkitok kewan enye, "*Kayieu nanya olaputani lai nkiri elukunku nanya olomoni sukumawiki.*" Basi, neing'oru embakuli sidai oleng napik sukumawiki nepik nkiri elukunku enkiti moti musana nerogonya nepising pokira are. Nepik embakuli o ina kiti moti musana emisa neitoomon pokira aare pee etoni. Nejoki olomoni, "*ematoomon,*" neiteru enkomono. Ore eomonito nedol olaputani embakuli sidai nedumu apik enchoto enye nepik enkiti moti musana enchoto olomoni. Ore ake pee eidipi enkomono, nebol olaputani embakuli sidai nedol ajo sukumawiki naatii neisininuo oleng, oleng. Kake ore ninye olomoni nenoto erubata sidai enkiring'o elukunku tenkiti moti musana neshipa oleng, oleng.

Enkorrok e Nkisoma:

Ore nkatitin kumok naa ekinyorraa oriong oltung'ani eton eitu kiyiolou natii atua ninye te sipata. Kesesh kijing orreshet aaiguanare iltung'ana too nalioo ti oriong ake. Ore oltung'ani sidai, neishopo aitobiraki naa ekisioki aaisho ninye enkanyit. Ore nkatitin kumok naa kesesh etum olkarsis enkanyit sapuk o enkisisa too ltung'ana ata hoo tenemeeta olkuaak sidai neiputa ing'ok.

Eikoo e Nkai Samuel pee eaku kalamas ina kata elo agelu olkinki. Etitila Samuel enkadoro olkitashei o e sidano oo layiok le Jesse, kake etasioko e Nkai autaki ninye nchere meing'or Enkai oltung'ani te sidano e oriong ake nemeing'or embarta te ngolon enye. Lelo oonyor e Nkai eshipakino ninye. Iltauja lenye eing'or Enkai. Tadamu nchere –mme ina nakus osesen naata tipat kake enkuso e aisho e atua oltung'ani.

Tayiolo Kulo Kigerot To Ltau Lino:

Samuel le Dukuya 16:7, *"Amu meing'or Olaitoriani anaa enaing'or tung'ani eing'or tung'ani enaikununo oriong, kake oltau eing'or Olaitoriani."*

Olkerempe le Nkai 147:10-11, *"Ore enchipai enye neme engolon embarta, neme nkejek e tung'ana eng'idare; kake lelo ooure ninye eshipakino Olaitoriani, lelo oisilig enyorrata enye nauno."*

Matayo 23:27-28, *"Ee kake ayia! Ilasirak Olfarisayo, intae isunkuro! Amu itiuu intae anaa nkuraren naaelieki enturoto meiborra, nedoli anaa aisidain ti oriong kake ore atua eiputa iloik loo lmeneng'a o loirerioni pooki. Naa neijia sii itiuu intae, edoli intae ti oriong aaijio irara supati kake ore ti atua, nebore esunkureisho o enkarruoisho."*

Ilaiguanak le Dukuya 8:39, *"...nincho ake pooki tung'ani terisoroto oo nkoitoi enyena pooki, (amu iyie ake, iyie ake, openy oyiolo iltauja too nkera pooki e tung'ani)."*

Intepen e Dukuya 28:9, *"...Amu kejur Olaitoriani iltauja pooki, neyiolo pooki kitobirat o e ndamunoto..."*

Mbaa Oltau:

Enkorrok oo Nkiteng'emat e Tipat:

1. Minguanare oltung'ani too naalioo ti oriong.
2. Keyiolo e Nkai nkitobirat o ndamunot naaisudoro tiatua iyiook pooki.


Eimaki Nikurrakiki:

1. Meishiaakino pee kinguenare oltung'ani too naalioo tioriong enye aa karsisisho enye aashu metii karsisisho. Enatii atua naata enkipirta aisul.
2. Keiririkino naa ore ilarikok le sirit neyiolou oleng shoruetisho esipata enye o Enkai. Neyiolou ninche enkorrok enye eatua alang teneitaakuno ake ti oriong anaa iltung'ana supati te dukuya olelatia lenye. Keiba Enkai sunkureisho.
3. Keyiolo e Nkai iltauja loo ltung'ana o ndamunot naaisudoro te pooki toki nikiaas. Tena aitorrok iyiook ndamunot, nimitum mayianat e Nkai. (Ilkorintio le dukuya 13:1-3).

Nkikilikuanat oo Ndamunot o Nkibirribirrat:

1. Ketii sa ilarikok le kanisa e taata liyiolo oonyaanyukie Ifarisayo oomaka Yesu?
2. Kainyioo naasayu tenkoitoo naata ilarikok torrok le Kanisa too lmempai le sirit? Neasayu nyoo te lelo lemeata enkirukoto?
3. Ining'ito pasa iyie ajo ore tiatua nkanisani kumok netetemaki iltung'ana pee eas anaa enataasa Samuel – pee edol inaalioo ti oriong oltung'ani alang enajurru nena naatii atua?
4. Kaa ias tenkipirta ena pukunoto tene mutu aa ketii kanisa nirayie olmempai?


5. **Imbiribirra:** Amaa intarruoyie pasa aikata aitaakuno ira aitoki nabo hoo nining'ito ajo mme neijia inkununo tiatua oltau lino? Itadamua aomonu empalakinoto eina kitarruoroto?



Keyaisho Enkurruna - 18

Etii apa enkitok olupayian, netamorutua pokira, nebiki tenkishui osina amu etamorutua oleng ene meekure eidim aatuturoki ate enkurma. Neishunye ninche osiligi lenkishui katukul o metataaniki enkeeya esumash. Neiteru enkitok adamisho o metiaaki olupayian lenye, *"Ng'ura, etaa kejo pee kiye. Maing'oru enikiaas tenkaraki ele sina. Maishoo nabo te yiook eitaakuno ketua pee eponu elatia ang pooki aayaki nabo naishu endaa. Pee kitumoki aainosa nikiraposhu."* Nedung olee nejo, nanu ong'as aitaakuno katua. Ore ake pee eitaakuno olee ketua neyietu enkitok abuak oleng. Neponu iltung'ana lelatia, nedol osesen eirrag, neiteru aayau ndaiki tenkumoi. Ore ake pee eirrugokino enkitok olupayian lenye neing'aming'amaki ajoki, *"Amaa keishiaakine napiu?"* Newaliki enkitok ajoki, *"A'a, ntasho enkiti rishata amu eton ake egira aayau enda."* Ore ake pee edol enkitok ajo eyautua elatia endaa naaidip ninche too lkuti apaitin nejoki olupayian lenye topiu taa tenakata. Nesapuku elatia enchipai oleng pee edol aajo eitopiutuo olupayian te keeya. Neshuko elatia aapuo nkang'itie enye neing'uaa ndaiki enye pooki teine.

Ore pee elusoo ilkuti apaitin neishunye endaa pooki. Neaku, etaa erishata enkitok pee eitoki aitaakuno ketua tenkaraki esumash. Neirrag aitaakuno ketua, neiteru elatia aaitoki aayau ndaiki enye. Ore ake pee esapuku endaa, nelo enkitok enetii olmoruo lenye nejoki, *"Tudumunye taa tenakata."* Neany enkitok edumunye ejo, *"Ntasho taa penyo enkiti rishata, amu kaata enkurruna."* Ore pee eishu enkiti rishata nelotu olupayian lenye nejoki ninye. *"Tudumunye ake tenakata, amu eturitoi doi enkurare ino."* Neitoki ake aigil aany einyototo nejo kaata doi



enkurruna. Ore tenkata nabayie neitoki olupayian aigil alotu nebuaaki nejoki, *"Tudumunye! Lelelo ooponu pee kiponu aapik osanduku."* Kake eton ake eanyita enkitok tenkaraki enkurruna. Nepiki ninye enkurare nenukari eton eishu. Nenukaa elatia enkitok eton eishu tenkaraki enkurruna.

Enkorrok e Nkisoma:

Etoduaa enkitok olupayian osina sapuk lenkop - osina le maate-tenkaraki emion elaakinoto eng'oki. Etala olupayian enkitok enye, neiturraa enkitok enkishui enye kake meatai nabo te ninche natoduaa enkitarruoroto neibalunyie ina kitarruoroto enye. Kitiu anaa ninche. Kemuta ilkumok lang tenkaraki enkurruna. Nkatitin kumok kitum enkurruna sapuk namitiki iyiook kimbalyunye ng'ok ang. Ekitem nikisudoo ng'ok ang, o meitabaiki erishata embatatai. Ng'ura ilaakinot e ng'oki. Ata hoo teneidipa David airridu, eikesa naake enkisampuaare eng'oki enye. Etua enkayioni enye. Ketii sii apa inyamalaritin o ng'ok atua nkera enyena. Etetema olayioni lenye Absalom ajo anang'aa David pee eoru olorika le nkitoo. Neibulaa enkurruna enkitoria pooki tenkaraki e ng'oki e Daudi. Etapalikia e Nkai Daudi ing'ok enyena kake eitu eiwuang'ie elaakinoto oo ng'ok enyena.

Eshomo ninye entasat moruo dukuya te lejare hoo netabuaka olupayian lenye oleng pee einyototo. Eikooki ninye aaigil, kake etawuase oleng tenkirridunoto oo ng'ok enyena. Neitoki naa aye. Meatai olchani le keeya.

Tayiolo Kulo Kigerot To Ltau Lino:

Yohana le Dukuya 1:9, *"Tinikimbalunyie ng'ok ang keisiligayu ninye naa asipani, metaa kepalaki ninye iyiook ng'ok ang neisujaa ntorrok ang pooki."*

Enkikena 32:23, *"Kake tinimiasiasa ina, ng'ura, nitaasa naa eng'oki to Laitoriani; naa entayiolo nchere, esipa meeta inchere pee meinepu intae ina ng'oki inyi."*

Ndung'eta e Rashe 29:1, *"Tenikirerei anaake nintagol elukunya ino, niyooki nabo olong agila, nimintoki aishiu."*

Esekiel 18:4, *"... Ore oltau pooki oas ng'ok naa keye."*

Ilkorintio liare 7:10, *"Ore emion nainyiaa oltung'ani enkalo nanyor e Nkai naa keyau enkirridunoto nabaiki enjeunoto nemeitoki aata enkusaka, kake ore emion enkop keeya eyau."*

Olkerempe le Nkai 38: 3-4, 18 (Enkatini e ng'oki e Daudi)
"Metii embiotisho atua osesen lai, te nkaraki engoro ino; metii embiotisho iloik laainei tenkaraki eng'oki ai. Amu eshomo ntorrok aainei aalus te ndukuya ai; olola oirosi oleng ninche te nanu. Aibalunyie nanu entorroni, aainosua nanu e ng'oki ai."

Mbaa o Ltau:

Enkorrok oo Nkiteng'emat e Tipat:

1. Ore elejare olwuasa naa ng'ok naariku keeya.
2. Keiwuang'ie e Nkai ng'ok kake meiwuang'ie elaakinoto.

Eimaki Nikurrakiki:

1. Meitokini aikenaa eneba entorroni eng'oki, ore ake pee kirridu te sipata, nepalaki iyiook e Nkai ng'ok ang.
2. Ata hoo teneiwuang'ie e Nkai ng'ok, meiwuang'ie elaakinoto oo ng'ok.
3. Tena aikiwuasa oleng tenkimbalunoto oo ng'ok ang, neiting'oki ewalata keeya.

Nkikilikuanat oo Ndamunot o Nkibirribirrat:

1. Amaa, eisdai sa apa tenelej iltung'ana moruak elatia enye pee etum endaa nanya?
2. Eisdai sa apa tenelej tenkaraki enyamali esumash nemeekure sii eidim esiaai oo mukuntani?
3. Ketii sa aikata erishata nimbalyie nirridu eng'oki tenkishui ino, neton ake kisujita ntorrok elaakinoto eina ng'oki?
4. Iata eyieunoto pee ing'arie ilkulikai ena bae anaa erishata enkiteng'enare?
5. Ketii aikata erishata nitoomono olchore lino empalakinoto nikiaanyaki? Niaas aa? Kainyioo empaashata emion oo "lairukok" enoo "ltung'ana lenkop?"

6. Imbirribirra: Iata sa eng'oki ake pooki neton eitu irridu tenkaraki olwuasa?

Ntoyie Uni - 19

Etii apa olee obo onoto emayanata entito, o esupen enkine o e nkiti kerai oldia too nkolong'i dorropu enki-shui enye. Nepuo dukuya pokira uni aabulu anaa larin tenebo te kitisho enye, nei-guran neisiaul endama pooki o enkewarie. Netum shorue-tisho nagut oleng enaa mee-



kure eidim olee atirishu ajo kaa nabo entito enye te pokira uni. Nelusoo larin kumok, o metabau erishata natayiewua entito enye kiyama, kake eton naake eitu erishu menye ajo kaa nabo enkerai enye. Ore terishata nabayie, neikok olupayian obo kitok ninye pee eng'iri amu keibalayu ake nkiasin enye too nkolong'i nchere kainyioo empukunoto enye tesipata. Nenyorraa menye aisho pokira uni meing'oru ilchorueta sidain ooyam. Ore tenkolong nabo netum menye empalai naing'uaa olaputani lenye, najo, *"Ashe oleng tenkaraki enkitok ai. Kaarriyia oleng te yiarare o te nkitukuore naa keor sii boo aitobir oleng. Kake kaata embae nabo naaing'asiayie oleng; kenyor oleng ainosa ntilitan oo mbenek enchani enkuashe."* Ore te nkisomata e mpalai, neyiolou menye nchere ore ena tito naa enkine, mme entito enkorrok enye.

Ore pee elusoo nkuti olong'i neitoki atum ai palai naing'uaa likai aputani lenye oigero nchere, *"Kanyor entito ino oleng. Keituko nkilani aitobiraki oleng neiper ilkeek asioki. Kake ketii entoki nabo enking'asia naas; Kenyor ainosa iloik!"* Neyiolou menye nabo kata ajo ore ina tito naa oldia, mme enkerai enkorrok enye. Ore pee ekenyu netum enkai palai naing'uaa olaputani lenye obayie najo nchere, *"Aisupat entito ino oleng! Meata nkitarruorrot naa enkitok enking'asia oleng te nanu. Ashe oleng amu intubulua ninye to tolkuuak sidai!"* Ore ake pee

eidip aisoma kulo omon, neirrashu tenkata nabayie ajo ore ina naa ninye entito ai nasipa neshipa oleng anaa pee eyiolou ajo keata nkiasin sidain.

Enkorrok e Nkisoma:

Ore anaa enaikununo nkiasin e nkine o e noldia o ene ntito naa ninche naaibalunyie enaikununo ninche, ore sii ninche nkiasin ang naa ninche naaibalunyie mpukunot oo ltung'ana likira. Eting'iria olpayian aanyu nkera enyena ometaba anaa nebulo eton eitu egel ilkuaaki lenye. Ore olpayian tenebo o enkitok enye, nesipa, ewaita erishata eboita o nkera enye nabo o nabo eiteng'enita neutaa ninche, Amu ore ninche pooki pokira uni naa keata nkiasin sidain o e yieunoto sidai esiaai. Ewa erishata eitobirita "olchani metisidana pee eidim atoiu ilng'anayio sidain." Enoto iutarot sidain te nkishui enye. Etalaikinote inaalio ti oriong aabalunyie nchere kaa enkerai nara enkerai kake eitu eya erishata naado pee eibalunyie nkiasin enye o esipata oo nkakuyiani enye. Ore anaa enaikununo endiati (Matayo 13:24-30) naatunoki tiatua enkano netapalaki metubulu o mewo. Ore oltung'ani oi u ilng'anayio torrok naa keidim atobiko erishata naado nedoli anaa keata enkishui sidai. Hoo naa, keliki yiook Enkai nchere kelotu erishata natiu anaa endiati edotuni nepejori, neijia etiu lelo o oi u ilng'anayio torrok.

Tayiolo Kulo Kigerot To Itau:

Matayo 7:17-20, *"Neija etiu, eiu pooki shani sidai ilng'anayio sidain, neiu pooki shani torrono ilng'anayio torrok. Meidim olchani sidai atoiu ilng'anayio torrok, nemeidim sii olchani torrono atoiu ilng'anayio sidain. Ore pooki shani lemeiu ilng'anayio sidain, nedung'i auroo nenang'akini enkima. Neija naa etiu, too lng'anayio lenye iyiolouu ninche."*

Matayo 12-33, "*Entaa olchani sidai, nesidanu ilng'anayio lenyena, entaa olchani torrongo, netorrону ilng'anayio lenyena amu too lng'anayio lenyena eyiolouni olchani.*"

Isaya 59:12, "*Amu etoponari nkitarruorrot ang te dukuya iyie, ore ng'ok ang neishakenoki iyiook.*"

Enkikena 32:23, "*...Naa entayiolu nchere meeta nchere, esipa meinepu (or esipa keinepu intae) intae ina ng'oki inyi.*"

Mbaa o Itau:

Enkorrok oo Nkiteng'emat e Tipat:

1. Too iasat enyena eyiolouni o ltung'ani.
2. Tuutaki intamoo enkerai enkoitoi naim.

Eimaki Nikurakiki:

1. Meidimayu pee kisudoo nena nikiyia. Keliooyu kenya ake. Ore ake pee eitu kiiu ilng'anayio ootiship Enkai, neaku enkishui ang ene pesho tena kop. Ebaiki nikintomod iltung'ana tenkiti rishata kake meetai embae naisudori te Nkai.
2. Ore enkai damunoto natii ena atini naa ene lasima pee kinteng'en nkera ang. Keishiaakino pee kintisip ate nchere kegira nkera ang aaiu ilng'anayio sidain enalang enaiu iltorrok.

Nkikilikuanat oo Ndamunot o Nkibirribirrat:

1. Idamu pasa anaa keidimayu pee eaku oltung'ani olairukoni nemeyiolu ilkulikai tung'ana?
2. Iyiolo sa oltung'ani ake pooki oishopito enkirukoto anaa enkila – aaishopo Jumapili neirragie too nkulie olong'i pooki e wiki? Ainyoo pee eiko neijia?

3. Tolimu sii iyie nkuti baa naata oltung'ani te nkishui enye naautu tenaa kolairukoni/kenkairukoni aashu mme ninye.
4. Keidimayu pee eiu oltung'ani ilng'anayio sidain o ltorrok? Kaji etiu pee eidimayu?
5. Kainyioo kintaas olchani pee esidanu pee eidim atoiu ilng'anayio sidain?
6. **Mbirribirra:** Kaa pukunoto olchani ira iyie? Kaa pukunoto olnng'anayioi igira iyie aiu?

Emborbor elukunya e Nareruk - 20

Etii apa oltorroboni o enkitok enye naatishipakinote e manyisho e ntim too larin kumok kake meeta nkera. Neton Petero ometaba anaa neyieu nkera neirorie enkitok enye ajoki kayieu nayam enkitok eare pee kitum nkera. Kake, eitu eshipakino Selina ena damunoto olpayian lenye. Nepal enajoki olpayian lenye pee meyam ake ai kitok neiteru aipanka enaas teneaku eyama olpayian enkitok eare.



Ore nabo olong nemut Petero ajo etaa keyau enkitok eare. Ore eton eitu eipung alo ariku, nejoki Selina ore eton eitu ilo tang'asa shomo entim taarakaki nareruk nalotu anya nkiri. Neshipa olpayian oleng pee ening enatiaaka Selina amu etoduaa anaa keata enchipai enyorraroto ina taa pee edumunye aisarrisar nelo aar Nareruk neyaki enkitok enye. Basi, nedumunye taa alo aing'oru enkitok eare naayam. Nedumu ninye Selina

Nareruk nelo ayieng, nedung'u elukunya nelo apik ewueji sidai neinosie oriri asip aishu nkiri pooki. Ore ake pee eidip atisipa nesidanu. Ore ake pee esidanu katukul nedumu aya aisudoo te wueji nemedolie aikata Petero. Ore te ina olong natorikuo Petero enkitok enye ng'ujuk, neitoomon Selina anang'are tenchipai aitaakuno anaa kenyor. Nejoki Petero pee elo aar eng'ues nainosieki osirua. Ore ake pee elusoo Petero, neitoomon Selina enkaini enye te shai. Ore einosita ilomon nejoki Selina enkaini enye, "*Kaata entoki nayieu naaitodol amu kaanyor oleng,*" Nejing aji neitupuku emborbor elukunya nejo, "Ing'ura sii iyie ena toki! Emborbor elukunya ena enkitok nabayie nayawua olpayian ene. Oltorroboni taa ele supat oleng kake kenyor nkiri oo ltung'ana oleng aitalang pooki!" Ore

tenkiti rishata dorrop oleng nedol Selina enkaini eng'ututakino olkerenket.

Neshukunye Petero ang enapita oltaraku et sapuk nepir. Neing'oring'orisho kake eitu edol enkitok enye ng'ujuk. Ore pee eikilikuan Selina neitaakuno anaa keing'asia nejo, *"Ah, kajo nanu keipung'o pee kilotu anang'are anaa pee ishukunye te ntim."* Ore pee elusoo esiana oo nkolong'i neitu eshukunye enkitok eare nemut Petero ajo kalo aing'oru ai kitok. Nelo atum neriku ang neitoomon atua enkaji enye. Ore pee ekenyu nejoki Selina olupayan lenye pee elo aar likai taraku et oinosieki osirua. Ore ake pee eidip ashomo, neipotu Selina enkitok ng'ujuk atua enkaji enye neitoomon te shai. Neitayu emborbor elukunya e Nareruk nejoki, *"Ore ena borbor elukunya naa ene nkitok nabayie nayawua olupayan lai atua ena aji. Mejo doi pee kintaa enkitok; kejo pee kintaa endaa."* Ina ake etoning'o ena kitok eare nedumu olola lenye neisik alo.

Enkorrok e Nkisoma:

Eidima Selina too nkirot o nkiasin enyena aterewa kuna kituaak meisika ti ang. Ore taata tosina, netaa ore iltung'ana kumok oojo ate ilairukok, ore too rorei o nkiasin enye, netaa keisikie kulikai ltung'ana te kanisa. Netaa kulo tung'ana eloket sapuk too ltung'ana ooing'oru Enkai aalang enatiu lelo tung'ana lemeeta enkirukoto.

Tayiolo Kulo Kigerot to Ltau:

Matayo 23:13-14, *"Oi! ntae sunkuro loo laiteng'enak loo nkitanapat oo Farisayo! Amu irishieshie iltung'ana e Nkitoria e Keper, nimijing'ijing'i intae maate, ore ilooyieu nejing, nimitikiki ejing."*

Ndung'eta e Rashe 10:19, *"Ore teneaku irorei kumok, nemelai nkitadiaat, kake ore ilo onuk enkutuk enye naa aing'en."*

Ilhebrania 12:14-15, *"Entonyok eng'oru osotua loo ltung'ana pooki, o sinyatisho naa ore te nemeetai nemetumi hoo olodol Olaitoriani. Entodol ake pee meetai hoo obo olau e mpiris e Nkai; nchere pee metumi 'entonai e nduaran' nabulu neyau entorroni, neaku teina eisarkionieki ilkumok."*

Petero le Dukuya 3:10, *"Ore ilo onyor enkishui neyieu nedol nkolong'i sidain, inchoo erishie olng'ejep lenye entorroni nerishie enkutuk enye pee mejo emonkoi."*

Mbaa o Ltau:

Enkorrok oo Nkiteng'emat e Tipat:

1. Ore olairukoni sunkuroi netaa eloket sapuk te mbulunoto e Kanisa.
2. Ore olng'ejep olejisho naa keyau enyamali.

Eimaki Nikurakiki:

1. Nchoo oltung'ani ake pooki enyamaliki nkiaasin enyena makewon. Amu, meeta inchere pee eitu eyooki aikenaki e Nkai nena baa pooki.
2. Ore ilkumok lelo ooata eyieunoto pee esuj Yesu neisikieki te kanisa tenkaraki nkiasin ang o rorei lang torrok.


Nkikilikuanat oo Ndamunot o Nkibirribirrat:

1. Keeta apa enkitok esipata naararie nkulie nkituaak pooki?
2. Tolimu sii iyie nkuti nduaat naaibala "enaiko" oltung'ani pee eidim aibooi olng'ejep lenye.
3. Ining'ito pasa anaa ore olairukoni sunkuroi naa eloket sapuk embulunoto e kanisa?
4. **Mbirribirra:** Itaa sa aikata olarruoni "oisikie" oltung'ani onoto eyieunoto pee eaku olairukoni tenkaraki oo nkiasin inono torrok?

[**Esipata:** Kesipa ajo mesidai elejare kake kesipa sii ajo ore pee eyam olpayian enkitok e are keyau inyamalaritin kumok. Netum enkitok e dukuya engoro tenebo olom. Negolu to lpayian amu lasima pee eitiship inkituak are. Neisarkionie sii endapash olpayian o enkitok enye edukuya teneyam ai kitok e are (Ilhebrania 13: 4). Negil "ilo sesen obo" tiatua enkiyama (Enkiterunoto 2: 24). Ore sii teneata enkitok e dukuya olom teneyau olpayian enkitok ng'ejuk naa etiu ninye anaa Enkai teneata ninye olom tinikisis inkulie aitin aashu kisuj enkoitoo oo ng'urrat (Yakobo 4: 5; Enkiterunoto 20: 4-6). Metaa meishiakino tinikinteleiki ina kitok enkitok e dukuya entio to tenkaraki engoro olom. Amu keeta sii Enkai olom onyaanyukie olom lenye. Kake kenare nikiomon Enkai pee eretu iyiook maibeleyenata nikiambung ina kitok nabo ake pee melotu enyamali naijo ina. Tadamu tenaa ira olee neyau enkitok ino likae lee atua enkiyama inyi. Inyorraa ina kipankata aashu igorokino likae lee nitum sii olom? Keibala ewalata. Kenyaanyuk oltau le nkitok ino oltau lino, amu irara iltung'ana ooning olom teneori enyorrata tiatua enkiyama inyi. Kaji kinko pee kimbelekenya pee kimbang ina kitok nabo ake?]

Enkidetid - 21

Etii apa enkitok nabo karsis oleng namanya embata olkerenket neeta enkaji sidai oleng. Neeta orripie olakuaniki enkaji enye otii pee eiting emanyisho enye olaa ninye emanya olaturoni lo lchampa. Naa kepiak ena kitok karsis, ore endamunoto enye edukuya naa pee eitiship kewan enye ake. Naa keipot kewan ajo enkairukoni kake meitodolu nkatitin kumok too nkiasin enyena ajo enkairukoni. Ore inkulie katitin keretu ilchoreta lenyena. Naa kelo sii kanisa too rishat neitayu enkiti sadaka te rishata pooki nalotu. Naa kaaisinani ninye olaturoni lo lchampa nyenyok tesiaai enye. Ata tenemetaana enkitok, naa keas ake esiaai. Neisho kanisa sadaka te leng'on nemeton aikata eitu elo kanisa. Nyenyok oshiaake aing'oru nkoitoi naaretunyie ilkulikai. Nyenyok Enkai nyenyorraa iltung'ana aajo olairukoni odede tenkaraki nkiasin enyena.



Netum enkitok enkide-tidet te nkewarie nabo neide-tidetu etua neilep alo shumata. Nedol pee eboloki olmalaika nkishomin olaa ore esiaai enye naa pee eitodol iltung'ana nkajijik enye te shumata. Neiriamarie ilo malaika ina kitok nepuo. Neiliilaa nkajijik eeku kutiti, kutiti ometaa kutiti oleng. Neduaaya enkitok te lakuan e nkaji sapuk sidai oleng. Neitashyie olmalaika neut enkaji nejoki, "*Neidia enkaji teidie, naa ninye enkaji ai, maiulokinoto taa alang tenikintoki aaimiimaa kuna kulie ajijik kutiti.*" Newaliki olmalaika ajoki, "*Aha a'a, ore ina aji naa ene likai tung'ani. Mitum ina aji.*" Nelo dukuya enkitok karsis akurraki ajo enenye ake enkaji, o metiaaki olmalaika tenkiting'oto, "*Yesu ninye oshet nkajijik nidolita tene te shumata. Imasaa oshi nirriu eton itii enkop*

eshetie kuna ajijik. Ore idia aji sapuk nidolita naa enolaturoni lino lolchampa aisinani, laa ore apa eton etii enkop, naa keshum too nkatitin pooki masaa enyena tene te keper. Ng'ura sii iyie doi idia kiti aji mutaati musana, ninye taa enkaji ino. Eteshetaki aashetie masaa nirriwua apa eton inchu itii enkop. Lasima pee ilo amany ina aji." Neiputukuny enkitok neirut, kake ore tosina loltau nelo amany ina aji e shumata.

Enkorrok e Nkisoma:

Ore nkoitoi e Nkai neme nkoitoi oltung'ani anaake. Etiu te kulikai tung'ana anaa emodai teneasisho iltung'ana metii olopeny oitashеiki ninche. Etiu te kulikae tung'ana meeta tipat teneishooyo iropiyiani te sadaka amu kejo medupore maate. Melelek pee ias embae "sidai" anaake aasaki ilkulikai. Kesipa melelek kake kenare nikiasaki ilkulikae imbaa sidain ata tenaa kegol. Amu keyiolo Enkai. Keiguanare ninye Enkai iltauja loo ltung'ana pooki. Nelaaki kenya ake e Nkai pooki tung'ani anaa enaishiaakino.

Taiyolo Kulo Kigerot to Ltau lino:

Matayo 6:19-21, *"Emishumaki ate te nkop masaa kiroteti, eneinosie olasai o endoron, negil ilapurrok, nepurroo, kake entushumaki ate te shumata masaa inyi kiroteti, te nemeinosie olasai, anaa endoron, nemegil ilapurrok nemepurroo; amu ore enetii masaa inono kiroteti, naa ine eyooki atii oltau lino."*

Yohana 14:2, *"Etiu enkaji e Papa ilgilat kumok amaa, te neme neijia etiu kanaata atiaaka intae, amu kalo aitobiraki intae ewueji?"*

Ilkorintio li are 5:1, *"Amu aikiyiolo aajo te neidaikieki ele ng'obor te nkop likimanya nikiata emanyisho naing'uaa e Nkai, enkaji neme too nkaik eitobiraki, nabikoo te shumata ntarasi."*

Ilkorintio li are 5:10, *"Amu kintashe ake pooki te dukuya olorika le Kristo le nkiguana, neng'amu pooki inaaairirikino nena naataasa to sesen aa supati aa torrok."*

Ilkorintio li are 4:18, *"Amu mme kuna naalioo king'orita kake nena nemelioo. Ore kuna naalioo naa ne nkiti kata; ore nena nemelioo naa noo ntarasi."*

Mbaa Oltau:

Enkorrok oo Nkiteng'emat e Tipat:

1. Erretenita Yesu ewueji ang te keper.
2. Ore nena nikiaas eton kitii enkop naa ninche naashetu "olekoisiaayio lang le shumata."

Eimaki nikurrakiki:

1. Ore "ilchumat kiroseti" lena kop naa ile nkata dorrop nemeeta dupoto nabik. Entushumaki ate ilchumat le keper alang ile nkop. Keshipa oleng olaturoni le nkurma te siaai enye. Ore tenkaraki ina neas aitobiraki.
2. Etaasishe olaturoni le nkurma aitobiraki ata metii "olkitok lenye le nkitok" eshomo ake ninye dukuya aasisho. Ore te shumata, naa kesheti ake enkaji aashetaki obo oo obo lang onyor neisiaai ninye.
3. Etipikaki iyiook ena kop pee kisiaai nikiaata enchula tenebo e Nkai.

Nkikilikuanat o Ndamunot o Nkibirribirrat:

1. Eikirorie aikata e Nkai te nkidetidet?
2. Amaa enkishooroto ninchooyo Jumapili te kanisa eninye ake enkoitoi nindim atushumie olchumati lino te shumata?

3. Keimaki Ilkorintio li are 5:10 enkipirta oolekoisiaayio ootum oltung'ani te keper. Iata pasa iyie endamunoto naaipirta ilo lekoisiayio?
4. Kaja pasa eiko oltung'ani pee eshum "ilchumat te shumata?"
5. **Imbiribirra:** Kaa pukunoto "olgilata" kintobirakitai iyie te keper?

Ematua e Tomon - 22

Etii apa enkitok nanoto iropiyiani te biashara enye namir neinyiang'u sinkir. Ore Joy (Nashipai) naa enkitok arriyia te biashara, neaku ore enkata pooki namir isinkir netum dupoto sidai oleng. Ore nabo olong netum dupoto sidai, neya olpayian lenye erubata eina dupoto nanoto nepik sadaka te kanisa. Negoro Joy oleng newuapaa iropiyiani nejo, "Nanu doi openy natanapa olola le kulo sinkir te lukunya ai makewon. Eitu doi eas e Nkai ena siai – kainyioo pee iyieu nincho ninye iropiyiani aainei. Tushukoki iropiyiani aainei." Neirorie Yohana Nashipai anaake enkipirta enkishooroto oo rubat e dupoto esiaai to Laitoriani kake etanya ninye irishat pooki. Ore too nkuti olong'i neiteru Nashipai alau ilainyiang'ak. Ore ebaiki enkiting'oto olapa eton ake etii isinkir olbene le Nashipai. Neitu etum dupoto e biashara enye katukul. Neiteru Nashipai atum enkuretisho amu meekure emirita intokitin enyena katukul.



Nedumunye Yohana nelu enetii ina kitok nejoki ninye nchere meekure doi itum iyie dupoto te biashara ino oo ropiyiani amu itanya incho Enkai erubata enye. Neitoki ajoki ninye nchere keishiaakino pee iomon Enkai empalakinoto oo eng'ok inono. Nenyorraa enkitok enkikoo olpayian lenye kake mme asipani oltau lenye. Neiteru aitoki amir isinkir kake meata dupoto natumito. Neiteru eng'oki aitame oltau lenye neirridu neomon Olaitoriani empalakinoto. Ore aiteru ina olong, neiteru aitoki amir isinkir lenyena netum dupoto. Neiteru enkirukoto enye agolu neponari. Eitu aikata eitoki apur e Nkai too nenyena.

Enkorrok e Nkisoma:

Kitiu ake sii yiook anaa ena kitok. Kipur e Nkai too Ropiyani, too rishat oo too siaaitin ang. Eitanapaki Isiraeli to Lning'o Musana pee eitayu ematua e tomon e dupoto oo masaa enye tenebo o kulie kishoorot ake oo mpukunot naapaasha. Enkipirta enchipai te yiook ilairukok pee kintayu e matua e tomon tenebo o lasarri le nyorrata. Keisiligita e Nkai ilasarri lang metaa ilasarri le nkishiaa sidai e nena nikiaata. Ore enkishooroto oo ndamunot ang naa kenare netiu anaa indamunot oo lairukok loo Ilfilipi ootoduaa ninche anaa emayianata te neishooyo telus o te negiroo enkidimata enye.

Tayiolo Kulo Kigerot To Itau Lino:

Malaki 3:8-10, *"Kipur oltung'ani e Nkai? Eji nikipurritoto intae nanu. Nijojo ake sii, kaji 'doi kinkuna tinikipur iyie?' Tematua inyi e tomon o too lasarri. Etediaaki intae to ldeket, amu kipurritoto intae nanu, intae olosho pooki. Eyau e matua e tomon pooki atua enkaji ai nashumishoreki pee eaku ketii endaa atua enkaji ai; entetemaki sii iyie, ejo Olaitoriani loo lororani tenemaboloki intae ilusien e shumata, nabuku abori imayianat naadoyo."*

Malaki 1:6-8, *"Eyanyit olayioni menye, neyanyit osinka olkitok lenye. Amaa naa tenaa kara Papai linyi, koree enkanyit ai? Naa tenaa kara olkitok, koree euriata ai? Ejo Olaitoriani loo lororani. Lo Apolosak kulo oomen enkarna ai. Ijojo intae, 'Kaji doi kinkuna tinikimenu enkarna ino?' Aliko ntae ajoki; tinintayuyu endaa naiduruk aapik shumata olperere lai lo lasar lai. Nijojo sii; 'Kaji doi kinkuna tinikidurukie ninye?, Ajoki intae: Amaa enidamumu to lmena e misa o Laitoriani, nintemenimene sii ilkulikai meibayu. Amaa tinintayuyu ilasarri loo masaa modook, aime eng'oki ina sapuk? Amaa sii tinintayuyu ilasarri loo ntokitin ng'ojiniaa anaa inaamuoi, aime eng'oki ina? Entetem sii ntae enchoo nena olkitok linyi, aijojo*

keshipakino intae anaa eisho intae omom? Ejo o Laitoriani loo lororani."

Ilkorintio li are 8:2-5, (Kanisa oo Lmakedonia) *"Etetemaki naleng to sina, kake ore tiatua nena pooki nedooyo eng'ida enye, naa ore hoo naa aisinak naleng, neitulusoitie eleng'on te nkishooroto enye. Amu kaidim nanu atiaaki intae eishorutua naairirikino nena naata neitoki aaitogiroo ine. Ore teyieunoto enye maate, eitirrishakita iyiook naleng eyieu neishori metang'ara eretoto nareti iltung'ana le Nkai. Netogiroitie kuna pooki enikinteiki apa iyiook, amu ate etang'asa aaisho o Laitoriani paa keitoki taa, teyieunoto e Nkai, aaisho iyiook."*

Yohana liare 1:8, *"Entodol ate pee minturraa ina nikisiaayutua, kake pee itumutumu olekoisiaayio linyi ebore."*

2 Ilkorintio 9: 6-11, *"Entadamu ena nchere, ore ilo oun te nkutisho nesotu te nkutisho, ore ilo oun te nkumoi nesotu sii te nkumoi. Tumuta pooki tung'ani too ndamunot inono tayiolo entoki ninchooyo inyor metii olng'ash; ilo oishoru te nchipai enyor Enkai. Keidim Enkai aishoo intae inoo nkolati inyi neituluso, pee itumutumu aataret esiaai pooki supat tenkaraki niaatata anaake inaidip intae te pooki toki. Anaa enajo Lkigerot, 'Eidapashaka pesho, eishoo laisnak, nebik esupatisho enye ntarasi.' Ore ilo oisho olaunoni ilantera, neisho emukate olonya, ninye oisho intae ilantera neitubul; ninye oponaa esotore e leng'on inyi. Ninye oitaa intae karsisi oleng pee itumutumu aataleng too nkoitoi pooki, nedumaki ina lkulikae meishoo Enkai enchunet too nikitaasa iyiook."*

Mbaa oltau:

Enkorrok oo Nkiteng'emat e Tipat:

1. Ore eanyata nikiany kincho e Nkai erubata enye naa empurroto kipurrito ninye.

2. Keishiaakino pee eeku nkishoorot ang enena nikiata naaisul.

Eimaki Nikurakiki:

1. Kemayian iyook Enkai neitadooyo tenaa ekiyaki ninye imatuan ang e tomon o nkishoorot.
2. Ekipurr e Nkai tinikiany kishukoki ninye erubata oo masaa ang.
3. Keiririkino pee eaku ematua e tomon ang ene dukuya eitaini too lmushaarani o te nkikesare ang neiteng'eli tenkaraki e Nkai.

Nkikilikuanat oo Ndamunot o Nkibirribirrat:

1. Amaa tenemutu eitayu olmempai pooki le kanisa e matua e tomon neasayu inyoo te kanisa?
2. Kebaa ilaitayunok le matua e tomon ooya enkitayunoto pee eretu olalikioroni?
3. Keishiaakino pasa pee epiki mpala oo ropiyani naatumutate olbene le sadaka? Arashu enkishooroto e lukunku namuoi anaa olasar le nashe?

4. Mbirribirra: Nchooyo nkishoorot inono oshiaake te yieunoto o tenchipai? [Esipata: Matadamu aajo meyieu Enkai ematua e tomon ake te iyook, kake keyieu iltauja lang. Amu, etejo lelo kererin, "... ate etang'asa aaisho o Laitoriani." Ore pee kincho Enkai iltauja naa keidimayu pee kintayu enalang oleng ematua e tomon. Amu kenare nikirubare Enkiyang'et Sinyati alang enkitanapata ake naipirta ematua e tomon (Ilgalattia 5: 25; Iroma 7: 6). Tenkitanyaanyukoto, ebaiki nimir enkiteng nijo te dukuya intayu ematua e tomon, kake pee elusoo enkiti rishata eton inapita iropiyani naaipirta ina kiteng nikirem Enkiyang'et Sinyati oltau lino pee inchooyo ematua e onom aashu kegiroo. Ore ina kata nigira arubare Enkiyang'et Sinyati alang enkitanapata ake.]

Olomoni le Melioo - 23

Ketiu apa Fatuma anaa enkairukoni supat oleng. Eetuo iltung'ana nkatitin kumok aaing'orunyie ninye iutarot. Ore nabo olong netum Fatuma enkidetid. Nedol Enkai natiaaka ninye nchere kelotu Yesu taaisere aparani ninye. Neshipa Fatuma oleng. Ore taaisere tadekenya neipirri alo enchorro neiput oltoo lenye e nkare. Ore eton aa enadumunyie olnapet lenye pee elo enkurma ayaki Yesu endaa, nedol olomoni te kutukaji enkaji enye. Olomoni onaure neeta enkure neeta esumash. Neomonu ewueji neitukuore o eneyeng'iyeng'are. Ore ake pee edol Fatuma ele omoni nenyamalu katukul amu keyieu neng'as alo enkurma. Nejoki te nkisision, totona neutaki enetumie enkare. Basi, ina taa pee eision alo enkurma. Nesiokisioki aiput olkioondo lenye endaa neision ashuko alo ang. Ore eloito te nkoitoi neitasheyie enkiti tasat moruo, nesai aomon endaa. Nejoki Fatuma, *"Ore ena daa naa Yesu alo aitobiraki. Maaidim aishoo. Shomo nkang'itie toomonu endaa. Olesere."*

Neitobir Fatuma endaa asioki. Neidipayu mbaa pooki te mbaikinoto e Yesu. Nening Fatuma eoshoto emilanko. Nejo, esipa meeta nchere pee mme Yesu ilo, kake mme ninye naa! Enkitok ake omoni naewuo enkan. Nejoki ina kitok kaaomon ake pee kinteng'en enaiko pee aaku enkairukoni. Nemuguta Fatuma oleng tengoro nejo, *"Oh, kayieu naa kaiteng'en tenakata kake matumoki. Kebau Yesu ebaiki ena rishata tenakata. Shomo pee ilotu taaisere."* Neshuko enkitok alo eisininuo.

Nebau erishata endaa e teipa nelusoo nemelioo Yesu. Ore pee eeku erishata pee eirura neaku enaishirita. Ore tenkiting'oto, nelo endapash airura, ore te pooki naa pee etum enkae kidetid. Ore pee edol e Nkai tenkidetid, neiteru airorie akurraki eyieu neyiolou ajo kainyioo pee eitu elotu Yesu. Neisininuo Enkai nejoki, "Fatuma, kitaparana doi ng'ole Yesu katitin uni. Eewuo erishata edukuya enaure te lototo naado kake intarrikio ninye neeku eitu naa ing'amaa aitobiraki. Nelotu

enenkaigil te mpukunoto entasat moruo kake itapiana nimitiki endaa. Neitoki alotu eneuni, nelotu eing'oru enkoitoi enjeunoto kake eitu itum erishata niutakinyie. "Enkoitoi." Ore ake pee ening Fatuma kuna baa nerem oltau lenye neiteru aishir oleng too lkiyio. Enoto erishata enye kake etabatate.

Enkorrok e Nkisoma:

Keishiaakino pee eeku oltung'ani kalamas oleng ayiolou eyieunoto e Nkai neas. Etolikio iyiook too lkererin kumok loo Lomon Supati nchere ore enkata pooki nikiretu ilemeeta toki nesipa Enkai kisiaita. Ore irishat kumok nikinyamaliki "inkipankat ang nikijo ene tipat oleng" arashu nkorroki oo yieunot ang nikimitiki e Nkiyang'et Sinyati erishata metaasa esiaai enye. Ore nkatitin kumok tinikining oltoilo le Nkai, nikigor aibooyo tenkaraki "nkolati ang" nelotu erishata nimikintoki aaning oltoilo lenye katukul.

Tayiolo kulo Kigerot to Ltau:

Matayo 25:35-40, *"Amu aata apa esumash nikinchocho endaa; naata enkure nikinchocho enaok; nara omoni nikirikiriki ang; nemaishopo nikinchoishopo; namuoi nikirumurumu, naena nikibaikiki. Neng'amaa ina kata iltung'ana le Nkai aajoki, 'Lokitok, kanu kitoduaa iyie iata esumash nikintoti iyie? Anaa kanu kitoduaa iyie ira omoni nikirik iyie ang? Anaa minchopo nikincho iyie? Anaa kanu kitaramata iyie imuei anaa iena nikibaiki iyie? Naa keng'amaa Olaiguenani ajoki, 'Esipa, ajoki intae, ore anaa enintaasa lelo alashara laainei ooti, nanu intaasa.' "*

Ndung'eta e Rashe: 14:31, *"Ore ilo oitorogony oltung'ani aisinani, naa ilo oitobirua ninye etamoro, kake ore ilo supat te lelo oomena naa keyanyit ninye."*

Ilhebrania 13:2, "Emintololoiko enkitoomono oo lomom amu teina eitoomono apa kulikai ilmalaika meyiolo."


Mbaa o Ltau:

Enkorrok oo Nkiteng'emat e Tipat:

1. Ore pooki niaasaki ilaisinak arashu iloomena; naa Yesu itaasaka.
2. Ore pee inyamaliki kewan ake naa igira aiturraa erishata ninyamalikinye ilkulikai.

Eimaki Nikurakiki:


1. Emikintoki aaitanyamaluo oleng ometorikinoyu iyiook ina naata tipat aisul.
2. Tang'amai erishata ake pooki ng'ejuk anaa keeta dupoto. Ebaiki naa "ilmalaika" igira aitoomon nimiyiolo.
3. Ore pooki naas oltung'ani te nkarna e Yesu aretu oltung'ani oje naa kegira sii aasaki Yesu.



Nkikilikuanat oo Ndamunot o Nkikilikuanat:

1. Idamu pasa iyie ajo ore erreten tenkaraki elotunoto e Yesu naa entoki e tipat oleng neitu aikata easayu te Fatuma?
2. Kainyioo nanare pee eas oltung'ani pee erreten kewan tenkaraki elotunoto e Yesu?
3. Kanaata aa nyoo eitaasa Fatuma olomoni oloito, olaomononi oing'oru ororei le Nkai?
4. **Mbirribirra:** Ketii aikata erishata "nimbooyie" oltoilo le Nkai o enkitanapata enye tenkaraki ninyamal oleng iasita enkulat naje?

Enking'asia Osinkirri - 24



Ore nabo olong nedumunye olupayan oji enkarna Ologol Tau alo aing'oru enkitok naayam nelo atum enkairukoni sidai oleng naata nkiaasin sidain. Ore ake pee eidip aayamata tiatua ilapaitin esiana, neiteru Ologol Tau ajo tiatua oltau lenye, "Kemoda enkitok ai; ore kila entadekenya o enteipa naa kainepeu ake eomonito abuak aishiraki Enkai

enye. Measita apa ena eton kintobirita olning'o pee kiyama. Kaing'or najo lasima paa kemuoi, neaku enaikash pee aaraa!" Neng'as aidong oleng, kake etanya elo. Neitoki aitupuku masaa enyena pooki tiatua aji anang'aki boo, kake etudumua enkitok pooki ashukoki atua aji.

Ore te nkata nabayie, nemut ologol Tau toltau lenye ajo, "Lasima pee aar metua pi pee aaing'uaa katukul." Neitobir enkipankata pee eisho ninye iropiyiani kumok naashum nerrip, kake ore enkipankata enye naa pee epurroo nena ropiyiani near enkitok metua anaa ketaa enkapurroni. Ore naa pee eitabaya enkipankata enye, neisho ninye iropiyiani neitanap pee epik ewueji nesian nerrip amu iropiyiani apa nena naaiteng'el pee eiterunye biashara. Neng'amaa enkitok iropiyiani nepik enkiti bene neisudoo apik olkabat le jikoni. Ore kewarie eirura, nedumunye Ologol Tau apurroo iropiyiani. Ore pee ekenyu neya embene etii iropiyiani anang'aki atua enaiposha. Nejo, *"Meekure taa taata eeta enkoittoi natumie."*

Ore te nkae tadekenya nedumunye anaa enatamoo oshiaake neipang alo, pee elo aibung isinkir le ndaa e dama. Ore pee enang'aki orreshet atua enkare neilepunyie ebore isinkir. Neiteng'el osinkirri obo sidai nemir ilkulikai. Nejo enkitok aiper enkoshoke osinkirri ketii embene oo ropiyiani. Nejo aing'uraa olkabat nedol ajo metii iropiyiani. Nepapulu, neisik

alo enetii ilpayiani le kanisa pee etum enkitoo. Newaliki aajoki, mikiyiolo sii yiook tipat eina kake toomono e Nkai naaidim aibalunyie ewalata. Nerrinyoki iropiyiani atua olkabat. Ore teina teipa nelotu Ologol Tau ang ejo kenotoko pee eitang'or enkitok enye anaa enkapurroni. Nejoki enkitok enye, koree iropiyiani. Ore enakata eloito enkitok aitayu embene oo ropiyiani to lkabat, nedumu Ologol Tau enkalem pee ear enkitok metua. Nelotu enkitok eeta embene neitarasaki nelulung'a iropiyiani. Neirut Ologol Tau oleng nebatatakino nkejek enkitok enye neiteru aishir, neishakenoki ajo, "Esipa ore e Nkai ino naa ninye e Nkai nabo nasipa!" Nerem osina le nkitarruoroto oo nkiaasin enyena oltau lenye neiteru aibalunyie enkatini pooki. Nesai aomon empalakinoto, Nejoki *"Aatasayia torikoki pee aapuo aiibatisa amu atayiolo taata ajo ore Enkai ino naa aikitok naaidim atapalaki eng'oki nataasa tiatua oltau lai."* Ore teina olong ake, neibalunyie ng'ok enyena neibatisai. Ore ebaiki taa ena olong naa olairukoni oisiligayu, netayiolo ajo aikitok Enkai!

Enkorrok e Nkisoma:

Ketii ena kop nkalifuni oo ltung'ana leitu aikata ening enkipirta e Kristo. Keasishore ltung'ana kumok enkarna e Yesu o Nkai tenkoitoi endala aadekishore. Meisom ilkumok Bibilia, nemeeta kulikai Bibilia metaa mejo aikata maiteng'enata aayiolou enyorrata e Nkai nanyor ninche meteleku ilairukok ooishu te nkirukoto, neas isupati ata too rishat engoloto. Kake ore te yiook oata omom eyiolounoto Enkai naa keaku olola te iyiook. Keishiaakino pee kinchu enkishui naaikishiaan te dukuya iltung'ana otii atua enaimin oo ng'ok pee kiwang'u aatiu anaa ilakir ooilang'isho. Pee kiaaku ewang'an te ninche, nikincho ninche enkoitoi enkishui ng'ejuk. Ore te pooki, nimikirup ate, nimikiwuasa arashu kigolong'u. Kenare netii ake enkiting'oto nabo nikiyieu te pooki toki nikias. Ore ina naa pee etum Enkai enkitoo. Neaku, too rorei lang, nkiaasin, enkishui sinyati o iltung'ana likitum ootaa ilairukok, netum Enkai enkitoo o errepet pooki.

Tayiolo Kulo Kigerot to Ltau Lino:

Petro le Dukuya 3:1-2, *"Neijia entotiu sii intae, na kituaak entadou ate too lpayiani paa tenetii te ninche olemeiruk Ororei, netumi aateyietu metii ororei tenkaraki olkuaak loo nkituaak enye, tenkaraki nadol ninche olkuaak linyi sidai, le nkuretisho."*

Petro le dukuya 2:19, *"Amu keishori oltung'ani enchunet tenaa, ore enkaraki nadamu e Nkai neng'iri teneidong'i metii esipata."*

Petero le Dukuya 2:12, *"Niakuku ilooata orrekie sidai tiatua iloreren lemeiruk, pee teneiro neiteleiki intae anaa ilaasak loo ntorrok, neidim tenedol too nkiaasin inyi sidain, aasiswa e Nkai tenkolong e muta."*

Ilfilipi 2:14-16, *"Entaas mbaa pooki metii enking'unyung'uny anaa nkikilikuanat, pee metumi ake eleyiata napiki ntae niakuku inkera e Nkai nemeeta eleyiata tiatua ena kishon torrongo niwang'ung'u aaku ewang'an tena kop; imbung'itata aakurraki ororei le mpuaan..."*

Petero le Dukuya 4:8, *"Ore enalusoo te pooki, embung'a enyorrata nauno olikae olikae amu eitoip enyorrata olorora loo ng'ok."*

Ilhebrania 12:14-15, *"Entonyok eng'oru osotua too ltung'ana pooki, o e sinyatisho naa ore tenemeetae nemetumi hoo olodol Olaitoriani. Entodol ake pee meetae hoo obo olau e mpiris e Nkai; inchere pee metumi 'entonai enduaran' nabulu neyau entorroni, neaku teina eisarkionieki ilkumok."*

Mbaa Oltau:

Enkorrok oo Nkiteng'emat e Tipat:

1. Entotoni te mpukunoto enkishui nasinya enaa tenedol intae iltung'ana neyietuni meetu enetii e Nkai.
2. Entonyorrai enting'iria osina le nkinyala nemetii esipata tenkaraki enyorrata nitonyorra e Nkai.

Eimaki Nikurrakiki:

1. Ena esipata nchere etipikaki iyiook ena kop te nkipirta. Naa ore ena kipirta naa pee kincho e Nkai e nkitoo enye. Nikiaas ena tentonata enkishui esinyatisho, pee kitoni te seriani too ltung'ana pooki, nenyorru olikae olikae, nikiaas nkiaasin naaikishiaan, nikiaaku ewang'an osiligi tiatua ena kop enaimin.
2. Ore tenkoitoy enyorrata o e nkitanyaanyukoto ang naa keyietuni iltung'ana meetu enetii e Kristo. Naa, ore tiatua kuna pooki, neishori Enkai enkisisa.

Nkikilikuanat oo Ndamunot o Nkibirribirrat:

1. Kaji kinko pee kiwang'u anaa ilakir? (Ilfilipi 2:14) Tolimu nkitanyaanyukot naaibala.
2. Kainyoo "Ororei le nkishui"?
3. Ketii olmarei lino iltung'ana lemeyiolo Kristo? Kenyorra toliki ninche enaipirta Enkai o enyorrata enye? Naa tenemenyorra kaji inkunaki pee iyau ninche enetii Yesu metaa ilasujak lenyena?
4. Kainyioo oshi namitiki iyiook pee mikidol e Nkai? (Ilhebrania 12:14-15)
5. **Mbirribirra:** Kaitanyamal sa oshi iltung'ana kumok te nkishui ai? Aikunaki aja?

Ing'ok Inono nikingbalunyie - 25

Eti apa emurua nabo naitanyamala oling'atuny ogira arreshoo masaa oo lting'ana pooki. Ore nabo olong nedumunye ilang'orok imiet oldien lenye oopishana aapuo aar ilo ng'atuny. Ore ake pee ening'u oling'atuny Ilang'orok eponu nekuet aisikaki olchampa, nedol enkitok nanyokita airemoki olchampa lenye. Nejoki enkitok, "Atasayia, eikidim pasa aisudo pe maatum ake kulo ang'orok oldien?" Nyenyorraa enkitok pee eisudoo oling'atuny.

Ore ake pee ebau ilang'orok nedol enkitok. Neikilikuanishore aajoki, "Keitu ake idol oloshi ng'atuny oyawua enyamali? Keinosita oshiaake nkishu ang, ilukunkuni, inkineji, naa kesipa nchere tinikipal eitu kiaal neiteru sii anya iltung'ana!" Kake ore enkitok, nemeyieu nyenyorraa ajo kegira aisudoo oling'atuny, newaliki enkitok ajoki, eitu nanu adol oling'atuny. Ore ake pee elusoo ilang'orok nepuku oling'atuny teneisudoriyie neirorie enkitok ajoki. "Kaata esumash nemanya mbenek aashu nkaitubulu, nkiri ake anya," Newaliki enkitok ajoki, Taanyuaki maashomo aing'uraki nkiri enkiene te nkaji." Kake newaliki oling'atuny ajoki, "A, a, Mayieu nanu nkiri enkiene, IYIE ake nanu ayieu nanya!" Ina taa pee eibung' enkitok nanya amut!

Enkorrok e Nkisoma:

Ore ena kitok naa enkalejani nemedamu iyieunot oo lkulikae. Eitu apa eshilaa ajo keata oling'atuny batisho te pooki ng'ae le murua, o te ninye. Eitu apa eshilaa ninye nchere mme ake duo masaa elatia enye naaidaaya tenkaraki oling'atuny kake tenebo o e nkishui enye maate. Keishiaakino pee kiata iwalat anaake te nkorrok enkiishui ang oo nkolong'i pooki. Ore te nkalano, nikituu anaa ena kitok namoda, ekiaas pooki nkoitoo torrok naarikooki iyiook iwalat errorroto. Ore too nkatitin kumok naa ore walat naa kepik iyiook tenguton o tenguton atua

engumoto e ng'oki o e mutata. Embae enking'asia pee edamu ninye ajo keidim aisudo i o lng'atuny nemeyiolouni.

Nejo Bibilia meetae embae naisudoyioki nemeyiolouni. Kedolisho e Nkai etonita tolorika lenye le Nkitoo neitash e arretena pee eitame lelo pooki oas ing'ok. Ore pee kiun ntorrok nikisampu ntorrok!

Tayiolo kulo Kigerot to Ltau:

Olkerempe le Nkai 11:4-6, *"Etii Olaitoriani atua e Nkaji enye Sinyati, etii olorika lo Laitoriani keper: neing'orisho too nkonyek enyena, netem too nkonyek enyena, nkera e tung'ana, Ketem Olaitoriani ilo supat oltorrone, neiba to ltau lenye olarruoni. Ore te lelo torrok, naa keitashaiki enchan enkima o e nchan oo soito; olkutati opejisho olo aaku erubata e nkikompe enye."*

Ilgalatia 6:7-8, *"Emilej ate, mederrieki e Nkai. Amu naaun oltung'ani elo ake sii aisampu. Ore ilo ounoki enkulupuoni o e nkewan o sesen nelu aisampu teina kewan o sesen erruoroto, ore olounoki enkulupuoni e Nkiyang'et nelu aisampu te Nkiyang'et e nkishui oo ntarasi."*

Ndung'eta e Rashe 14:12, *"Etii enkoitoi nalioo toltung'ani aa sidai, kake ore enkiting'oto enye naa keeya."*

Ifilipi 2:4, *"Nchoo pooki ng'ae tentae meaku mbaa enyena ake eing'or kake nchoo sii eing'or inoo lkulikae."*

Mbaa o Ltau:

Enkorrok oo Nkiteng'emat e Tipat:

1. Nena ake naatuno oltung'ani elo aikes

2. Kesesh mikintasur ing'ok inono aa iyie ake openy kake keitasur sii kulikai ake kumok.

Eimaki Nikurakiki:

1. Ene e Nkai e nkitoria. Kedol pooki toki naasayu etonita tolorika lenye le nkitoria le nkitoria e shumata. Keiba entorrone neyau enkidaaroto shumata lelo pooki lemepal ing'ok.
2. Meidimayu pee eas oltung'ani eng'oki nelo elakuno. Kesesh esuj iwalat ererito, ata eidipa oltung'ani airridu netum empalakinoto. Kelo kenya ake enkisampuare aibalayu te ina nalo pooki ng'ae te yiook aun. Ore enkipirta e nkipankata e Nkai naa pee kinyamaliki pooki tung'ani te iyiook embiotisho o e nchipai enkishui oo lkulikae tung'ana oomanita iyiook.

Nkilikuanat oo Ndamunot o Nkibirribirrat:

1. Keret pasa oshi nkiasin inono nkulati oo ltung'ana lelatia ino?
2. Kaji pasa oshi eiko pee eipirta nkiaasin inono ilchoreta linono olelo le latia ino?
3. Kajo oshi inko pee ishila eng'oki? Imba eng'oki anaa enaiba Enkai?
4. Amaa tinidol olelatia ino etemitae tiatua ng'ok naa ore iyie, iyilo openy iwalat ena ng'oki, kaa ias?
5. **Imbirribirra:** Kaa pukunoto e nkisampuare ilo kenya aikes?



Oloata Nkiyiaa Toning'o - 26

Etii apa olowuaru keru obo oata nkera kumok oleng nemeidim aitotio pooki. Nelo asai Olkinki nejoki, "Nchooki endaa naitotiyie nkera aainei." Nenyok Olkinki oleng aing'oraki olowuaru endaa naisho tenebo olmarei lenye, netum endaa naisho ninye. Ore pee elusoo nkuti olong'i neitoki ake ashukokino Olkinki aomon enkae ndaa. Ore tena rishata hoo duoo nesipa, nearaa Olkinki nejoki. "Ira doi olowuaru keru. Shomo tayiolo eninko pee ing'uraki kewon ino endaa!" Ore amu keyiolo enaidim olowuaru keru ataasa, neiteng'en iltung'ana le murua pee eng'enu nemeitoki aaipung too nkajjik teina kewarie amu ore tesipata naa kemandimanaa olowuaru keru eing'oru endaa! Kake etii enkitok nabo neitu eshilaa enkikoo Olkinki neipung kewarie alo ainyiang'u isigarani. Ore eshukunyie netumo tenkoitoi elipong olowuaru keru naata esumash neibung enkitok near ake teine metua. Nedamu olowuaru keru ajo keiririkino pee eshumaki kewon endaa e taaisere, ina taa pee edumu osesen le nkitok alo ashum tenkaji olchore lenye oji Enkitojo, neing'uaa teine.

Ore kewarie netum Enkitojo esumash nenyu nkiyiaa emeneng'ani. Ore pee ekenyu nelotu elipong olowuaru keru aing'oru osesen le meneng'ani neinepu meekure eata nkiyiaa. Neing'asia, neikilikuan olchore lenye nejoki kainyioo doi nataase, newaliki ajoki, "Meata apake ena kitok nkiyiaa!" Ina taa pee eiteru olarrabal le nchankar otoning'o emurua pooki. Ore tesiadi nebau Olkinki pee elotu arish aitaiki osotua. Neining te mbarakinoto o metawala ajo, "Kesipa meata elo tung'ani nkiyiaa amu eitu apa ening oltoilo lai. Atejo apa pee meitokini ake aata oltung'ani hoo obo oitoki aipung alo boo, kake ng'ura enataase tenkaraki etanya aning neipung alo boo pooki kata."

Enkorrok e Nkisoma:

Keata Bibilia nkikoot kumok naaretu iyiook matapaashare ilmeita kumok tenkishui ang. Kake ore inkatitin kumok nikintoming'an inkiyiaa ang pee mikining nkikoot nikipuo dukuya aas anaa enikiiyieu. Kelioo anaa ketadamishie elipong olowuaru keru anaa enadamisho iltung'ana le taata. Kenyor oleng atanapa nkera enyena kake etoduaa anaa kolola le likai tung'ani pee eisho iyieunot oo seseni lenye. Meing'or naa ninye Enkai teina oitoi. Meata ake oltung'ani lemenyamaliki eramatare olmarei lenye makewon. Ore enkiikoo e Nkai te yiook naa kejo nchere meidip iyiook ening'oto ake. Enkirukoto naning'isho naata dupoto aitoki. Enkirukoto naning'isho to Rorei le Nkai nayau enyorrarroto o emayianata. Ore ena kitok, tenebo olkulikai tung'ana pooki lemurua netoning'o enkiikoo Olkinki. Kake etejo ninye "meeta enaasayu tenanu" Ore ake tenkoitoi naajio ena naa ekidamu nchere, "Meata Shetani enkitoria te nkishui ai." Kake ore meekure ebaiki nikirrashu aajo kegira ninye ainyial enkishui enkiyang'et ang.

Tayiolo kulo Kigerot to Ltau:

Iroma 2:13, *"Amu mme lelo ooning ake nkitanapat, isupati tialo Enkai, kake lelo ooitabaya nkitanapat eishori isipat."*

Yakobo 1:22, *"Kake entaa ilaasak lo rorei, mme ilainining'ok ake ilejileji ate."*

Timoteo le Dukuya 5:8, *"Te netii oltung'ani lemegolie iltung'ana lenyena neisulaki lelo tung'ana le nkaji enye, neiturrayie ninye enkirukoto, neaku torrono alang oleitu eiruk."*

Isoma enkatini e Achan te mbuku e Joshua e matua e naapishana. Ing'urai sii Intepen e Dukuya e Matua 2:7.

Mbaa Oltau:

Enkorrok oo Nkiteng'emat e Tipat:

1. Meyieu Enkai nikiaku iltung'ana ooning ake, kake pee kining nikiaas.
2. Keisiligi pooki tung'ani pee eramat olmarei lenye makewon.


Eimaki Nikurrakiki:

1. Eisiliga elipong olowuaru keru likae tung'ani pee eitoti olmarei lenye sapuk. Keata tipat oleng pee enyamaliki pooki tung'ani olee aashu enkitok olmarei lenye. Meatai likae (aa sirkali, kanisa, aashu ilturrurri leme ile sirkali) oorammat enkishui enye. Olola lenye inkera enyena.
2. Meidip ake duoo Ilomon Supati ening'unoto. Lasima pee kining nikiaas nena naaigero tiatua Ororei le Nkai.
3. Keiririkino pooki ng'ae te yiook pee eishu anaake anaa ketaa nkolong'i ang naabayie kuna tenkop. Eiririkine pee kirretena te lotunoto Olaitoriani.

Nkikilikuanat oo Ndamunot o Nkibirribirrat:

1. Ketii oltung'ani obo liyiolo oaata empukunoto nadamu nchere pee eramat sirkali aashu kanisa too nkulati enkishui enye?
2. Kaa pukunoto oo ltung'ana nara asipak too nkonyek e Nkai?
3. Ketii iltung'ana kumok oodamu nenyorraa taa nchere etataana e lotunoto o Laitoriani? Ainyioo pee inyorraa? Ainyioo pee minyorraa?
4. Kakua naataasate te walata e ng'oki e Akan pee eany ening e nkikoo e Nkai?
5. **Imbirribirra:** Idamu erishata nikinkooki pee miaas embae naje kake itaasa ake pooki kata? Kainyioo iwalat naatusu-jutua?

(**Esipata:** Matadamu aajo kesipa katukul lasima pee kiata ening'unoto kake kesipa sii inchere meidimayu pee eitajeu oltung'ani kewan te supatisho enye. Keitajeu iyiook empiris Enkai. Nejo Iroma 3: 21-26, "*Kake eibalunyeki taata esupatisho e Nkai neitu eimu nena kitanapat, hoo neishakenokito inkitanapat oo loibonok le Nkai o esupatisho e Nkai to rrekie le nkirukoto tiatua Yesu Kristo, te lelo pooki ooiruk. Amu meeta enepaashare; etaasa pooki ng'ok neitong'oro enkitoo e Nkai, neikenakini esupatisho te mpiris enye metaa enkishorunoto e pesho, te lakunoto natii atua Kristo Yesu, ilo oishorua Enkai metaa olkipoket to sarge lenye, ong'amaroyu te nkoitoo e nkirukoto. Ore apa ena naa keitodolu esupatisho e Nkai, amu ore te ng'iriata e Aisho enye, neitaa Enkai parmetii ing'ok naatulusoitie; pee etum aitadedeyie makewan neitusupat sii ilo oata enkirukoto tiatua Yesu.*")



Kirreshitoi te Kutukaji - 27

Etii apa ilchoreta aare supati, oloji Ole Nkiyang'et oloji Lormunyei, ena kop apa emanya pokira aare tenebo o Imareta lenye. Ore pee eiteru inkera enye aabulu, netum pokira aare enkuretisho nchere kaa eas pee etum endaa naitotiyie ninche. Nedumunye Lormunyei nelo ainosaki enkitok enye ena nyamali. Netum endamunoto pee eiteru esiaai enkiremore. Neasisho aanyok anaake aaturisho to Ichamba. Ore ake pee etaanu erishata enkisampuaare, neshipa oleng oleng pee edol aajo enoto emayian endaa sapuk.

Nejoki enkitok e Lormunyei olpayian lenye, shomo olchampa inkesa endaa pooki nao, kake etanya Lormunyei, nejo, "Mataanyu ometaba anaa neku endaa pooki pee atumoki ashomo ataasa enkisampuaare pooki te nkata nabo." Ore te ina rishata nemeata enataasa Ole Nkiyang'et o e nkitok enye terretenata olapa olotu. Amu eitu einyang'u olchampa neitu eun ai pukunoto nabo endaa naitotiyie nkera enyena. Eturua ninche esiaai. Kake ore ake pee edol esidano olchampa le Lormunyei endaa natii eo pee eikesi, netum olom sapuk oleng.


Nedumunye Ole Nkiyang'et o e nkitok enye aapuo olchampa le Lormunyei nepurroo endaa pooki nao natii. Ore pee elusoo nkuti olong'i nedumunye Lormunyei alo olchampa lenye aikes endaa nao nedol ajo meekure etii endaa. Neing'asia oleng neshuko alo ang aliki enkitok enye mbaa naataasate. Nebuak tengoro sapuk, nejo, "Aatiaaka apa pee inkes endaa ang eji nijo tang'asa ntasho penyo. Nina taata natupurroyioki pooki!" Nemut Lormunyei ajo karrip olchampa lang tena kewarie pee adol tenaa kaibung olapurroni. Ore enasirie nening oltung'ani otii atua olchampa neipirri alo pee eibung entoki ake ninye pooki nagira apurroo endaa enye nao. Ore tenkaraki nemenyorraa Ole Nkiyang'et pee eibung olchore lenye epurroo endaa enye, nesioki aitiak endaa nenyok aisik aipirri oleng ailany olikai. Ore ake enakata napuku tiatua olchampa nedol olamerani oirragita te mbata e nkoitoi, nedol ajo pooki ake pee

etumoki aisudorie olchore lenye entorrone naa tenejing ake atua enkutuk olamerani oirragita. Kake etoduaa naa Lormunyei asipu ajo ore ilo apurrone le ndaa enye naa olchore lenye Ole Nkiyang'et. Ore ake pee ebaya ine wueji neirragie olamerani nedol ajo meekure eetai ai wueji neton elo olchore lenye metelexu atua enkutuk ake olamerani. Nenyorraa Lormunyei pee eton arreshu olchore lenye Ole Nkiyang'et metupuku tenkutuk olamerani, neenikino olboony lolamerani. Ore o taata, eton ake erreshito Lormunyei Ole Nkiyang'et metupuku tenkutuk olamerani!

Enkorrok e Nkisoma:

Kerresh Shetani irresheta kumok too lairukok. Kerreshu te pooki saa, o te pooki rishata dorrop pee eibung'ie iyiook kulo rresheta. Meirura nemeyeng'iyeng'a etemita aibung'ie iyiook irresheta.

Eterretena kewan neisalaash nkaik pokira are pee etumoki aibung'a iyiook. Eikoo iyiook e Nkai nchere keitaakuno Shetani anaa menye le supatisho kake ore tesipata naa olalejani otem ajo aesek iyiook pee eibung to rreshet. Ore shetani naa olalejani, menye ilejaritin. Ore enkipirta enye kitok tenkishui naa pee eitang'or iyiook matabatata nikiaas ng'ok pee etumokini aaitong'oro enkitoo e Nkai. Kitiu anaa nkerra naatii atua isuyian oorreshito menoto erishata naporiparie iyiook. Eisdai eutaroto e Yesu taata anaa enatiu apake too larin 2000 ootulusoitie. Lasima pee kiaany Shetani nikirish te nkarna e Yesu Kristo.



Tayiolo kulo Kigerot to Ltau lino:

Enkiterunoto 4:7, *"Amaa tinias isupati emiking'amari? Naa teneitu ias isupati kigira ng'ok aarresh te kutukaji enkaji, naa iyie eyieu neibung kake eishiaakino nimir ninye."*

Petero le Dukuya 5:8, *"Enterretenata entashololoto. Emanimanaa olmang'atinta linyi, shetani, anaa olng'atuny, oikurrukurr eing'oru olonya."*

Matayo 10: 16, *"Eng'urai airriwayie intae anaa nkerra atua isuyian, enteng'enita anaa lasuriaa, niborrurru anaa nturkuluni."*

Yakobo 4: 7, *"Erisha oloirirua, naa keipirri ninye ailany intae."*

Ndung'eta e Rashe 24:33-34, *"Kang'as airura penyo, kang'as aimug penyo. Kang'as anunuk nkaik penyo ayeng'iyeng'a. Nikijing'aki osina iyie o sumash anaa olaisimani, nikijing'aki osina anaa oltung'ani otanape."*

Mbaa Oltau:

Enkorrok oo Nkiteng'emat e Tipat:

1. Entasho entorripisho anaake niminaururu igilunorere Shetani. Anaa enatejo Paulo, *"Tene measisho oltung'ani emincho enya endaa"* (2 IIsesalonike 3: 10).

Eimaki Nikurakiki:

1. Enchalan entonai enyamali pooki natii ena atini. Ore enchalan naa eng'oki. Ore ewalata enchalan naa aisinanishio.

2. Ore te seuseu ang taata, naa kenyamal Shetani erreshito lelo ooshal. Keeta ninye eyieunoto oleng anaa Lormunyei. Menyorraa aikata ninye embae mme ketimirishe. Kenare nikiaku kalamasi nikingarakino Yesu pee kindim aatapaashare kulo rresheta.
3. Ketii enkoitoi nikimirishore. Erisha Oloirirua to sarge le Yesu, naa keipirri ninye ailany intae.

Nkikilikuanat oo Ndamunot o Nkibirribirrat:

1. Kaa etaasaki pee eidimaki aatapaashare ena nyamali Ole Nkiyang'et eno Lormunyei?
2. Eimaki tipat e mbata e kuna arn e Shetani: Olalejani. Menye elejare, Olarruoni.
3. Kaja eiko oltung'ani pee eidim ataa supat anaa nturkuluni neng'enu anaa ilasuriaa?
4. Iimaki embata oo rresheta ooibala liyiolo likitarreshie Shetani aashu etarreshie ilchoreta linono.
5. **Imbirribirra:** Ketii orreshet oibala likitarreshie Shetani det? Kaa itaasa pee itapaashare aashu itijing'a ilo rreshet?

Olomoni le Meitoomono - 28



Etii apa oloti barnoti oji Masanja. Kenyor apa Masanja atotona te kutukaji enkaji enye aisoma mbukui. Ore nabo olong egira aisoma, nelotu olpayian moruo oji enkarna enye Olom aim embata eina aji nejoki Masanja amaa, katum sa enairrag amu etaa

kewarie. Nejoki Masanja A'a mitum enirrag, kake etanya naa olmoruo elo, nelo dukuya asai ajoki nchooki siaaki enairrag. Neitanyamal Masanja oleng o metalaikinoyu aisoma e mbuku enye. Nenyorraa Masanja aisho eneirrag enkolong nabo ake. Ore pee ekenyu, nedumunye Masanja alo aasisho to lchampa lenye, nelo ninye Olom sokoni emurua. Eidipa ninye atumuta too ndamunot enyena inchere etaa keton tenebo o Masanja. Ore etii sokoni, netumo Oloong'urrat, olchore lenye apa musana. Neinosaki esidano enkaji nairraga. Nejoki Loong'urrat, "Imayiana nabaa." "Ore ilchoreta laainei tenebo nanu naa keyieunoyu pee etum eneirrag." Nejoki Olom, kesipa katukul itumutumu olgilata lirragirraga. Ore eton eitu elusoo entadekenya, nepuo Olom, Oloomonko, Olenkiba enkaji e Masanja.

Ore ake pee eshukunye Masanja te siaai olchampa lenye neirrashu nchere kebore ilarruok atua enkaji enye, netem ajo aaraa neany epuo. Nejoki, "Miindim doi iyiook, nekueniyie ninye. Neishir Masanja. Ore too nkulie kuti olong'i, neitoki Masanja aigil aton te mbata ekutukaji e nkaji enye, nepal enaisoma neton aisanano aing'ode enterit natii abori nkejek enyena. Nelotu olchore lenye supat aim embata eine neyiolo enyorrata nanyor oshiaake Masanja aisoma mbukui, neisho ninye embuku naji Olning'o Ng'ejuk. Neiteru Masanja aisom eneitu aikata eitoki airragie ometaba anaa neidip embuku pooki.

Neshipa oleng anaa pee ening nchere ketii oltung'ani obo oata enkidimata nalang ene lelo arruok pooki otii enkaji enye. Nedumunye Masanja aipirri alo enkanasa aitoomon Yesu pee eton tenebo ninye, nenyorraa Yesu te nchipai. Ore ake ejing Yesu enkaji e Masanja, Neng'orunyie Enkiba ajo "Keiding'a ena aji, meekure ayieu nanu natii ena aji." Nedumunye alo. Neiteru obo oo obo, neuro ilkulikai nkitolonyat oo nkorroki enye, nedumunye airukurukore ninye. Ore naa tenakata, neidipa ilarruok aashom, ina pee eiteru ilchoreta le Yesu aajing atua aji. Ore tenkiti rishata dorrop, neiteru enkaji e Masanja aaku enkaji Eseriani ene Nchipai ene Nkirukoto eno Lkuaak sidai o e Nenyorrata. Meekure eisinanuo, kake keshipa taata amu etaa kebare enkaji iltung'ana supati, meekure aa iltung'ana torrok ootii.

Enkorrok e Nkisoma:

Empukunoto oo Itauja lang enkaji e Masanja. Tinimikirrip iltauja lang aaitobiraki, nerasaki iyiook ilmang'ati, nejing'aki, nemir iyiook tengolon. Ata hoo duo netung'uayie Yesu ena kop, neitu eing'uaa iyiook mikiata eretoto o e nkidimata. Eirriwaka iyiook oltau Sinyati, olaa ore ake pee kincho metamanya iltauja lang, nemeitokini aata erishata e Shetani o Loiriruani lenyena. Ore ake pee eaku keishu e Nkiyang'et nesipa tiatua iyiook, nikinturraa ng'uarrat ang o ntokitin ena kop. Ore olarrabal le mpushuna tiatua iyiook naa kemiri te Nkiyang'et Sinyati.

Tayiolo kulo Kigerot to Ltau lino:

Yohana 17:15-17, *"Maomonoki intayu ninche tenkop, kake pee intajeu iyie ninche teilo torriono. Mme le nkop ninche anaa enemara nanu ole nkop. Intisinya ninche tesipata ino. Esipata ororei lino."*

Ilgalatia 5:16-17, *"Kake kajo nanu enchom te Nkiyang'et nimintabayaya iyieunot osesen; amu ore iyieunot osesen*

negilunore ine Nkiyang'et ore iyieunot e Nkiyang'et negilunore ino sesen, amu mening'o pokira are neaku mindimidimi aataas nena niyieuu niaasiasa."

Yohana 14:23, *"Newaliki Yesu ajoki ninye, 'Tenaanyor oltung'ani nanu, keibung ororei lai, naa kenyor Papa ninye, naa aikipuonu enetii ninye nikimany nebo o ninye.' "*

Ilkorintio le Dukuya 10:20b, 21, *"Manyorraa pee ing'ar erubata ooloiriruani. Miindim iyie atooko ina kikompe o Laitoriani nintoki e noo Loiriruani: nimindim ataa olang'ar emesa o Laitoriani neng'arie sii enoo loiriruani."*

Matayo 12:29, *"Keidim oltung'ani atijing'a enkaji oltung'ani ogol neya ntokitin enyena, eitu eng'as aen ilo tung'ani ogol? Pee etum aawa ntokitin e nkaji enye?"*

Ilkolosai 3:5-10, *"Entaar naa metuata tiatua intae, nena naara ine nkop; aa enkiborra oo nkonyek, iloiererioni, olorok, ng'uarrat torrok, olodoong'u, eomonoto oo nkitanyaanyukot naaitae nkaitin. Te kuna baa elotu e ngoro e Nkai. Kuna apa ipuoyieyie eton itii atua ninche. Kake ore taata, ewuang'ie nena pooki: aa ewuapa, engoro, enkiba, esukeny, o lderrat torrok oing'uaa nkutukie inyi. Milej olikae olikae idolitata aajo ituburukushutua enkewan musana o rrekiei lenyana. Ninchopo enkewan ng'ejuk, naitang'ejuki teng'eno metanyaanyukie ilo oitayio ninye."*

Mbaa o Ltau:

Enkorrok oo Nkiteng'emat e Tipat:

1. Mincho ake Shetani menoto erishata to ltau lino.
2. Teneitore Enkiyang'et Sinyati enkishui ino nemeitoki naa Shetani aata erishata tenebo oloiriruani lenyena.

Eimaki Nikurakiki:

1. Etii atua oltung'ani nchot are naara to larrabal le nkitoria Nkiyang'et Sinyati o e nkewan osesen. Meidimayu pee kisiaai e Nkai o Shetani tenkata nabo.
2. Keishiaakino pooki te yiook pee king'uaa ntorrok pooki enkorrok enkop neishop terishata e nena naatung'uyie enkewan ng'ejuk naing'uaa e Nkai, ilo oitobirua.
3. Lasima pee kincho ate metaa e Nkiyang'et e Nkai narikoo iyiook. Ina ake enkoittoi naidimie iyiook matimir enkewan enkorrok oo seseni lang.

Nkikilikuanat oo Ndamunot O Nkibirribirrat:

1. Kainyioo doi pee eitu eidim Masanja atarai ilomon lenyena arruok?
2. Mpoto sii iyie nkarna olkuaak le nkewan "musana." Nimpot nkarna olkuaak le nkewan "ng'ejuk."
3. Itetema sa aikata aisiaai e Nkai too Mampilini nintoki aas anaa eniyieu iyie ake terishata e wiki nikirikino inkitanapat Enkai? Amaa, keitobirari?
4. **Imbirribirra:** Kanu ibayie itoning'o kigira e Nkiyang'et Sinyati aretu ina kata itii atua enyamali?

Entarakuet Kalamas - 29

Ore nabo olong nedumunye entarakuet alo aparana te ntim, neirrib oltome shore lenye. Ore ina kata egira aairo, neibalie entarakuet ajo nanu oshi nagol alang oltome. Nejo, ore pee esipayu naa kalo aing'oru enkeene naado pee eenikini enkeju edukuya oltome pee eyiataa aitadoyio te ndoinyo apik atua olkeju. Nenyorraa oltome tenking'asia sapuk oleng ena kitukujata entarakuet. Ina taa pee eng'ututakino entarakuet entim neisarisaraki olkeju. Neinepu olmakau shore lenye, neigil alikioo enkatini naijio enapa natoliko oltome. Nelikioo nchere keidim ateyiatai olmakau tiatua enkare neilepie aya atua entim. Nenyorraa olmakau ina kitukujata entarakuet.


Neipirri entarakuet alo ang, neshukunye asieku eyietita enkeene naado. Neeniki enkeju edukuya oltome, nejoki, nchoo taa pee ining entinkil enkiti tuala entarakuet tolkeju ninteru ayiataa enkeene. Ina taa pee eisarrisar alo aitoki aeniki sii olmakau enkeene enkeju edukuya. Ore ake pee eidip ateeniki nejoki, nchoo taa pee ining entinkil enkiti tuala te shumata entim niyiataa enkeene. Nelo entarakuet embata olchani ooigut penyo otii enchumata endoinyio aosh entuala. Ina taa pee eiteru oltome o lmakau aayiata maate, nesioki aaing'asiakino enkidimata engolon enkiti tarakuet. Ore erita enkima pokira aare enyokita aayiata aadol aajo kalo ogol, kegira ake ninye entarakuet aton tentonata olchani akueni oleng.

Enkorrok e Nkisoma:

Ore anaa enatiu ena kiti tarakuet naeseka olmakau o ltome metaasa eyieunoto enye, keetai sii taata iltung'ana oasishore ilchoreta lenye too nkoitai torrok. Kesesh eibala ele oseki le nkitoria oo ndamunot oo ltung'ana tiatua sirkali. Tujurru sii iyie osiasai o enkumoi oo nkisiligat enyena elejare eton eitu eoshi enkukuo. Ore ake pee egeluni, nerikino nkisiligat pooki naisiligie iltung'ana, nemeitoki adamu lelo pooki ootonyuaa pee

egeluni. Neaku ilomon lenyena pooki ootejo ile pesho amu keiroro apake ilomon ooitabaiki ninye enkiting'oto eyieunoto enye. Ore tosina naa ore tiatua nkanas ang naa keitobir ilarikok kumok nkipankat, neesek neitore ndamunot oo ltung'ana pee etumoki aaitabai iyieunot enye nemeitoki ashilaa iltung'ana.

Ore te kulie rishat naa keitaa ilaisikak loo larrabal (*refugees*) tenebo nkera ilong'oi tolarrabal. Enkiaas ena torriono oleng te neasishoreki iltung'ana. Keinyiang'u ilarikok le Kanisa engolon enkidimata enye too ropiyiani, o nkishoorot, o nkisiligat e pesho naa ai pukunoto torriono enkitoria oo ndamunot oo ltung'ana ina nkae. Ore tenkaraki mbaa naajio kuna, nelau iltung'ana esipata tiatua ilarikok amu, keaku meata ake oltung'ani lememus nchere ore kulo arikok naa iloo nkulati enye ake maate to mbaa enye naatii dukuya ninche, naa keasishore eng'eno eina kiti tarakuet pee eyiataa ate aailepie neitadou olikai orere.



Tayiolo kulo kigerot to Ltau lino:

Yeremia 9:8, *"Embae esayiet olng'ejep lenye; keiro ninye te lejare; ore tenkutuk enye meatai ake olemeirorie ole latia enye te seriani, kake ore tiatua oltau lenye neitobiraki ninye orreshet."*

Olkerempe le Nkai 146:3-4, *"Mipik osiligi lino ilkituaak, mipik atua tung'ani lemetii eretoto atua ninye. Tenepuku enkiyang'et*

enye nerrinyokino ninye enkop; ore teina olong neish nkitobirat enyena."

Ndung'eta e Rashe 6:16-19, *"Etii ntokitin ile naaiba Olaitoriani;oltau oipiru ndamunot torrok, inkejek naasioyo akuetiki enetii entorroni....."*

Olkerempe le Nkai 101:7, *"Meatai oltung'ani oas esunkureisho obik tiatua enkaji e Nkai; meatai oltung'ani oiro elejare oton te dukuya nanu."*

Enkiterunoto 27:1-17 - Isoma pee iyiolou enaikuna Rebeka o Yakobo pee eesek Esau.

Enkiterunoto 12:10-20 - Isoma pee iyiolou enaikuna Abraham pee elej Farao.

Mbaa Oltau:

Enkorrok oo Nkiteng'emat e Tipat:

1. Enkitoria torrongo oo ndamunot oltung'ana to losek, olosek lelejare o losek oata nkipankat e dupoto netaa enyamali nagol osina eitasurisho too nkuapi kumok.
2. Einyiala elejare olosek enkisiligata tiatua enkumoi oo ltung'ana.

Eimaki Nikurrakiki:

1. Ore eng'eno naibalunye entarakueta naa eng'eno olosek lelejare, ene nkitoria torrongo endamunoto olosek o e nenyorrata e makewon. Mesidai katukul ina oitoi kake kesipa inchere etaasishoreki ina oitoi oleng neme ake duo te sirkali ake, kake tiatua sii iloshon pooki. Netii sii ina damunoto torrongo atua kanisa.

2. Meekure apa etii enkisiligata atua ilarikok too rishat kumok amu meetai ake olememusajo ore ilkulikae pooki naa dupoto emaat e ake eshipakino neesishore "eng'eno e ntarakuet" pee elo dupoto enye dukuya.
3. Keeta e Nkai enkidimata pee elimu enkiba Enye naiba olosek lelejare o monko.

Nkikilikuanat oo ndamunot o nkibirribirrata:

1. Kainyioo "eng'eno e ntarakuet te sipata?"
 2. Inyorraa iyie ena kioroto najo nchere ore tiatua iltung'ana lang pooki naa ore ilarikok kumok naa ate ake enyor aaitudupoi neasishore e "ng'eno e ntarakuet"?
 3. Tolimu sii iyie enkitanyaanyukoto e kanisa aashu ene sirkali nataasishore ilarikok enkitoria oo ndamunot olosek pee etum dupoto e maate.
- 4. Imbirribirra:** Amaa ekitetemaki sa aikata pee iasishore "eng'eno e ntarakuet" tenkaraki dupoto ino makewon

Olola le Keeya - 30



Etii apa ilchoreta aare oomanya enkop nalakua too larin kumok oleng, kake etadamutua pee eshukunye ang. Ina taa pee edumunye aarrinyo aapuo enkop enye nalakua. Ore eton eitu epuo enelakua neinepu oltorroboni obo orita oltome. Ore pee eidip aataretu oltorroboni aatar oltome, nenap pokira aare nkiri tenkaraki enkoitoi enye. Ore ole ledukuya nenap oloti dung'oti le nkiring'o ooidip ninye ake too nkuti olong'i enkoitoi, nenap ninye ole liaare oldung'oti sapuk oleng. Ore eton etii enkoitoi aa dukuya epuoito neinepu enkolii natua.

Nedung'u ole le dukuya oloti dung'oti le nkiring'o, kake ore ole liaare naa keeta olorok neitoki ake adung'u oldung'oti sapuk oleng. Ore eton eitu epuo enelakua etii enkoitoi nedol enkurma oo nturuja (*mushrooms*). Neitoki ake, ole le dukuya asotu inkuti naa emborei enkaina ake, kake neruj ole liaare olbene lenye ometaba anaa neeku kedoku ilmampuluni loo nturuja. Neaku, ore ele ola pooki sapuk otoponari ojo pee eretunye kewon tendaa neidimua ninye amu etuluso enkidimata enye. Ore pee edolu enchan sapuk etataana nejo pokira aare matudung enkoitoi aasaru ena tim.

Ore ake enajing'ie entim, neideketari ole liaare aideketakino engumoto sapuk oleng. Nesioki ina kata ake aipot ole le dukuya, neomon ajoki tasaruaki ilepunyieki matupuku te ngumoto. Nenyorraa ole le dukuya, kake etiaake, "Iroishi naa doi tenebo olbene lino obore oleng. Tung'uai olbene lino te ngumoto amu ina kata ake aaidim ailepunyie aitobiraki." Kake neany ole liaare eing'uaa olbene lenye oirosi te ngumoto.

Netem olee ledukuya ajo aret ailepunyie tenebo olbene lenye oiroshi tenkiti rishata ake, kake etaa enkidimata enye pooki ene pesho. Neiteru ina kata enchan sapuk oleng asha, neiteru engumoto aaku keiput nkare. Nenyok olee liaare ajo aitajeu olchore lenye kake etomitikio emponet enkiroishi olbene. Ore tenkiting'oto, neimis olee liaare tiatua enkare, neibung'ita olbene lenye akurraki.

Enkorrok e Nkisoma:

Ore o yie, olchore lai, ming'uar ake karsisisho ena kop. Tusulu taata olola lino le ng'oki amu ore ake pee ias ina nitupukuo te ngumoto naa itum olekoisiaayio te shumata. Etiu taata ilkumok lang anaa oltung'ani otanya eitung'uaa kewon olola lenye ata tenaa keeya eiting'oki. Ketii ng'ok enkishui ang inaa ekiaany katukul eing'uaa iyiook. Ekinyor nena ng'ok, ekiyenikino, nikintoming'an ilukuny ang te nkikoo najoki iyiook nchere ore olmushaara loo ng'ok naa keeya. Kake amaa esikar enkop keishiaakino enkiguana torrongo oo ntarasi? Keata tipat oleng pee kidamu nchere ore iyiook pooki oopotieki enkarna Enye netisipe meekure kira olorere le nkop tesipata, kita ilomon, ilaisikak, ilalotok oopoto ake. Keisiligita iyiook Enkai pee kitoni te nkishui nasinya. Keyieu nikintisiny enkishui ang aaiwuang'ie pooki pukunoto olduruk anaa enkiborra oo nkonyek, iloirerioni, ng'uarrat torrok o eului. Ilolan lelo tiatua e nkishui ang.

Tayiolo kulo Kigerot to Itau Lino:

Petero le Dukuya 1:17-19, *"Naa tenaa impotipoto ninye aajo Papa, ilo oiguenare pooki metii enyorrakinoto eng'ura ate entotoni tenkuretisho tena rishata anaa ilaisikak. Iyiololo aajo, etalakuaki intae too rrekiei linyi lemeeta tipat litujung'utuo too loo papai linyi, mme too ntokitin naarruoyo anaa enkosholai o sahabu. Kake tosarge ogol enkinyiang'a le Kristo, otiu anaa olkuoo lemeeta entioto anaa entibili."*

Petero le Dukuya 2:11, *"Ilanyor laainei asai intae, anaa ilomon olaisikak pee ipaasharere ng'uarrat osesen naashet enjore naarare iltauja linyi."*

Indung'eta e Rashe 14:9 "Kemen ilmoda enkirridunoto oo ng'ok kake ketumi imbaa sidain tooltung'ana supatioure Enkai."

Iroma 6:23, *"Amu ore olekoisiayio loo ng'ok naa keeya; kake ore enkishorunoto e Nkai e pesho naa enkishui oo ntarasi ti atua Kristo Yesu Olaitoriani lang."*

Esekiel 33:10, *"Ore nkitarruorrot ang tenebo ing'ok ang netii shumata iyiook, nikiishunye iyiook pesho te nkaraki ninche, kaji naa kinko tinikinchi?"*

Ile Efeso 5:3, *"Kake ore eloloito o loirerioni pooki aashu ng'uarrat torrok, emincho ake eipoti tiatua ntae, amu ina naishiaakino tiatua isinyat."*

Mbaa oltau:

Enkorrok oo nkiteng'emat etipat:

1. Ore iyiook pooki naa ekira ilomon olapuoyiak tena kop.
2. Ore olmushaara loo ng'ok naa keeya.

Eimaki Nikurrakiki:

1. Ekira pooki ilomon tene. Meiririkino pee kincho meteeni iyiook tiatua ng'uarrat enkop o sikarri naaitapong'oo neitorikino iyiook enkitashoto erishata ang anaa ilaisikak. Keishiaakino pee kiaaku ilooata orrekie sidai tiatua iloreren lemeiruk paa tenedol nkiaasin ang sidain netum ewalata naisho e Nkai e nkisisa (Petero le Dukuya 2:12).

2. Keidim ng'uarrat aatoriku keeya, to sesen o tenkiyang'et. Tadamu olee liare otusulakine engumoto negor enkare neng'uoyu nkiri neing'usilu!
3. Tenemetii enkirridunoto, nemetii empalakinoto oo ng'ok. Ore anaa enikipuo dukuya too ng'ok nelaakini iyiook te keeya.

Nkikilikuanat oo Ndamunot o Nkibirribirrat:

1. Idolita iyie anaa ira olaisikani te nkop? Ainyioo pee ira? Ainyioo pee mira?
2. Kainyioo pee etipikaki ng'uarrat torrok esiana olduruk leloloito, o enarata metua, etc.?
3. Ketii pasa doi enchipai enkop naje naibala naata tipat alang enkishui oltau?
4. **Mbirribirra:** Ketii pasa eng'oki naje naibala nikimbokito iyie tiatua enkishui ino?
5. **Mbirribirra:** Amaa tenedol lelo leitu eiruk enkishui ino sidai tiatua Yesu, keisis ninche Enkai tenkaraki esupatisho ino?

Emotonyi Nemeishopo - 31

Ore nabo olong nelo emotonyi aing'oru ilkurt oonya. Eitu sii duo eshipakino pee eing'oru ilkurt kake, etayiolo nchere ore ake pee elau ilkurt oonya naa keye. Ore egira aturu ilkurt nening oltoilo oipotisho te nkoitoi, "Ilkurt oomiri, ilkurt oomiri, ilkurt sapuki, ilkurt kutiti, ilkurt oopir, ilkurt ronkeni. Wou pee itum ilkurt linono tenakata nji." Nepal emotonyi enturunoto oo lkurt neipirri alo ine netii oltung'ani omirta ilkurt. Ore pee eikilikuanu esiana oo ropiyiani naamirieki nejoki oltung'ani, "Oh, kesipa kelelek oleng- enkopiro nabo ake tolkurto obo." Neshukokino emotonyi aing'or osesen lenye nedol ajo keeta nkopir kumok neinyiang'u embata oo lkurt. Nelo etishipe.

Ore taaistere neitoki aning oltoilo oipotisho, "Ilkurt oomiri, ilkurt oomiri," Nesiooyo alo neinyiang'u ilkurt ooiririkino enkolong nabo. Neshipa oleng. Neeku kelotu ake ele tung'ani omir ilkurt te nkolong elusoo enkae aim ine netii emotonyi kiti pee einyiang'u ilkurt. Ina taa pee eiteru ashalu emotonyi tenkaraki meekure eturu ilkurt.

Ore nabo olong neiteru airopiju. Neiteru emotonyi kiti aikirikira. Nening enkirobi enkijape nemeyiolo ajo kainyioo. Ore pee edol osesen lenye nedol ajo meekure etii hoo enkopiro nabo natelekua! Neirut ajo keye amu meekure eeta enkopiro nabo. Ina taa pee eiteru aturu ilkurt, neturu, neturu, ometaba naa neiput olbene lenye pooki ilkurt. Basi, ina taa pee eton te mbata olbaribara arreshu olamirani loo lkurt. Ore ake pee ebau olamirani nejoki ninye, "Lele, tudumu iwa ele bene loo lkurt pee kishukoki nanu nkopir aainei pooki." Nejoki olee meidimayu pee aashukoki nkopir inono. Neisininuo emotonyi kiti oleng neinosita enkijape. Ore te nkiting'oto neim enkijape oleng o metua amu meekure naa eeta entoki naaiboorie enkijape amu etimira naa nkopir enyena pooki.

Enkorrok e Nkisoma:

Tujurru sii iyie eneikununo enkiterunoto - enkopiro nabo kiti tolkurto. Ore ake pee eng'amaa emotonyi ilo kurto obo netum Shetani erishata nagol tiatua oltau lenye. Etiu Shetani anaa ele amirani loo lkurt. Keisish Shetani oltung'ani menoto esirai o e sikar nemeeta enkuretisho o nkiaasin eng'oki, nesipaki ninye nchere meeta kusaka aashu inchere meeta imbaa torrok naaponu. Ore eton eitu eirrashu, neidipa Shetani ateena ninye katukul. Eidipa Shetani aibung'a enkishui enye pooki telulung'ata neng'adie e Nkai. Keishiaakino ake pee emut pooki tung'ani tenaa keishu pee eitiship enkorrok enye aisho Shetani metuutai tenkishui enye aashu ebik eishu pee eitiship e Nkai. Neeku, interu taata inkilikuana kewon ino nchere, "*Kaishu pasa doi nanu pee aitiship ng'ae – Enkai aashu ekewon ai?*"

Tayiolo kulo Kigerot to Ltau:

Ile Efeso 4:27, "*Emincho sii Sheitani erishata.*"

Ilgalatia 6:7, "*Emilej ate; mederrieki e Nkai. Amu naaun oltung'ani elo ake sii aisampu.*"

Ilsesalonike li are 3:10, "*Ore doi ninye ina kata kiboitare intae nikinchoo intae ena kitanapata: Tenemeasisho oltung'ani emincho enya endaa.*"

Ilsesalonike li are 3:3, "*Kake eisiligayu Olaitoriani naa keitagol ninye ntae nerrip ntae te ntorroni.*"

Mbaa Oltau:

Enkorrok oo Nkiteng'emat e tipat:

1. Aing'en Shetani. Keeta nkoitoi oo losekin naarik oltung'ani eikeno nkonyek o meitabaiki keyea enye.

2. Keeta eseshata oontokitin ena kop enkiting'oto torono.

Eimaki Nikurrakiki:

1. Kelelek eleji emotonyi kiti. Keishu ake ninye taata kake merreten entaisere.
2. Ore ake pee etum Shetani enkiti rishata; nchololoyu! Amu kegol taa pee intoki adotu kake eisiligie iyiook Enkai pee eretu iyiook matimir ninye.
3. Keisilig e Nkai oltung'ani obo oo obo metanapa erubata enkorrok esiaai tenkishui enye. Neaku taasisho te yieunoto nimisilig kulikai tung'ana mikitaretu anaake.


Nkikilikuanat oo Ndamunot o Nkibirribirrat:

1. Iimaki sii iyie kulie oitoo naaidim Shetani anotie erishata te nkishui ino.
2. Ore tenkaraki enimikiindim aataarare Shetani oopeny, kainyioo Ilkigerot too Lomon Supati ooidim aataretu iyiook neisho osiligi?
3. Amaa enkiroto e Paulo najo, "Tenemeasisho oltung'ani, emincho endaa" amaa, keasisho ena kiroto too ndamunot oo ltung'ana oo rook? Aainyo/ Ainyioo pee measisho
4. Ketii oltung'ani obo liyiolo oonyaanyukie ena motonyi; oltung'ani obo liyiolo eloito keeya tenkaraki eitu eshilaa entaisere?

5. Imbirribirra: Inoto sa aikata entoki pesho? Naa kainyioo ina? Kesipa nchere enepesho?


(Esipata: Kejo Marko 8: 36, "*Amu ainyoo edupore oltung'ani, tenetum enkop pooki neiturraa enkishui enye?*" Nejo Ndung'eta e Rashe 14: 12, "*Etii enkoitoo naliioo to ltung'ani aa sidai, kake ore enkiting'oto ene naa keeya.*" Nejo sii Ilgalatia 6: 4-5, "*Enchoo ejur pooki tung'ani esiaai enye, paa tenetonyorrayioki netum aisisa kewan neme to le latia enye; amu enap ake pooki*

tung'ani olola lenye makewan." 2 Ilkorintio 10: 4-6, "Ore imasaa nikiarare neme ake imasaa o larrabal; kake keeta nkunaang enkidimata e Enkai, enaa keparripar isempewueti. Eikiparripar iyiook enchankar oo monko; o pooki toki naitashe to lwuasa aibooyo eyiolounoto Enkai; nikimbung aaen nkibirribirrat ake pooki metoning'o Kristo; naa ore pee eaku italaari aaishoru ate katukul, nikiterretenate pee kintame enkiaas pooki e ilo lemening'isho.")



Emuto! – 32

Bujumbura namanya Jani, enkop e Burundi. Neeku Elisabet elatia enye enkairukoni e Kristo, neshipakino Elisabet Jani teneirorie ninye aliki enkipirta enkishui enye, neliki sii eneba esapuko e dupoto teneishu oltung'ani ti-atua enkishui e Kristo. Naa, oltung'ani onyor ilotot olpayian le Jani. Neata nkutiti kera.



Nejo Jani, ore apa eton ara enkiti kerai naa kayieu naaku enkairukoni e Kristo kake ore taata meekure aatayie esirai mbaa naaijo kuna enkirukoto. Meekure aata erishata pee adamu enkoitoi e Kristo. Ore ake erishata pooki naaipung olpayian lenye alo e safari neipung Jani aing'uaa nkera enyena te nkaji aa ninche ake oopeny pee elo aing'oru ilewa. Nelo aranyaki ilewa nelu nkajijik emerai. Naa ore ake pee edol elatia enye ajo kainyioo nagira aasayu te nkishui e Jani o tenkoitoi naaitaasita nkera enyena, negoro elatia oleng. Netum ninche osina loo nkera te nening eishir kewarie nemetii oltung'ani oilejilej. Ore ake pee eshukunye olpayian alotu ang nedumunye oltung'ani obo lelatia enye alo enetii neliki pooki toki nataasa enkitok enye ina kata etiooyo te safari. Neliki enaikuna enkitok enye pee eikenoo nkera te nkaji neipung alo aranyaki ilewa nelu nkajijik emerai. Ore ake pee ening olpayian lenye nena tuun pooki neiteru aidong, ata hoo duo tenenuta Jani enutai oo lapaitin okuni neshomo ake dukuya aidong ninye.

Ore tenkaraki nemetii oltung'ani hoo obo otijing'aka amitu neidong ninye o metua. Eibaitie elatia enye pooki ena kitok tenkaraki intuun enyena o e loloito. Ore eton eng'or keeya enye nedamu Jani nchere ore eng'amunoto e Kristo naa enkiturraroto e nkishui enye. Ata te nkolong e keeya enye,

neitu eyiolou ajo keye apa ina olong. Tenemutu apa etang'amayie Kristo anaa enagira apa ilkumok aautaki pee eng'amaa, naa anaata apa eitu eye teina olong too nkaik olupayan lenye.

Enkorrok e Nkisoma:

Ilalashera laainei lanyor, mikiyiolo esaa aashu erishata e keyea ang. Materretenata anaake. Emikiaanyu mataa iltang'-atang (moruak oleng) pee kitumoki aatang'amai Kristo. Kelotu erishata te mbata ekulikae lang te enkishui ang naibeleyen Enkai enkomom Enye aitung'uaa iyiook neitarasaki iyiook Shetani. Ore ake pee kipuo dukuya tiatua ng'ok nikiany katukul kining enkipototo Enye o nkiteng'emat enyena nelam iyiook too ng'uarrat oo ng'ok enkorrok ang o too ng'uarrat eloloito.

Ore enkirukoto Olkristiano neme enoo ltung'ana moruak ake. Kebaa esidano teneiruk olbarnoti Yesu anaa Olaitoriani Olaitajeunoni neitoki ake aata enchoto pooki enkishui enye pee enyorrie neisiaiyie Enkai. Ore ake pee eye oltung'ani nemeitokini aata osiligi aashu erishata naitoki aishorie Kristo enkishui enye. Kenare nikigelu aisai Olaitoriani eton kinchu.

(Esipata: Kenare sii neirridu neibataisi oltung'ani pee eaku olairukoni le Yesu - Iasat 2: 38; Ilgalatia 3: 27. Ing'orai sii Ilhebrania 9: 27).

Tayiolo kulo Kigerot to Ltau lino:

Ilkorintio liare 6:2, "*.... Ng'ura, taata ina kata namunyak; ng'ura taata ina olong enjeunoto.*"

Ilfilipi 2:12, "*Ore naa ilanyor laainei, anaa enitoning'ishote oshiaake neijia sii o taata mme ake anaa atii kake eisul oleng matii, entabai enjeunoto inyi tenkuretisho o te nkishirikirata.*"

Iasat 4:12, *"Meatai tukul likai otumieki enjeunoto, nemeatae ai arna naishoruno tiabori shumata, naishooki iltung'ana pee kijeunye."*

Yeremia 8:12, *"Ketukurrutua ninche ina kata pee eas olminong? A'a, eitu ninche ekurru tukul; menya ninche orere. Neaku kebatata ninche tiatua lelo ootabatata; ore ake pee aitame namu ninche, nenang'ari ninche Olaitoriani ojo."*

Mbaa o Ltau:

Enkorrok oo Nkiteng'emat e Tipat:

1. Enchoo pooki tung'ani obo oo obo olee aashu enkitok emut asuj aashu eany Kristo.
2. Meatai hoo obo olee aashu enkitok nayiolo enkolong ekeeya enye. Terretenayu!

Eimaki Nikurakiki:

1. Tenakata dupoto eng'amaroto e Yesu - mme enkimutioto e ai olong, e wiki, olapa aashu olari.
2. Keeta oltung'ani elakunoto engulunoto - keidim ategelu enkishui aashu keeya.
3. Ore edung'oto enayieu neetayie enkishui nemeish naa kedamu eton etii ena kop.

Nkikilikuanat oo ndamunot o Nkibirribirrat:

1. Ketii elatia ino oltung'ani obo onyaanyukie ena kitok enkatini?
2. Kainyioo indim ataasa pee iretu?
3. Ijo iyie keitagor Enkai ing'ok naatii taata enkop pooki? Ingero sii iyie ilkigerot le Bibilia ooitisip endamunoto ino.

4. Amaa tenemutu apa ira olpayian leina kitok ias enataasa ninye tengoro?
5. Idamu iyie ajo anaata etomitutuo elatia ninye ina kata pee edol earita olpayian lenye metua?
6. Keeta esiaai Olarikoni le lero tipat oleng?

7. **Mbiribirra:** Kainyioo enkikoo nindim aishoo olbarnoti alashe aashu enkanashe ino naagira aadamu nchere eisidai oleng teneng'as aarreshu ometaa moruak oleng pee eiruk Kristo?

(**Esipata:** Kejo Ilhebrania 9: 27, "*Naa ore anaa enaitanapishoteki metuata iltung'ana nabo kata ake, ore pee elusoo ina nelotu enkiguana.*" Nejo Ilgalatia 6: 8, "*Ore ilo ounoki enkulupuoni o e nkewan o sesen nelo aisampu teina kewan o sesen erruorroto...*" Nejo Luka 13: 3, "*Ajoki ntae, mme neijia; kake teneitu irridudu sii ntae nindaayaya aaiko neijia.*" Nejo 1 Ilesalonike 4: 3, 7, "*Amu ena eyieunoto Enkai te intae, enkitisinyata inyi, entalam eloloito....Amu eitu eipotoki iyiook Enkai olduruk kake atua esinyatisho.*" Nejo Iasat 2: 38, "*Erridutu pooki tung'ani, neibatisai pooki te intae te nkarna e Yesu Kristo, pee epalakini intae ng'ok inyi; naa ing'amumu enkishorunoto e Enkiyang'et Sinyati.*" Kayieu najo sii enkiti naipirta olpayian. Ebaiki etamoo enkidong'oto oo nkituak, naa kesipa etaasa enkitok embae torrano kake etiu anaa meeta olpayian olng'ur katukul. Anaata eirorie enkitok enye netum enkoitoi pee eirridu enkitok neyioulou sii indamunot enyena tenguton inchere ainyioo pee eyieu nelu aing'oru ilkulikae lewa. Ebaiki neeta sii olpayian enyamali kake medolita kewan. Anaata etadamua sii olpayian ina kerai natii enkoshoke enkitok enye.)

Ailany Keeya - 33

Etii apa olkinki obo karsis oleng. Neeta enkaji sidai oleng, masaa kumok biot, olchampai ooata ilng'anayio sidain oleng. Neeta esiaai enye dupoto naidimie metesheta nkajjik sapuki naashumishore netur ilchampai sapuki oleng.

Ore nabo olong egira ayeng'iyeng'a te nkaji enye, nelotu olomoni nejoki, *"Oltau lino ayieu naya!"* Nemeyieu olkinki keeya, nesai, nesai aigil o meturru moi meshomo. Neirut airut oleng neirrag aiperipera te nkop nemeyiolo enaiko pee eilany keeya. Neipot enkitok enye o nkera enyena, o sinkan lenyena nejoki, *"Entasotu pooki toki ang. Ekiisik taata aaing'uaa ena aji!"* Ina taa pee eirot ilolan lenye pooki neipung aasioyo aapuo elototo enye, neata osiligi nchere meekure einepu olomoni aya oltau lenye. Nepuo inkolong'i kumok te nkoitoti o metabana nana nauru netoni te mbata oloti shamba aayeng'iyeng'a. Nepuku enkitok ti aji, neiroroki olkinki olmarei lenye, neisho endaa o enkirragata egira aaing'oru enkaji ng'ejuk. Neishiu olkinki enkuretisho nchere eilanya keeya natisipe.

Ore adake teina teipa, neshukunye olupayan le nkitok alotu ang. Ore ake pee eiroroki olkinki neyiou nabo kata nchere olapa omoni ilo oyieu oltau lenye. Neiroroki olomoni olkinki nejoki, *"Kashipa oleng pee aadol tene, tiatua enkaji ai. Kaloito duo taaisere enkaji ino pee atum oltau lino, kake etaa naa lele iyie, meekure naa aloito ena lototo duo e tipat."* Ore tenkaraki ina kiroroto, nebatata olkinki aosh enkop nedung'o tau ina kata ake.

Enkorrok e Nkisoma:

Mikiindim aailanya Enkai. Keata Enkai enkidimata neyiolo pooki toki. Ore enkitoduaa tena atini, nemeeta kasi



eneba anaa enilo, amu ketii Enkai pooki wueji. Ore temion oltau, naa iltung'ana kumok ooling'or karsisisho anaa erripoto o enchipai enye. Keeta apa ele karsis iropiyiani neeta enkidimata kake eitu naake eidim kuna pooki aitajeu ninye te keeya. Te rishata naado eigarakine enkidimata enye pee etum karsisisho hoo neitu eshilaa entoki nabo naata tipat oleng te nkishui - shoruetisho enye nasipa o Enkai. Etetema olkinki to siligi ajo ailany olmalaika le keeya. Etaa engolon enye o masaa enyena pooki ine pesho tena oitoi. Etayiewuaki pee eye neitashe openy tedukuya olorika le Nkai le nkiguana newalu aikenu mbaa pooki naataasa to sesen, aa sidain aa torrok. Ore pooki dupoto nataasua te nkumoi o te nyuaata nejung likae. Eitu eidim atoshoroi toki tenebo ninye.

Tayiolo kulo Kigerot to Ltau lino:

Yeremia 23:24, *"Keidim oltung'ani aisudoi kewon too wuejitin oo nkisudorot pee madol nanu ninye? Olaitoriani ojo. Emabore nanu shumata o enkop? Olaitoriani ojo."*

Olkerempe le Nkai 139:7-8, *"Kaji nanu alo pee ailany e Nkiyang'et ino? Anaa kaji nanu alo pee aailany iyie? Tenailep nanu alo shumata, itii iyie ine! Te naitobir nanu endapash ai te nemeneng'a itii iyie ine!"*

Indung'eta e Rashe 27:1, *"Miwuasa tenkaraki ine taaisere, amu miyiolo inaayooki ina olong ayau."*

Embolunoto 3:17, *"Amu ijo iyie, kara nanu karsis, atudupe, malau toki. Nimiyoilo iyie ajo ira menati, ira tolut, nira olaisinani modooni niminchopo."*

Olaikooni 5:10, *"Ore ilo onyor iropiyiani nemeraposhu ae kata too ropiyiani; ore sii ninye ena naa empesho."*

Mbaa Oltau:

Enkorrok oo Nkiteng'emat e Tipat:

1. Meatai oltung'ani ooidim aisudorie e Nkai.
2. Mikintajeu karsisisho e nkop.

Eimaki Nikurakiki:


1. Eibalakinyie Paulo kanisa o Ile Efeso nchere kainyioo pee etipikaki iyiook ena kop. Etiaaka, "Amu kira iyiook esiaai enye naitayioki tiatua Kristo Yesu te nkaraki isiaaitin sidain naaitobira apa e Nkai te dukuya pee kipuo tiatua ninche" (Efeso 2: 10).
2. Mejo esiaai sidai pee eaku enkumoi oo masaa empiani e karsisisho e dupoto enkorrok oltung'ani. Mme torrongo karsisisho. Kake, enikinko pee kitum o enikinko pee kiasishore, kuna pokira are naata tipat oleng pee iyaku karsis.
3. Ketii Enkai pooki wueji. Keyiolo indamunot oo ltauja lang. Keyiolo nkipankat oo masaa ang enkop. Keyiolo pooki nikijo ata eton eitu kijo. Paa kaji kinko pee kimpanka aisudorie Enkai.

Nkikilikuanat oo ndamunot o Nkibirribirrat:

1. Kainyioo enyamali ele kinki karsis te ndamunoto ino?
2. Kaji eiko pee eibung'akino karsisisho ele kinki o karsisisho olkinki omoda otii Luka 12?
3. Imbirribirra: Inoto sa aikata iyie eyieunoto pee isudorie Enkai?
4. Imbirribirra: Kaa indim aitaasa iropiyiani inono tenikindimie Enkai noto dupoto o masaa kumok nemetii eng'oki?

(**Esipata:** Tisipu sii Yakobo 4: 13-17 tenebo 1 Timoteo 6: 6-10.)

Kutukaji Napirik - 34



Etii apa oltung'ani obo oata eluaata oo nkishu. Neata embata oo nkishu imowuarak nemeata kulie. Naa kereo oshiaake olopeny kuna kishu meshomo aadaa te nchumata oldoinyio sapuk oti nkujit oleng. Ore terishata olameyu neturoki olturoto tembata oldoinyio, nepik kishomi napirik. Ore nabo olong, neipotu entumo oo nkishu pee einosaki nchere

etadamua pee epej nkujit pooki to ldoinyio pee ebulu ng'ejuko. Neliki nkishu pooki ajoki, enterretenata taa pooki kiteng tenkaraki enkima, entudung imowuarak inyi pee eleleku enkiimata enkishomi. Nejoki, enchoto nabo taa ake eatai nasaruni naa ore naake enkiteng naata imowuarak nemeidim aima ina kishomi napirik esarunoto. Nesioki kulie kishu aadung imowuarak enye, nejo kulie mikisioki iyiook aadung, eking'as aadol enaasayu. (Nejo Ilmaasai, eking'as aaduaki emotoroki enkare.") Nejo ninche nchere, "Ore ake pee kidol empuruo edukuya nikidung imowuarak ang." Nejo ae nabo, "Ore ake pee adung nanu imowuarak nemaitoki aata enaiko pee aarisho." Neitoki enkae ajo, aisidain kuna mowuarak aainei, kenare elukunya ai oleng, meidimayu katukul pee adung, kaasishore eng'eno ai pooki aing'oru enkoitoi naimie elusie."

Ore ake pee elusoo inkuti olong'i neyau olopeny nkujit enkima paa keiteru apejoo nkujit pooki. Ore tenkaraki enkirowuaj enkolong netoito nkujit oleng neaku keibung enkima enkop oleng. Ore ake pee edol nkishu empuruo neiteru aaipirri aapuo aaim elusie. Ore nkishu naatudung'o mowuarak neim elusie metii enyamali. Ore nkishu pooki naatejo mikisioki

iyook aadung nkunaang o naatanyaita katukul edung nyena ninche pooki enkima o metuata.

Enkorrok e Nkisoma:

Irishat kumok ejokini iyiook entapal ng'ok pee kiindim aatijing te kishomi napirik e shumata, kake mikining. Keirridu kulikai lang te nkisision neiba kulikai Oreori le Nkai. Neishoru kulikai enkisiligata enkirridunoto etataana erishata e keeya. Olwuasa, enchalan, o e sikar enkop o kulie ng'ok ake kumok naaibooyo iyiook mataanyu te rishata naado maitobira osotua lang o e Nkai. Ekidamu anaa ekishipa nemetii enyamali nimikiyieu imbaa naayieu enkitayunoto e maate o nyuaat oleng. Ore pee kisom ena atini naa emodai oo nkishu kidamu eneba. Anaata aa tenkiti nyuaata ake etasaruaki. Ore sii ninche iyiook naa ekipong'ori eitu kiyiolou emodai najjio ena oo nkishu tenkishui ang. Nkatitin kumok kidol anaa ekiaata iwalat. Mikidolita batisho tedukuya kake ekipuo ake nkoitoi ang too ltauja modook ooting'oki enkidaaroto.

Taiyolo kulo Kigerot to Ltau Lino:

Matayo 7:13-14, *"Entijing te nkishomi napirik amu dapash kishomi nelala enkoitoi nalo enkiminata, naa kumok iloojing ina. Amu kepirik kishomi naa ronkai enkoitoi nalo enkishon, naa ilkuti ootum ina."*

Mbolunoto 3:20, *"Ng'ura, aitashe te kutukaji naoshiosh, ore ake pooki ng'ae oning oltoilo lai nebol kutukaji, naa kajing'aki nanu."*

Ndung'eta Erashe 27:12, *"Ore oltung'ani ng'en nedol batisho neisudoo kewan, kake ore ilo omoda nelo adoiki netum enkitamioto."*

Ilkorintio le Dukuya 3:18-19, *"Emincho elej oltung'ani kewan. Tenejo likai linyi ng'en anaa naajo taata ele porror, enchoo ilo eaku keshal, pee etum ataa ng'en. Amu ore eng'eno ena kop kedol e Nkai anaa emodai."*

Ilesalonike le Dukuya 5:1-3, *"Kake ore anaa inkatitin o rishat ilalashera nemeeta tipat pee eigerokini ntae ai bae. Amu iyiololo ntai maate oleng nchere elotu e nkolong Olaitoriani anaa olapurroni te nkewarie. Ore ejo olorere, eetae eseriani nemeetai embatisho. Ore nabo kata nelotu errorroto shumata ninche anaa emion nainepu enkitok nairoshiwuo nemeeta eneilanyaki."*

Mbaa o Ltau:

Enkorrok oo Nkiteng'emat e Tipat:

1. Yesu ake kutukaji e njeunoto.
2. Entorrip ate emincho ake "isikarri enkop" eibok iyiook eitu kijing shumata.

Eimaki Nikurrakiki:

1. Keiririkino pee kirreten ate obo o obo lang te lotunoto o Laitoriani. Mikiaata likai likiaanyu meterretena iyiook.
2. Kelusoo oltarin le nchipai ena kop neing'uari enkishui oo ntarasi ebikito.
3. Nabo ake kishomi najing'ieki shumata. Naa eironkai, ilkuti ake eishaa. Meyieu Yesu hoo obo olo enkidaaroto.

Nkikilikuanat o Nkibirribirrat:

1. Mbalunye sii iyie ele rorei - Ilkorintio le Dukuya 3:18-19.
2. Idamu sa oltung'ani obo likigira oshi aitadamu kuna kishu naamoda tena atini? Aikunaki aja?
3. Kainyioo doi paa ilkuti tung'ana kenya ake eetae oopuo aajing te kishomi napirik.
4. **Mbirribirra:** Amaa tenejoolu taata Yesu etiaa oitoi kinepu iyie?

Terretenayu - 35

Etii apa olpayian oirriwayie olayioni lenye meshomo aing'oru entito naayam. Ore ake pee ebaya olayioni enkang neinepu ntoyie kumok naa kenyaanyuk pooki oleng, kenyaanyuk nkomomi, ilarin, enkadoro, olkuaak, nenyanyuk enkishopo. Nepapulu oleng neikilikuan kewan nchere kaa nabo sa doi alo ayam te kuna toyie pooki. Neitoki ake aikilikuan kewan ajo kaja sa doi aiko pee ayiolou enategelua teneeku ashomo aya masaa enkaputi. Nedumunye alo olduka nelo ainyiang'u olkarasha lemenyaanyukie ilooishopito nkulie toyie. Negelu entito naayam neisho olkarasha nejoki incho po ilo karasha ometaba anaa nashukunye pee maaitoki ake apong. Neng'amaa entito olkarasha neramat oleng. Neaku, ore pooki wueji nelo neata ilo karasha. Nelusoo taake nkolong'i kumok eishopito entito olkarasha, neiteru nchorueti enyena aatum olom neing'oru enaiko pee epurroo ele karasha.

Ore nabo olong nedumunye ina tito alo olkeju aitukuo nerikino eitu eisudoo olkarasha lenye. Nelotu ai tito nabo nepurroo olkarasha lenkae egira ninye aitukuo tenkare. Ore pee elusoo nkuti olong'i nelotu olpayian lenye pee erik ninye. Nepong entito naishopoko olkarasha oinyiang'ua to lduka nerik enaishopito olkarasha otupurroiye. Nejoki enapa tito nasayuno te sipata nchere ore ena tito niyama naa ketupurroiye olkarasha, neinosaki enaikuna ena tito pee epurroo olkarasha lenye. Newaliki olayamishe entito ajoki, "Maayiolo nanu iyie, amu ore ele karasha naa ninye lautaki te sipata entito apa nategelua pee eaku enkitok ai." Neshuk ina tito naata enkila arik enkang enye.



Enkorrok e Nkisoma:

Kinyaanyuk pooki tedukuya nkonyek e Nkai. Esiankiki enkiyama kanisa naa Yesu olee le nkiyama. Kelotu Yesu te nkolong nabo arik esiankiki Enye enkiyama tenebo olelo pooki ootoning'o neyanyit too nkiaasin Ororei le Nkai. Ore lelo ootang'amaitie Yesu anaa olaitajeunoni lenye nepuo tenebo ninye. Etiu Shetani anaa nkulie toyie tena atini ang. Keing'or yiook pee eing'oru enetii ntibil enchalan tiatua enkishui ang. Kenyok ninye oleng ajo aitataaniki iyiook kewan enye pee etumoki anoto erishata nainyialie enkishui ang oo ntarasi. Keiba oleng tenikitii kanisa aaibung'a o Kristo. Neaku, ore enkiteng'ena etipat oleng tena atini naa nchere pee kirretena te lotunoto e Olaitoriani. Ekiyiolo enaitanapa Enkai iyiook mataas. Ore te nkiimaroto oo nkiguanat o ntemat pooki naa keiririkino ake pee kintashe te mpijan nimikinturraa enkirukoto ang. Shakenisho ina kirukoto ang te dukuya e Nkai naipirta iltauja lang oouno o eyieunoto ang pee king'amu ina kitoomono e atua Enkitoo Enye (enkitoria enye).

Tayiolo kulo kigerot to Ltau:

Luka 12:35-36, *"Enterreten impolosi inyi, enchoo etoni eyupuyup iltaii linyi nitiuu anaa iltung'ana ooanyita olkitok lenye elotu eing'uaa osirua le nkiyama, pee tenebau neipotisho nesioki aabolu nabo kata."*

Luka 12:40, *"Entashololoto sii ntae; amu elotu Enkerai e Tung'ani te saa niminteikiki."*

Matt. 7:21-23, *"Mme pooki tung'ani laajo 'Olaitoriani, Olaitoriani,' ojing enkitoria e Nkai, kake ilo ooas enayieue Papa lai otii shumata. Aayooki aajoki ilkumok te ina olong, 'Olaitoriani, Olaitoriani, keitu kimbonisho te nkarna ino, nikiaraa iloiriruani te nkarna ino, nikiaas inenking'asia te*

nkarna ino?' Naa kashirraki ina kata ajoki ninche, enchom entung'uayioki intae, ilaasak loontorrok."

Yohana li are 1:8, *"Entodol ate pee minturraa ina nisiayutua, kake pee itumutumu ole koisiaayio linyi ebore."*

Mbaa Oltau:

Enkorrok oo Nkiteng' enat e Tipat:

1. Terretenayu pooki kata te nchukunoto Olaitoriani.
2. Keyieu Enkai nikiata ening'unoto o enkanyit.

Eimaki nikurrakiki:

1. Entukurraki te nkisosion erretenata e lotunoto Olaitoriani too nkatitin pooki.
2. Meiririkino pee elej iyiook ilaiteng'enak aashu ilchoreta lang alejak pee kinturraa osiligi lang.
3. Mme pooki ng'ae oishiraki Olaitoriani te nkolong e nkiguana eitajeuni. Lelo ake oas anaake iyieunot e Papa ninche ake eitajeuni.

Nkilikuanat oo Ndamunot o Nkibirribirrat:

1. Itoduaa iyie olng'ur leina tito naiturrayie olkarasha?
2. Idamu iyie anaa keishiaakino apa pee ening olee oyam ninye?
3. Imbalunye sii iyie ena kiroroto, "Mme pooki laajo Olaitoriani, Olaitoriani ojing e Nkitoria e Shumata."
4. Idamu pasa ae kiroroto oo lomom Supati naimaki e nchukunoto Olaitoriani?

(Esipata: Tadamu pee irrip enkishui ino amu eitu errip ina tito enkila enye nelotu enkae tito apurroo. Kejo 1 Timoteo 4: 16, *"Intamoo kewan kuna siaaitin tashiekinore ninche, pee edol*

pooki ng'ae eninkonari te nyuaata. Toduaa kewan o nena kiteng'emat inono, imbung'a amu tenias ina nintajeu kewan o lelo likinining."

Tadamu sii Iasat 2: 38 pee irretena te lotunoto Olaitoriani. Nirridu ng'ok inono nikimbatisai nilo dukuya asuj enkoitoi e Yesu. Keimaki Igalatia 2: 27 Yesu anaa entoki nikin chop tenkata enkibatisa. Metaa etiu Yesu anaa enkarasha ang.)

Etua nabo kata - 36


Etii apa oltung'ani oji enkarna MAIGIL ENKOITOI NABO ARE naa kenyor enkarna enye, nemeigil aikata enkoitoidaidipa aima. Nejo pee eikilikuan entito nanyor oleng pee eyam naji enkarna KIIYE TENEBEBO. Neshipa menye entito pee eitarasaa entito enye te nkiyama, kake etukurraka MAIGIL ENKOITOI NABO ARE pee eyiolou neisiligishore nenyorraa tipat e nkarna e ntito enye KIIYE TENEBEBO.

Ore pee etoning'okinote pooki, neyama pokira. Ore etulusoitie nkuti olong'i, nening enkitok oltoilo te kutukaji etonita ti aji ojo, "Supa, nanu, EMOIYIAN, naa kayieu najing'u aji!" Kake meyieu naa KIIYIE TENEBEBO nejing'u EMOIYIAN aji, nejoki, "Shomo, shomo tene. Mayieu nintanyamal iyiook!" Kake eitu enyorraa EMOIYIAN pee elo, nelo dukuya aikum kutukaji neoshiosh o metabanaa netum enkoitoidaidipa natijing'ie aji. Ore ake pee eshukunye ang teipa MAIGIL ENKOITOI NABO ARE, neinepu enkitok enye kemuoi oleng. Ore pee elusoo inkuti olong'i nening KIIYE TENEBEBO eoshoto te nkutuk aji. Neikilikuanu kaing'ae otii kutuk aji? Newalu oltoilo ajo, "Nele nanu enkeeya naoshito emilanko." Nejo enkitok to ltoilo sapuk, "Shomo, mayieu nilotu enkaji ai." Kake eitu elo enkeeya netum enkoitoidaidipa natijing'ie aji. Ore pee elotu MAIGIL ENKOITOI NABO ARE nemaniki enkitok enye etua. Nelo aisho menye olkilikuai otiaaka apa nchere, "Idamu osiligi apa litejo?" Newal ajo, "Kadamu osiligi apa latejo KIIYIE TENEBEBO" Ore ake pee epik osesen osanduku, neironyakino MAIGIL ENKOITOI NABO ARE atashare emeneng'ani. Ore ake pee eiteruni aanukaa osanduku, neiteru iltung'ana aaing'asiakino enataasa, neikilikuanu maate nchere, "Kesipa tinikinukaa ele tung'ani tenebo enkitok enye hoo neitu eye?" Nedung enkiguana nchere, tenetaa naa ekinukaa sii ninye, maing'oru naa enikinko pee kitum enkoitoidaidipa nalelek pee eishaa olee osanduku o enkitok enye. Neturu osanduku, neitalala penyo nerreten pee eitoki aaigil

aaturoo. Kake nejoki ilo payiani ninche, Idamumu nchere ore enkarna ai naa MAIGIL ENKOITOI NABO ARE? Maigil taa ajing ena gumoto oo lmeneng'a eniare amu aidipa naa atijing'a nabo kata!"

Enkorrok e Nkisoma:

Etua Yesu Kristo nabo kata tenkaraki iyiook pooki (seuseu). Etanapa olola loo ng'ok ang aya osalaba. Etonyorryayie pee eaku olaitutumoni lang. Meekure taata eiririkino pee eitoki aye eniare tenkaraki ing'ok ang nemeekure eiririkino iyiook pee



kipolosisho tenkaraki ing'ok ang. Etaasa Kristo openy nena pooki – etua, etunukayioki, neitoki apiu erishata nabo ake. Etopolosishe Olapolosani kitok ilarin iip ong'uan ootulusoitie tenkaraki enkorrok eng'oki

enye o eng'oki oo Israel. Neaku, ore Enkai tiatua enyorrata enye kitok, neishorua olasar oishu oata enkidimata pee eya ng'ok nabo kata ontarasi. Ore too larin o larin nemeekure eata empolosare tipat. Nemeekure eata osarge loo ng'uesi dupoto. Etaa osarge le Yesu ake olasar oya ng'ok e nkop. Naa kelo dukuya aasisho te pooki ng'ae ogil kung te dukuya ninye neibalunyie nchere ninye Olaitoriani.

(Esipata: Kenare sii neiruk oltung'ani Yesu, neirridu ng'ok enyena neibatisai.)

Mikiaata hoo entoki nabo nikincho anaa olasar oitisiny iyiook too ng'ok ang. Eidipa ataasayu te lulung'ata tenkaraki iyiook.

Tayiolo kulo kigerot toltau:

Iroma 6:8-11, *"Kake tenaa eikituata iyiook tenebo Kristo, nikiruko aajo eikinchi sii tenebo ninye. Amu ekiyiolo aajo ore Kristo eitopiwuoki too lootuata nemeitoki ae kata aigil aye. Meekure eitore keeya ninye. Ore keeya natua ninye naa ng'ok etanang'a, nabo kata ake. Kake ore enkishui naishu ninye naa te Nkai eishu. Enkenai sii ntae nchere ituata tialo ng'ok ninchushu tialo e Nkai tiatua Kristo Yesu."*

Ilhebrania 9:12, *"Neme osarge loo lkineji o lasho etoshoroyie kake osarge lenye makewan, neitadedeyie teina elakunoto oo ntarasi."*

Ilhebrania 9:27-28, *"Naa ore anaa enaitanapishoteki metuata iltung'ana nabo kata ake, ore pee elusoo ina nelotu enkiguana, neijia sii etiu Kristo, ore eidipaki aaitarasai ena nabo newa ng'ok oo lkumok, keliooyu eniare, neme ng'ok elotu arrar kake kelotu aitajeu lelo ooganyita ninye te yieunoto sapuk."*

Iasat 4:12, *"Meatai likai tukul otumieki enjeunoto, nemeatai ai arna naishoruno tiabori shumata, naishooki iltung'ana pee kijeunye."*

Ilhebrania 6:4-6, *"Amu meidimayu neitokini aaitasheyie te nkirukoto lelo oidipaki aaitawang'a, neishamishama enkirukoto e shumata, netang'arieki Enkiyang'et Sinyati. Neishamishama esupatisho o rorei le Nkai o engolon e ina kata nalotu, teneitoki ninche etii nena, aaibelekenya neany eiruk, amu ilo Inoti le Nkai eigil aashe maate nepik enkurruna metalioyu."*

Ilhebrania 10:4, *"Amu meidimayu metaa osarge loo loing'ok o lkineji ooya ng'ok."*

Mbaa Oltau:

Enkorrok oo Nkiteng'emat e Tipat:

1. Eitobira Yesu nabo kata olasar kitok oleng loo ng'ok ang naa oloo ntarasi – meekure eyieunoyu likai.
2. Keidimayu pee kintoki ashe Kristo tenkaraki enikinturraa enkirukoto ang o eanyata nikiaany Ninye.

Eimaki Nikurrakiki:

1. Etalaa Yesu e sile sapuk oleng te nkaraki iyiook ina kata pee eiruk aye to salaba tenkaraki ng'ok ang. Etaa olasar loo ng'ok pooki e seuseu.
2. Eimaki enikiaas oshi too nkolong'i pooki enkishui ang pee kingil aashe Kristo.

Nkikilikuanat oo Ndamunot o Nkibirribirrat:

1. Keidimayu pee kintoki aashe Kristo? Aikunaki aja?
2. Kolasar oikununo aja kiiyieu nikintayu pee eituku ng'ok ang?
3. Keidipa olasar loo ng'ok apa oitayio Yesu ng'ok pooki oo Isiraeli ometabaiki iltung'ana pooki le taata ometaba anaa neitoki ashukunye te nkitoo Enye?

(**Esipata:** Kake teneyieu nesuj oltung'ani Yesu netum sii empalakinoto oo ng'ok naa lasima pee eiruk ninye, neirridu ng'ok enyena neibatisai nelo dukuya asuj Yesu te nkishui enye pooki.)

4. Mbirribirra: Kainyioo indim ataasa tenkishui ino naitodolu enyorraroto olasar otaasa Yesu

Nkituaak Imiet - 37



Etii apa olee obo oata nkituaak imiet omany a empolos entim oo Lturi. Ore nabo olong nejoki nkituaak enyena nchere kelo ang'or ng'uesi naa keidimayu pee eshukunyie tiatua nkolong'i are. Nebik olpayian nkolong'i ong'uan eitu eshukunye neiteru nkituaak aing'aing'ai neing'asia aajo kainyioo nataase.

Ore enkitok edukuya naa eno loiboni. Nesai meny e metoliki olkilikuai oipirta olpayian. Newaliki ajoki atoduaa te nkidong ai olpayian lino eirragita neeta ilbaa te ntonata olng'aboli. Ore ake pee ening ina neipirri ashuko alo ainosaki nkulie nedumunye aapuo aaing'oru.

Ore enkitok eare naa entito olang'oroni loo ng'uesi (olotorroboni) neiteng'ena apa ninye enaiko teneibung orrekie loo ng'uesi o loo ltung'ana, ina taa pee eiteru aibung orrekie loo nkejek o lpayian lenye. Ore ake pee ebaiki embata olkeju sapuk nelaikino aanyaaki aashom dukuya kake keyiolo enkitok euni aterewa empeut tiatua enkare amu ore apa meny e naa olaibung'ani loo sinkir neaku enoto naa empeut naterewa aalang'ie olkeju. Nepuo dukuya o metaba anaa neinepu olpayian etii entonata olchani otusulunore etemita ajo adung'u ilng'anayio loo lng'aboli.

Neata apa ninye enkitok e ong'uan enkariyiano esipitali amu eiteng'ena apa meny e metaa keyiolo ataramata lbaa lenyena. Ore tenkaraki naa sapuk negol enkitok e miet metaa keidim ateena olpayian lenye te nkoriong nenap aya ang nesioki aishiu.

Enkorrok e Nkisoma:

Basi, naikilikuanu naa nchere, "Eng'ae doi naitajeuo ele lee?" Kenkitok doi edukuya nanoto eeta ilbaa, aashu kenkitok eare natusuja iroruat o metabaike entonata olchani, aashu kenkitok euni naterewa ninche te mpeut aitalang olkeju, aashu kenkitok e ong'uan nayiolo ataramata ilbaa lenyena, aashu kenkitok emiet nateenikia olpayian lenye enkoriong nenap aya ang nelo aishiu asioki? Tenkoitoi ake najjio ena kiindim aikilikuana ate nchere, "Kainyioo taata naidim aitajeu oltung'ani?" Kenkirukoto aashu kenkirridunoto aashu enkibalunoto aashu enkibatisa, aashu teninchu enkishui oo lairukok?

Ore anaa enawa nkituaak pokira imiet pee eitajeu olpayian lenye neyieu Enkai ening'unoto o e nkanyit naata nkiasin too nkitanapat enyena pooki pee kintajeuni. Ore enjeunoto naa enkishooroto naing'ua Enkai. Mikiindim aasiaayu. Eishorua e Nkai pesho kake keyieu ening'unoto nalulung'a te nchoto ang.

(Esipata: Kesipa keyieu Enkai nikiruk Yesu nikirridu ng'ok ang neibatisai iyiook nikipuo dukuya aasuj enkoitoi esinyatisho. Kake meidimayu katukul pee kingarakino esujata oo nkitanapat Enkai pee kijeu amu ekipong'ori pooki nejo Iroma 3: 21, "*Kake eibalunyieki taata esupatisho Enkai neitu eimu nena kitanapat, hoo neishakenokito inkitanapat oloibonok le Nkai, esupatisho e Nkai to rrekie le nkirukoto tiatua Yesu Kristo, te lelo pooki ooiruk.*")

Tayiolo kulo kigerot to Ltau:

Ile Efeso 2:8, "*Amu te mpiris eitajewuoki ntai to rrekie le nkirukoto: neme hoo tenkaraki ae nitaasa ntae, enkishorunoto e Nkai.*"

Iasat 2:38, "*Nejoki Petero ninche, "Erridutu pooki tung'ani neibatisai pooki tung'ani te ntae tenkarna e Yesu Kristo, pee*

epalakini intae ng'ok inyi; naa ing'amumu enkishorunoto e Nkiyang'et Sinyati."

Iroma 10:9,10, "*....Amu tinimbalunye iyie te nkutuk ino nchere ninye Olaitoriani Yesu niruk sii toltau lino nchere eitopiuo e Nkai ninye aitung'uaa ilootuata, nikintajeuni."*

Iroma 6:4, "*Naa ore anaa ina nikitaa nabo o ninye tenkeeya enye te nkibatisa ang, netaa ina ketunukayioki iyiook tenebo ninye, neaku ina naitopiwuo Papa ninye too lootuata te nkiaas enkitoo, neaku ina enkishui ng'ejuk te yiook."*

Ilgalatia 2:20 o 5:24:25, "*Aatashoki nanu tenebo Kristo, meekure aa nanu oishu, kake etaa Kristo oishu tiatua nanu.... Ore lelo oora ile Kristo Yesu neidipa ninche aatasho e nkewan osesen o nena yieunot enyena. Te netaa e Nkiyang'et taata kinchuyie iyiook, ematurubare naa erikore e Nkiyang'et."*

Mbaa o Ltau:

Enkorrok oo Nkiteng'emat e Tipat:

1. Empiris e Nkai naitajeu oltung'ani.
2. Aasisho tenebo.

Eimaki nikurrakiki:

1. Mikinyorraa enkiyama oo nkituaak kumok. Mme ena apa enkoitoi enkipirta e Nkai te nkishui oltung'ani anaa pee eitayu olee o enkitok (Enkiterunoto 2:21-25).
2. Ore esakutore o enaibon nerisio pokira are aa olminong te Nkai (Enkigilata oo Nkitanapat 18: 9-13).
3. Mikisiaayu enjeunoto - enkishorunoto naing'uaa e Nkai. Hoo naa, keyieu ening'unoto nalulung'a tororei Lenye!

Nkikilikuanat oo Ndamunot o Nkibirribirrat:

1. Kainyioo ai bae natejo Yesu naipirta enkibalunoto? (Esipata: Ing'orai Matayo 10: 32)
2. Kainyioo nkishoorot uni naang'amaa oltung'ani aa olee aashu enkitok teneaku enkairukoni? (Esipata: empalakinoto oong'ok, Enkiyang'et Sinyati, o enjeunoto.)
3. Amaa ina kata "eitajewuoki" oltung'ani kainyioo ai naitokini aayieunye? (Esipata: pee elo olairukoni dukuya asuj Yesu o enkoitoi e sinyatisho.)
4. Keatai taata iltung'ana ooidim "aatumusu" nkatitin?
5. **Mbirribirra:** Amaa te nkorrok enkishui ino ketii elulung'ata ening'unoto oo nkitanapat e Nkai? "Ketashoki" enkewon ino musana te lulung'ata?

(**Esipata:** Ing'orai Ilgalattia 2: 20 tenebo Iroma 6: 6. Paa maa kainyio isapipiyeti leilo tung'ani musana tiatua enkishui ino?)

(**Esipata:** Kayieu naponaa enkatini dorrop naipirta enkitok nagira atum inyamalaritin anaake te nkaji enye. Ore pee etum enyamali naje nyenyok aitobir. Kake ore nabo olong etanaure te nkitobirata enkaji nedol ajo meekure eitobirayu enkaji. Keyieuni enkaji ng'ejuk katukul. Nelo ashet enkaji ng'ejuk neshipayu tenebo olmarei lenye pooki. Ore taata ketii iltung'ana oonyok oleng aitobir enkishui enye. Neitobir enkiti wueji naa ore taaisere nedol ai enyamali. Nyenyok aitobir. Nemesioki aadol ajo keyieuni enkishui ng'ejuk katukul tiatua Yesu. Amu, ore pee nyenyok oltung'ani aitobir enkishui enye openy nemetii Yesu, naa kegol oleng. Kegira aigarakino engolon enye pee eitobir enkishui enye. Kake ore pee eng'amu oltung'ani Yesu te nkirukoto, enkirridunoto o enkibatisa netum Enkiyang'et Sinyati neiteru Enkai aitayu enkaji, aa enkishui, ng'ejuk katukul. Nejo Paulo too Lkorintio li are 5: 17, "*Neaku, tenetii oltung'ani atua Kristo, netaa enkitayunoto ng'ejuk; etulusoyie enapa musana, ng'ura nelotu eng'ejuk.*" Nejo Iroma 8: 26, "*Neijia eiko Enkiyang'et Sinyati pee elotu aretu iyiook te nchalan ang; emu*

aimikiyiolo iyiook aajo ainyoo kiomonu nimikiyiolo enikijo tinikiomonu, kake Enkiyang'et makewan naomonoki iyiook te mion nagut nemeinosunoyu.")

¹ Ore ake pee idol ena (**Esipata....**) naa tayiolo ajo nanu Paul Highfield otoponayie endamunoto aashu indamunot nemetii ina buku tedukuya.)